

# MATIU

*Yesu Keliso Googana  
(Luka 3:23-38)*

<sup>1</sup> Geka gilumana naka Yesu Keliso googana ubeihi, Yesu gogana Dawita ma Dawitana a goga i nenei naka Abelaham a guguni uyahinei. <sup>2</sup> Abelaham natuna Isako, ma Isako natuna Yakobo, ma Yakobo natunatuna Yuda walewalehina mitehi. <sup>3</sup> Yuda natunatuna Pelesi ma Dela, hinahi Tema. Pelesi natuna Esiloni, ma Esiloni natuna Lama, <sup>4</sup> ma Lama natuna Amidana, ma Amidana natuna Nahasoni, ma Nahasoni natuna Salimoni, <sup>5</sup> ma Salimoni natuna Bowasa. Bowasana hinana Lehaba, ma Bowasana agona Luti. Luti ma Bowasa natuhi Obedi, ma Obedi natuna Yese. <sup>6</sup> Yese natuna Dawita, tauna tu wasawasa.

Dawitana Ulaiya hiwapena i lawagi po natuhi Solomona hi guni. <sup>7</sup> Solomona natuna Lebom, ma Lebom natuna Abiya, ma Abiya natuna Esa. <sup>8</sup> Esa natuna Yosepata, ma Yosepata natuna Yolam, ma Yolam natuna Usaya. <sup>9</sup> Usaya natuna Yotam, ma Yotam natuna Ahasa, ma Ahasa natuna Hesekaya. <sup>10</sup> Hesekaya natuna Manase, ma Manase natuna Amoni, ma Amoni natuna Yosaya. <sup>11</sup> Yosaya natunatuna Yekonaya walewalehina mitehi, tauhi hai houga uyahina, ma mi Babiloni hi nei po mi Yudeya hi panipanihi po hi niyehi u Babiloni, po hi wihewahewa.

<sup>12</sup> Hougana u Babiloni hi memae po Yekonaya natuna Satiyeli i guni, ma Satiyeli natuna

Selubabe, <sup>13</sup> ma Selubabe natuna Abiuda, ma Abiuda natuna Eliyakim, ma Eliyakim natuna Eso. <sup>14</sup> Eso natuna Sadoka ma Sadoka natuna Ekim, ma Ekim natuna Eliuda. <sup>15</sup> Eliuda natuna Eliyesa ma Eliyesa natuna Matani, ma Matani natuna Yakobo. <sup>16</sup> Yakobo natuna Yosepa tauna agona gowana Maliya, po Maliyana uyahinei Yesu i guni po Yesuna hi wigowaya po hi pa, Besinana lawana.\*

<sup>17</sup> Apo Abelaham a houga uyahina ma ta hiyawi po ina nei Dawita a houga uyahina naka hapa magouhi 14. Ma Dawita a houga uyahina, ma ta hiyawi po ina nei po hi niniyehi u Babiloni hougana uyahina naka hapa magouhi 14. Ma hai mae Babiloni uyahinei ta hiyawi po ina nei Besinana lawana a houga guni uyahina naka hapa magouhi 14.

*Yesu Keliso a houga wawala  
(Luka 2:1-7)*

<sup>18</sup> Geka pitenana Yesu Keliso a houga wawala tahayana. Yesu hinana Maliya, ma guguhinina hewali gowana Yosepa uyahina hi bigeya, ma yohola ega hita meluwaga ma Maliya i koiba. Ma a koibana ma Alugo Woiyawa a wawala Maliya uyahina. <sup>19</sup> Ma agona Yosepa lawa dumadumaluna po ega ipa Maliya i koikoiba ina wiyanonena niyeya a lawa uyahih, ma inugohiyahiyawa po ipa ina wihinigigiyena gowadeya.

<sup>20</sup> Yosepa nugonugona i bagibagi po i eno hilage, ma Guyau a tu winoyanoya gehouna luboni uyahinei i paliweleya i pa, ‘Yosepa, Dawita

---

\* **1:16:** Giliki ponahiyei hi pa ‘Keliso’, ma Hibulu ponahiyei ‘Mesaiya’.

gogana, ega una matomatouta Maliya i koikoiba binei, naka Alugo Woiyawa uyahinei, yaka kidahi ma agom una lawagi. <sup>21</sup> Apo natuna olotona ina guni yaka una wigowaya Yesu\*, babana tauna apo a lawa hai apapoe uyahihiei ina wiluyago-hanihi.'

<sup>22</sup> Ginouli geka hi gelegeleta matababahi ipa Guyau a bahapiko ina lugeleteya tu bahapiko odubona i bahebaheya pite i pa, <sup>23</sup> ‘Guguhini totopana apo ina koiba po natuna olotona ina guni yaka gowana hina hiyawi Imanuwela.’ Gowana a bui, Yaubada miteta.

<sup>24</sup> Yosepa ani eno uyahinei i eno towolo po Guyau a tu winoyanoya a baha i wotagoya po Maliya i lawagi. <sup>25</sup> Ma Yosepa ega Maliya hinina ita wodadani a sigana i wigunaguna po tewelana i wigowaya po gowana Yesu.

## 2

*Tu hanahanapu tupo kaluwabugei hi nae Yesu uyahina*

<sup>1</sup> Yesu a guni u Betelehem Yudeya u tuponana Heloda a houga wiwasawasa uyahina. Naka hougana uyahina tu hanahanapu hi nei tupo kaluwabugei po hi nae u Yelusalem, <sup>2</sup> po hi lubayada hi pa, ‘Meka mi Yudeya omi wasawasa wouna hi guni? Amaka to hanapugeya babana hoi tupo kaluwabu a wekiwekilala ubona i geleta po to galeya yaka to nei uyahina ipa to wota-lagiyea.’

---

\* <sup>1:21:</sup> Yesu a bui ‘Tu wiluyagohana’.

<sup>3</sup> Hai baha wasawasa Heloda i noonoli po i nugohelele duma po gasi tanitaniwaga Yelusalem atapuhi hi nugohelele baha geka binei. <sup>4</sup> Ega yaka Heloda mi Yudeya hai tu witalaguyaba babadahi po lugagayo tanitaniwagahi i baha po hi'mboina gogona ma i lubayadehi i pa, ‘Meka hotana Besinana lawana hi guni?’

<sup>5</sup> Ega yaka hi paliweleya hi pa, ‘U Betelehem naka Yudeya meyageina gehouna, mei tu bahapiko gehouna a baha i bahebaheya i pa,

<sup>6</sup> “Betelehem meyageina apo meyagai baneina po wasawasana Yudeya dobuna  
atapuna uyahina apo una gelagonihi,  
babana uyahimgei mi Isalaela omi wasawasa apo  
ina geleta.

Tauna u lawa omi tu galena itete.” ’

<sup>7</sup> Ega yaka tu hanahanapu Heloda i otugena gowadehi po i lubayadehi i pa, ‘Meyanai a ubona i geleta po o galeya?’ <sup>8</sup> Tu hanahanapu hai wibaa-bani atapuna Heloda i noonoli po i kokoe, ma i paliwelehi i pa, ‘Ona nae u Betelehem po ona bihena imahiyeya po tewelana ona tuhagaya yaka ona gunawilena memi po ona paliweleu po apo tau a nae po a wotalagiyea.’

<sup>9</sup> Wasawasa ponana hi nonoli ma hi'mhoe po hi nenaе ma ubonana lolowa hoi tupo kaluwabu hi gagaleya u matahi i geleta po i gegae yaka hi wotagoya po tewelana anani mae i lidumaluya po uyahina hi geleta. <sup>10</sup> Hougana ubona hi galeya ma hi kaoha labatana. <sup>11</sup> Ma hi lui numa u hinena po tewelana hinana Maliya mitehi hi galehi, ma hi polou tewelana uyahina po hi wotalagiyea. Ma hai ani'mbenena humahi hi hoenihi po tewelana

uyahina hi hounihi naka gole ma mayau dimudimumuna talaguyaba binei ma wakatu dimudimumuna. <sup>12</sup> Ma Yaubada luboniyei i guduhi po i pa, ‘Ega Heloda uyahina ona gunagunawilemi.’ Yaka tahaya tapunei hi gunawilena mehi po hi nae hai dobu uyahina.

*Yosepa tewela hinana mitehi i lowogehi po hi nae Isipita*

<sup>13</sup> Tu hanahanapu hi nenaе ma uguwana Yosepa i eneno ma Guyau a tu winoyanoya yadei i geleta po eno luboniyei i paliweleya i pa, ‘Yosepa, una towolo po tewela hinana mitehi una lowogehi po ona nae u Isipita po noka hotanana ona memae a sigana a paliwelemi yaka apo ona gunawilemi. Omi lowo matababana Heloda tewela e bibiheya ipa ina lihilageni.’

<sup>14</sup> Ega yaka uguwana uyahina Yosepa i eno towolo po tewela hinana mitehi hi’mhoe po ipa hina nae u Isipita. <sup>15</sup> U Isipita hi memae a sigana Heloda i hilage ma apoma hi gunawilena mehi. Hai mae u Isipita ipa Guyau a baha ina lugeleteya tu bahapiko odubona i bahebaheya pite i pa, ‘Isipitägei natuwe a otugena meya.’

<sup>16</sup> Ma Heloda tu hanahanapu i ottonihi po i ottonihi po i ottonihi awehi ma ega hita gunawilehi. Yaka i luyogigai po tu wigawiya i himilihi po hi nae Betelehem anani taniwigana atapuna uyahina po logaloga ololotohi hai bolima luwaga ma i hopuhopu hi laihilagenihi. Babana tu hanahanapu hai baha Heloda i nugonugotuhuya po ipa houga awai uyahina tewelana hi guni. <sup>17</sup> Uyahinei tu bahapiko Yelemaya a bahapiko i limoineya i pa,

**18** ‘Lama u dobuna tou bahabaha a nonoli wiyuwa  
ma diligwegwe i tou bahebahehi.  
Lahela a guguni ubeihi i tou  
ega emoemotana po lawa hina woidedeli  
babana logaloga hi hilage.’

### *Yesu i gunawileya u Nasaleta*

**19** Isipita hi memae ma Heloda i hilage, ma Guyau a tu winoyanoya i himili Yosepa uyahina po i paliweleya eno luboni uyahinei **20** i pa, ‘Yosepa, una towolo po tewela hinana mitehi una weluwinihi po ona gunawilena memi Isalaela, babana tewelana tu wigawiyena amaka i hilage.’

**21** Ega yaka Yosepa i towolo po tewela hinana mitehi i weluwinihi po hi gunawilena mehi Isalaela u tupona. **22** Hougana hi gunagunawilena mehi ma lawa tuwega hi paliwelehi hi pa, ‘Heloda amaka i hilage, ma natuna Akeliyo iyawena i peli po e tanitaniwaga mi Yudeya uyahita.’ Yaka Yosepa ega ita luhogaleya ipa ina nae Yudeya babana i matouta, ega yaka luboniyei nugotuhu i weleya po ipa ina nae Galili u tupona. **23** Ega yaka Nasaleta u dobuna hi mae. Hai mae Nasaleta ipa Guyau a bahapiko ina lugeleteya tu bahapiko odubona i bahebaheya pite i pa, ‘Tauna hi wigowaya po hi pa, lawa Nasaletagei.’

## 3

### *Yoni tu wibapatiso a guguya*

*(Maki 1:1-8; Luka 3:1-18; Yoni 1:19-28)*

**1** Naka hougana uyahina Yoni tu wibapatiso i geleta Yudeya u balabalana po i lauguguya **2** i pa, ‘Ona nugobui, babana kikina ma Yaubada a

taniwaga uyahita ina geleta po ina taniwageta.'  
<sup>3</sup> Geka bahana naka tu bahapiko odubona gowana Isaiya Yoni binei i ibaabani i pa,  
 'Lawa gehouna hoi balabala yabayababa e iototu i pa,  
 "Guyau a tahaya ona wononogogeya.  
 A tahaya ona lidumaluhi." '

<sup>4</sup> Yoni a mae ega ita dewadewa babana a kaleko kamela apalana, ma a dagilolo gamogamo opina ma a Yam madimadi ma tuwoya i ananihi. <sup>5</sup> Yoni hoi balabala i lauguguya ma Yelusalem tu miyehi po Yudeya meyageihi gehouhi po gasi Yodani u liyaliyana tu mae hi liya nae Yoni uyahina, <sup>6</sup> po hai apapoe hi bahena geletehi ma Yoni i bapatisohi goila Yodani uyahina.

<sup>7</sup> Mei gasi Palisi lawahi po gasi Sadusi hai bolu gehouhi hi nae Yoni uyahina po ipa ina bapatisohi. Ma Yoni i galehi yaka i baha nae uyahinehi i pa, 'Taumi ani galenami mei mota, uyahinei Yaubada a luuyogigai iyetana ipa ona lowo haleya. <sup>8</sup> Tamogi ega emoemotami babana omi nugobui anona ega ota wogeletaya. <sup>9</sup> Ma ega tunawami ona pa, "Gogiyai Abelaham," naka ginouli yabayababa babana a paliwelemi Yaubada emoemotana po geka gaimahi ina dewahi po Abelaham googana. <sup>10</sup> Geka hougana Yaubada ilama i wononogogeya ipa mayau u dedena ina taleya. Uyahinei ma mayau atapuna ega ita ugugo apo ina tala halehi po mayau alalatana uyahina in'ompugehi.

<sup>11</sup> 'Apo ona nugobui yaka tau goilei a ibapatisomi. Ma lawa gehouna muliugei e nenei tauna i gelagoniu, ma tau ega u dewadewa awai po ipa

apo a aehumahuma an'awali. Tau tu nugobui goilei a bapatisomi. Tauna muliugei e nenei apo Alugo Woiyawei po wipoya mei mayau alalatanei ina bapatisomi. <sup>12</sup> Anani luhapu hipana u nimana po aniani mei pegapega ina tuweluhu po a hanali u hinena ina tuupumi. Ma nudanudahi apo mayau alalata tuwetuweneina uyahina in'apuhi.'

*Yoni Yesu i bapatisoya  
(Maki 1:9-11; Luka 3:21-22)*

<sup>13</sup> Houga noka uyahina Yesu Galili tuponana i nehaleya po i nae Yoni uyahina, po ipa ina bapatisoya Yodani u goilana. <sup>14</sup> Yoni a wileta ipa Yesu ina paliguduya ega yaka i pa, ‘Tam emoemota dumam po una bapatisou ma iyowai po u nei uyahiu po ipa tau a bapatisom?’

<sup>15</sup> Ma Yesu a baha i wimiheya i pa, ‘Eega, geka hougana tam i linanam una wibapatisou, po Yaubada a dewadumaluna ta wotagoya.’ Ega yaka Yoni i palihalena meya po Yesu i wibapatisoya.

<sup>16</sup> Ma Yesu goila uyahinei i togotogo geleta ma yada i gunahoeya ma Yesu Yaubada Alugona i gagaleya mei bunebune ma i hopu mai po uyahina i yato. <sup>17</sup> Ma pona yadei i hopu mai i pa, ‘Natuwe geka a luhogaleya, tauna binei a kaoha.’

## 4

*Tomodulele Yesu i ludadani  
(Luka 4:1-13; Maki 1:12-13)*

<sup>1</sup> Alugo Woiyawa Yesu i weluwaya po i niyen'i hoi balabala yabayababa, ipa Tomodulele a ludadana ina wialoni. <sup>2</sup> Iyeta ma uguwa magouhi 40 ega aniani ita waya po u mulina am i hilage. <sup>3</sup> Ma

tu ludadana i geleta po i baha i pa, ‘Yesu, inapa tam Yaubada Natuna yaka geka gaimahi una baha po hina liyaniyanihi.’

<sup>4</sup> Yesu a bahana i wimiheya i pa, ‘Yaubada a Buka u hinena giluma e memae i pa, “Lawa apegia yaniyani tunawana uyahinei hina luyagohana. Ma baha Yaubada gamonei he nenei tauna lawa hai ani luyagohana.” ’

<sup>5</sup> Ega yaka Tomodulele Yesu i niyeya Yelusalem, po numa dalabu baneina u moyana i houni <sup>6</sup> ma i baha i pa, ‘Inapa tam Yaubada Natuna yaka una lupa hopu, matababana Yaubada a Buka u hinena i baheya i pa,

“Yaubada a tu winoyanoya mi yadena apo ina baha po hina galena itetem,  
ma apo nimahiyei hina wohepam  
po apegia hoi gaima aem una toneya.” ’

<sup>7</sup> Yesu a bahana i wimiheya i pa, ‘Yaubada a Buka i bahena meya i pa, “Guyau om Yaubada ega una laudadani.” ’

<sup>8</sup> Houga gehouna Tomodulele Yesu iludadana meya po i giyeya oya baneina u tepana ma hipuli tupo wohepali ani taniwagahi po gapolahie Yesu i wiatatiyeya. <sup>9</sup> Ma i baha nae i pa, ‘Inapa una polou uyahiu po una wotalagiyeu, yaka ani taniwaga atapuna geka apo a welem.’

<sup>10</sup> Ega yaka Yesu i paliweleya i pa, ‘Tomodulele, una nehaleu. Yaubada a Buka u hinena i baheya i pa, “Guyau om Yaubada tam una wotalagae uyahina po tunawana una pupouleya.” ’

<sup>11</sup> Ega yaka Tomodulele Yesu i nehaleya ma tu winoyanoya mi yadena hi nei po hi haguya.

*Yesu a bagibagi i wiwawali  
(Maki 1:14-15; Luka 4:14-15)*

<sup>12</sup> Hougana Yesu tuwega i nonoli ipa Yoni amaka hi numa panipani po hoi numa panipani hi houni, yaka i gunawilena meya po i nae Nasaleta Galili u tuponana. <sup>13</sup> Ma Nasaleta i nehaleya po i nae Kapaneum boga u liyaliyana po noka hotanana i memae, naka dobuna Sebuloni ma Napatali hai hipuli. <sup>14</sup> I nenaе ipa Guyau a bahapiko ina lugeleteya tu bahapiko Isaiya i bahebaheya pite i pa,

<sup>15</sup> ‘Sebuloni ma Napatali hai dobu boga u liyaliyana  
ma Yodani goilana u tuponei tauhi ega mi Yudeya  
hai dobu gowana Galili.

<sup>16</sup> Noka dobuna uyahina lawa hoi uguwa hi memae  
ma yayata baneina,  
uyahihi amaka i geleta po hi galeya ma tauhi  
hilage meyageina hi meliyaliyani po hi memae  
ma yayata uyahidi i lugeleteya.’

<sup>17</sup> Naka houganana Yesu a bagibagi i wiwawali po i guguya lawa uyahidi ma i ibaabani i pa, ‘Ona nugobui, babana kikina ma Yaubada a taniwaga uyahimi ina geleta po ina taniwagemi.’

*Tu ebaebaga wohepali Yesu i otugehi  
(Maki 1:16-20; Luka 5:1-11)*

<sup>18</sup> Iyeta gehouna Yesu Galili bogana liyaliyanei i nenaе po tu ebaebaga luwaga i tuhagahi, tauhi hi ebebaga u boga. Gehouna gowana Simona tauna hi wigowaya po hi pa, Pita ma walehina gowana Andulu. <sup>19</sup> Ega yaka i otugehi i pa,

‘Ona wimulitagou po lawa ebagahi a wiatatiyemi.’  
**20** Naka hougana hai hagida hi nehalehi ma Yesu hi wotagoya.

**21** Ma i tutunae po Sebedi natunatuna luwaga Yamesa ma a tewela Yoni i galehi tauhi hai hagida hi woononogogehi amahi mitehi hai wam uyahina. Ega yaka Yamesa walehina mitehi Yesu i otugehi. **22** Ma hi wotowolo yagiyagina po amahi hoi wam ma hi nehaleya po Yesu hi wotagoya.

*Yesu lawa boluhi i haguhi  
(Luka 6:17-19)*

**23** Yesu Galili meyageina atapuna i wiwileya ma i guguya hai numa tapalolo uyahih, ma tuwega dewadewana i atatiyeneya Yaubada a witani-waga lawa uyahih binei i paliweleneya ma lawa tootogohi i lauyawahihi totogo tapuna po tapuna uyahihiyei. **24** Yesu noyana hi nohaya Siliya meyageina atapuna uyahih, ega yaka tu tootogo gehouhi hi nei uyahina. Tauhi hai totogo hi lata duma po gasi hi witai duma, ma gehouhi gasi alugo apapoehi hi luinihi ma gehouhi wobade-badehi, ma gehouhi gasi waigwameyameyahi at-apuhih Yesu i widewadewahi. **25** Yesu a wipoya hi gagaleya po bolu baneina hi wotagoya, mi Galiliyena po mi Dekapoliyena po mi Yelusalem po mi Yudeya po gasi Yodani goilana tuponana tu miyena tauhi gasi hi wotagoya.

## 5

*Yesu tu wotagona hoi oya i wiatatiyehi  
(Luka 6.20-23)*

- <sup>1</sup> Yesu bolu baneina i galehi ma i gae hoi oya po i tugula ma a hewahewali hi gae uyahina. <sup>2</sup> Ma Yesu i wiwawala po uyahihi i wiatatiyana i ibaabani i pa,
- <sup>3</sup> Taumi iyawoi nawa nugenugomi o idaya-dayabugena mehi a kawaidewedewemi, babana yada taniwagana galimiyei.
- <sup>4</sup> Tu nugodubu lawami ona kaoha babana Yaubada apo ina likaoha dumami.
- <sup>5</sup> Taumi iyawoi o palihalena memi ona kaoha, babana Yaubada hipuli a taniwaga atapuna apo ina welemi.
- <sup>6</sup> Taumi iyawoi dewadumalu binei ma o weluweluomhilage po o weluweluyopopo haleyana a kawaidewedewemi babana apo on'omhiyougo.
- <sup>7</sup> Tu lunugotootogo lawami ona kaoha, babana Yaubada apo ina lunugotootogogemi.
- <sup>8</sup> Tu nugoyeuyeu lawami ona kaoha, babana Yaubada apo ona galeya.
- <sup>9</sup> Tu wihaahalana lawami ona kaoha, babana Yaubada apo ina kawainatunemi.
- <sup>10</sup> Taumi iyawoi apo dewadumalu binei ma lawa hina igawiyemi yaka ona kaoha, babana Yada taniwagana apo ina wigalimiyei.
- <sup>11</sup> Taumi iyawoi apo biugei ma lawa hina palipaliwiyalutugemi po hina igawiyemi po hina kawakawaikoyakoyamemi yaka ona kaoha labatana. <sup>12</sup> Ona kaoha po ona gwaugwauyala, babana hoi yada mihami apo ina lata duma. Geka pite apo lawa hina dewadewami mei lawa odubohi tu bahapiko hi laipilipilihi.'

*Niha ma yayata bahahi  
(Maki 9:50; Luka 14:34-35)*

<sup>13</sup> Taumi mei niha tu mehipuli ubeihi. Niha ginouli dewadewana ma dagihana ina kokoe ega emoemotana po ina dagiha meme yaka apo ta wihinigigiye po ta haleya.

<sup>14</sup> Taumi mei yayata tu mehipuli ubeihi, taumi mei meyagai oya u tepana po uguwei omi yayata lawa atapuhi hina gagalehi. <sup>15</sup> Ega iyai lampa ita apuya ma gaebagei ita lautataya, tamogi anani tugula uyahina e houni po numa hinena atapuna e yaayahi. <sup>16</sup> Taumi tu mehipuli hai yayata yaka ipa omi yayata ona houna geletehi lawa magomagouhi u matahi po omi bagibagi dewadewahi lawa hina gagalehi, po Amami hoi yada lawa hina wotalagiyeya.'

*Lugagayo bahana*

<sup>17</sup> Ega ona inugonugotuhu powa po ona pa, a nenei po apo Mose a lugagayo po tu bahapiko hai wiatatiyana a wihalehi. Ega naka pitenana, tau a nenei ipa lugagayo anohi a wogeletena imahiyeya. <sup>18</sup> A baha duma uyahimi, apo hipuli ma yada hina yababa ma lugagayo baneina ma u tipolina po habulu wahagana apegia hina kokoe ma anohi hina geleta. <sup>19</sup> Apo tam iyai lugagayo habulu hotana una tulagoni po lawa una wiatatiyena powahi, yaka Yaubada anani taniwaga uyahina apo gowam ina hopu duma, ma inapa taniwaga una wiponawogogeyea po una iatatiyaneya yaka apo gowam ina lata duma Yaubada anani taniwaga u hinena. <sup>20</sup> Palisi po lugagayo tanitaniwagahi lawa u matahi hi dumalu

tamogi a paliwelemi apega Yaubada anani taniwaga uyahina hina lui babana hai dewa ega hita dewadewa. Inapa taumi ona luhogaleya Yaubada anani taniwaga uyahina ona lui yaka taumi omi dewa tauhi hai dewa ona dewadewa lagonihi.'

*Uyogigai Wiatatiyanana  
(Luka 12:57-59)*

<sup>21</sup> 'Amaka ta hanapugeya lugagayo Yaubada googata i welehi ma i baheya ipa, "Ega ona yamunugo; apo iyai ina yamunugo yaka libahibahi apo ina wialoni." <sup>22</sup> Geka tau a palipaliwelemi apo tam iyai tulam uyahina uyom ina wogigai yaka apo tam libahibahi una wialoni. Ma tulam una hapohaponi yaka taniwaga witewiteina apo una tuhagaya tanitaniwaga uyahiyei. Apo tulam una kawakawaibuubuweni yaka mayau ebebalanana una wialoni.

<sup>23</sup> 'Tam iyai om luhogala ipa om ani'mbenena una niyeya po Yaubada una weleya, ma u nungonugom ina lugeleteya ipa tulam gehouna a nugodubuna e memae om dewa binei, <sup>24</sup> yaka dumadumaluna ipa om ani'mbenena una houni ani witalaguyaba u liyaliana ma una gunawilena mem po tulam uyahina una lidumalu tahaya, ma apoma una gunawilena mem po om ani'mbenena una houni Yaubada u matana.

<sup>25</sup> 'Apo lawa gehouna ina wigoum po ona nae luhetala binei, yaka naka ipa dumalu ona waya po apapoe ona lidumaluya. Ma inapa ega yaka tu wigoum lawana apo ina niyem tu luhetala u nimana po ina houna luiyem hoi numa panipani. <sup>26</sup> A baha duma uyahimi, noka hosi apo una memae a sigana om yaga atapuna una

laidumaluya ina hopu po toea emosi uyahina una wikkokowi.’

*Luhogala gowagowada*

<sup>27</sup> ‘Amaka ta hanapugeya lugagayo Yaubada googata i welehi, i baheya i pa, “Ega ona matamatamaga.” <sup>28</sup> Ma geka tau a palipaliwelemi, apo lawa awai wawine gehouna uyahina ina luhogala gowagowada, yaka naka lawana amaka u nugonugona apapoe i geleta. <sup>29</sup> Ma apo mata hinebawam ina laipeunim yaka una wahi haleya, po ega hinim atapuna mayau ebebalana ina ialoni ma tamogi wiyuwa baneina gutam emosi hota binei apo una wialoni. <sup>30</sup> Mei gasi awala hinebawam apo ina laipeunim yaka una boli haleya po ega hinim atapuna mayau ebebalana ina ialoni ma tamogi wiyuwa baneina gutam emosi hota binei apo una wialoni.’

*Wihulu binei*

(Matiu 19:9; Maki 10:11-12; Luka 16:18)

<sup>31</sup> ‘Lugagayo gehouna Mose i gilugilumi i pa, “Apo lawa awai a luhogala ipa agona ina haleya yaka, a wihulu wekiwekilalana giluma gehouna ina gilumi po ina weleya ma apoma agona ina haleya.” <sup>32</sup> Ma tau a paliwelemi, apo oloto gehouna agona ega ina wihola ma ina haleya, ma apoma wawinena ina nae po oloto tapuna ina lawagi naka e matamatamaga, uyahinei olotona i ihulu tauna a gou babana agona i lipeuya po i tawine damana. Mei gasi oloto gehouna apo ina nae po wawinena ina lawagi yaka naka e matamatamaga.’

*Wigwala koyakoyama binei*

<sup>33</sup> ‘Lugagayo odubona amaka o hanapugeya hi baheya hi pa, “Apo una igwala yaka om bahan a ega nugom ina guluguluwi ma awai Guyau uyahina u palipaliwitumaganeya una dewaya po ina lugeleteya.” <sup>34</sup> Ma tau a paliwelemi ega ona igwala gae yada binei, matababana Yaubada anani mae. <sup>35</sup> Ma a paliwelena memi ega hipuli binei ona igwala matababana Yaubada aena ani hounana. Ma ega Yelusalem ona igwaleya, matababana Wasawasa baneina tauna Yaubada a dobu. <sup>36</sup> Ega ununum una igwaleya babana gegeka, ega emoemotam una baha po apalam emosi ina wakeke bo una baha po ina wididibaleya, bo? <sup>37</sup> Ona ibaabani po ona bahahaha dumalu yaka ona pa, “Ee”, ma apo nugonugomi ona bowi yaka ona pa, “Eega”. Apo omi baha ona lauwitani yaka naka tu apapoe a nugotuhugei e nenei.’

*Tu wiapapoenim ega uyahina una laubigo  
(Luka 6:29-30)*

<sup>38</sup> ‘Lugagayo odubona uyahina amaka o hanapugeya hi baheya hi pa, “Mata emosi bigona mata emosi, ma niwo emosi bigona niwo emosi.” <sup>39</sup> Ma tau u lugagayo a paliwelemi ega ona laubigo, apo lawa awai nawatata hinebawam ina launi yaka nawatata kehakeham una weleya po ina launi. <sup>40</sup> Inapa iyai om gupouma luiluina ina waya yaka om luilui hota una palihaleya uyahina. <sup>41</sup> Apo lawa awai ina wihinihininim po a gapola una awala po una nae meyagai tahatahayana uyahina yaka gasi meyagai wiluwagana uyahina una niyeya po una houni. <sup>42</sup> Iyawoi uyahim he laupali hai luhogala atapuna una welewelehi po

iyai om gapola ina lupaliyeya po ina wibagibagi yaka ega una nugonugoneya.'

*Omi gawiya ona luhogalehi  
(Luka 6:27-28, 32-36)*

<sup>43</sup> ‘Googata hai baha amaka o hanapugeya hi bahebaheya hi pa, “Omi lawa ona luhogalehi ma omi gawiya ona wihinigigiye.” <sup>44</sup> Ma tau u lugagayo a paliwelemi omi gawiya ipa ona luhogalehi, ma tu lipilipilimi ubeihi ona laupali Yaubada uyahina. <sup>45</sup> Po geka dewana uyahinei Yaubada Amata hoi yada ina kawainatunemi, matababana tauna e lauhogaleta po tauna uyahinei kabudala e laalana hopu mai tu apapoe po tu dewadewa uyahihi, po gasi gadiwewe i palihaleya tu dumalu lawahi po ega hita dumadumalu uyahihi. <sup>46</sup> Inapa tu luhogalem lawahi tunawahi una lauhogalehi yaka naka apo a dewadewa awai tam uyahim? Matababana takisi tu tama gasi tu luhogalehi he lauhogalehi. <sup>47</sup> Apo gasi omi lawa dumahi tunawahi ona maamalihi ma lawa gehouhi eega, omi dewana mei tu meuputa hai dewa po ega ita dewadewa babana tupo magomagouhi geka dewana he meme tagoya. <sup>48</sup> Hoi hipuli omi dewa hina dewadewa imahi po mei Amami hoi yada a dewa.’

## 6

*Ombenena wiatatiyanana*

<sup>1</sup> Yesu i baha meme i pa, ‘Hougana omi dewa dewadewahi ona dewahi ega ipa lawa u matahi po hina hunemi. Inapa omi dewa naka pitenana

yaka Amami hoi yada apega uyahinei maiha de-wadewana ona tuhagaya.

<sup>2</sup> Hougana tu dayadayabu ipa uyahihī on'ombenena ega himogo ona huwehuwena tahaeya, po mei tauhi tu wikoyakoyama hoi numa tapalolo po hoi meyagai hai ombenena u mulina ma himogo he huweni po ipa lawa hina hunehi. A baha dumalu uyahimi hai kawaidewadewa houga geka he tutuhagaya naka hai meiha. <sup>3</sup> Ma taumi omi houga ombenena hougana ipa on'ombenena gowagowada, po awala hinebawami a ombenena awala kehakehami ega ina hanahanapugeya <sup>4</sup> po lawa ega hina gagalemi tamogi Amami omi ani'mbenena gowagowadahi ina galehi po uyahihīyei omi meiha ina welemi.'

*Lupali wiatatiyanana  
(Luka 11:2-4)*

<sup>5</sup> ‘Omi lupali ona galena imahiye hi apo ona laupali Yaubada uyahina ega mei tu wikoyakoyama hai lupaligei ona laupali, matababana gegeka, tauhi hai winugonugotuhu ipa hoi numa tapalolo po hoi ani libolu lawa boluhi u matahi hina towolo ma hina laupali. A baha duma uyahimi tauhi lawa hai kawaidewadewa houga geka he tutuhagahi naka hai meiha. <sup>6</sup> Ma taumi omi houga lupali uyahina ona lui omi numa u hinehi po omi babanoya ona guduhi ma Amami uyahina ona laupali gowagowada. Omi lupali gowagowadahi Yaubada ina galehi po uyahinei omi meiha ina welemi. <sup>7</sup> Ma omi houga lupali uyahihī ega mei tu wipalilougo hai pali. Tauhi hai winugonugotuhu ipa apo baha yawa uyahinei ginouli hina

tuhagaya. <sup>8</sup> Hai dewa taumi ega ona wootagoya, babana taumi Amami e memae po tauna omi nugohine atapuhi i hanapugehi ma apoma muliyei o laupali.

<sup>9</sup> 'Geka pitenana ona laupali ona pa,

Amiyai, tam hoi yada e memae.

Gowam to wiyatayateya.

<sup>10</sup> Om ani taniwaga una wogeleteya.

Om nugotuhu to dewaya hoi hipuli

mei yada tu miyena he dewedeweya pite.

<sup>11</sup> I yam iyeta geka binei una weliyai.

<sup>12</sup> I apapoe una paligigilihi po mei iyawoi tu wiapapoeniayai to paligigilihi.

<sup>13</sup> Ma ega una palihaliyai po ludadana baneihi tona ialonihi.

Ma apapoe uyahinei tam una haloiyai,

[babana tam om ani taniwaga po om manini po om wasawasa amalai po houga tuwe-tuwenai. Moina].

<sup>14</sup> 'Apo taumi lawa hai apapoe ona paligigilihi yaka Amami hoi yada apo omi apapoe ina paligigilihi. <sup>15</sup> Ma inapa lawa hai apapoe uyahimi ega ona paligigilihi, yaka Amami hoi yada omi apapoe apega ina paligigilihi.'

### *Wiyohi binei*

<sup>16</sup> 'Hougana tapalolo binei ma ona iyohi, yaka ega tepami hina woapapoe po mei tu nugodubu. Naka tu wikoyakoyama hai dewa dumana babana galenahi hi wiapapoenihi po ipa hai wiyohi lawa hina hanapugehi po hina kawaidewedewehehi naka hai meiha amaka he tutuhagahi. <sup>17</sup> Ma taumi inapa tapalolo binei ona iyohi yaka ona itepaoga

ma apalami ona ineulihi po galenami hina dewadewa lawa uyahih<sup>18</sup> po omi wiyo<sup>hi</sup> lawa ega hina hanahanapugehi, ma u nugenugomi awai e memae Amami tauna tunawana ina hanapugeya po apo om maiha ina wele<sup>mi</sup>.'

*Tu waigapola hoi yada*  
*(Luka 12:33-34, 11.34-36)*

<sup>19</sup> ‘Omi gapola ega hoi hipuli ona upupuma, matababana motamota po buda gapola he iapano<sup>enihi</sup> ma tu danene apo hina lui po omi numa u hinehi omi gapola hina danenehi. <sup>20</sup> Ma a dumalu ipa omi gapola hoi yada ona biheya, matababana hoi yada ega motamota po buda hita memae. Uyahinei omi gapola apega hina wiapapo<sup>enihi</sup> po ega tu danene hita memae. <sup>21</sup> Ma meka hosi omi gapola he memeyana naka hosi apo nugenugomi hina mae.’

*Hini yayatana*  
*(Luka 11:34-36)*

<sup>22</sup> ‘Matam tauna hinim anani liyayata. Hougana matam a dewadewahi hinim atapuna apo yayata ina hogoya. <sup>23</sup> Ma matam hai apapoe hougana hinim atapuna apo hoi uguwa. Inapa yayata uyahim ina wigahugahu yaka naka uguwa ina mewiiw<sup>lena</sup> dumam.

<sup>24</sup> ‘Ega eme<sup>motana</sup> tu bagibagi emosi babada luwaga ina poulehi. Matababana emosi apo ina wihinigigiye<sup>ya</sup> ma gehounana ina luhogaleya. Ma apo emosi ina latuya ma gehounana ina galena iapapo<sup>eya</sup>. Apega Yaubada ma gapola una poulen<sup>a</sup> luwagehi.’

*Yaubada ta witumaganeya  
(Luka 16:13, 12:22-31)*

<sup>25</sup> Uyahinei a paliwelemi, ega ona genogeno omi mae hoi hipuli binei. Awai apo on'anani bo awai on'umumaya bo hinimi awai in'ototeni ega ona genogenogeya. Matababana omi luyagohana hi geduma ma apoma aniani, ma hinimi hi geduma ma apoma kaleko. <sup>26</sup> Heki, kiu ona galehi, tauhi ega hita laupehi po ega hita yaba po hoi hanali hita huhouna. Ma tamogi Amami hoi yada e ianianahi. Ma taumi o geduma ma apoma kiu. <sup>27</sup> U hayami iyai emoemotana a nugotuhugei apo a luyagohana ita lidaoya? Ega emoemotami.

<sup>28</sup> Matababana awai po kaleko binei o inugonugotuhu duma? Heki, hipuli wihiyahi iyowai he lahalahahi ona galehi. Tauhi ega hita wobagibagi bo hita diidina. <sup>29</sup> Tamogi a paliwelemi, Solomona a gapola atapuhi u hinehi a kaleko ega hai haki mei geka wihiyahi. <sup>30</sup> Hiyamoni amalai e lauyagohana ma mali'inatom po amaka e nae. Hoi mayau he'mapugeya po e alalahi. Tamogi Yaubada tauna hiyamonihi galenahi e idewadewahi, yaka Yaubada omi kaleko dewadewahi apo ina wiotenimi? Omi witumagana hi habulu hota! <sup>31</sup> Uyahinei ega ona inugonugotuhu powa po ona pa, "Meka ata yam, ma meka ata goila, ma meka ata kaleko?" <sup>32</sup> Matababana geka hipulina uyahina tu meuputa geka ginoulihi he bibihehi. Ma Amami hoi yada i hanapugeya naka geka ginoulihi o lauhogalehi. <sup>33</sup> Tamogi tauna anani taniwaga po a dewa dumadumaluhi ona bibihena tahaehi yaka geka ginoulihi apo hina

wigalimiyei. <sup>34</sup> Iyeta emosi po emosi a winugonugotuhu he memae amalai binei ma hoimalatom binei. Yaka amalai ega ona inugonugogotuhu hoi malatom binei.'

## 7

*Lawa ega ta laibahibahihi  
(Luka 6:37-38, 41-42)*

<sup>1</sup> ‘Ega lawa gehouhi ona laibahibahihi meka po apo Yaubada ina libahibahimi. <sup>2</sup> Lawa hai apapoe ega ona inimayooyogehi babana omi winimayooyogana Yaubada apo ina wotagoya po ina winimayooyogemi.

<sup>3</sup> Awai binei walehim u matana dubudubu e gagaleya ma tam u matam mayau tipolina ega uta genogeya? <sup>4</sup> Apo iyowai walehimna uyahina una baha nae una pa, “Una nei po u matam dubudubu a wihaleya,” inapa tam u matam mayau tipolina ega una galeya? <sup>5</sup> Tam tu wikoyakoyama. U matam mayau tipolina una wihalena tahaeya po una galena imahi ma apoma walehim u matana dubudubu una wihaleya.

<sup>6</sup> ‘Yaubada a gapola ega ona hahalena yababayabaya kedewa u matahi, apo ona liyahiyahihi ma hina luhagawilehi po hina kimami. Mei gasi omi kahi matana ega polo ona weleweleya apo ina tuibaabaya.’

*Lupali wiatatiyanana  
(Luka 11:9-13)*

<sup>7</sup> ‘Ona lupali yaka apo Yaubada ina welemi. Ona bibeihā yaka apo ona tuhagaya. Ma ona laitutou yaka Yaubada apo taumi bimiyei gudu

ina hoeya. <sup>8</sup> Matababana tu lupali atapuhi hai luhogala Yaubada e welewelehi. Ma tu beiha hai luhogala he tutuhagahi po tu litutou ubeihi Yaubada gudu e hoehoeya.

<sup>9</sup> Itapa geka u hayamina tam olotom po natum olotona ita kawayaniyani, apo gaima uta weleya? <sup>10</sup> Bo ita kawaiyana, apo mota uta weleya? <sup>11</sup> Taumi tu apapoe ma o hanapugeya po natunumi ginouli dewadewana o yambenehi, yaka Amata hoi yada tu lupali ginouli dewadewana e welewelehi. <sup>12</sup> Ma awai u luhogaleya ipa lawa uyahim hina dewadewaya naka dewana emosina uyahihi una dewadewaya, naka pitenana Mose po tu bahapiko hai wiatatiyana anona.'

*Mateta dinadinana*  
(Luka 13:24)

<sup>13</sup> 'Ona wileta po mateta dinadinana uyahinei ona luilui ma ega mateta yawayawatana uyahinei ona luilui, naka tahaya teyateyana po lawa magomagouhi nugohi i waya ma uyahinei he nenaeanani kokoe uyahina wiyuwa e memae. <sup>14</sup> Ma tahaya dinadinana i witai ma matetana i dinadina, po lawa ega hita maga ma uyahinei he nenaeanani kokoe uyahina yautu tuwetuwenai.'

*Tu wiatatiyana koyakoyama hai dews*  
(Luka 6:43-44, 13.25-27)

<sup>15</sup> 'Tu wiatatiyana koyakoyama ona galena imahiyeji. Babana apo gehouhi hina nehi uyahimi po gagalenahi mei sipi malamalagamahi ma tamogi u nugonugohi mei kedewa woyahiyahihi. <sup>16</sup> Lawa hai ugo uyahihiyei apo ta galena tuhagahi. Apega gologolowa gowana

wine ugona donadona u tuyana una lohi po apeg  
sitaniya u toyana kiyaha ugona una lohi. <sup>17</sup> Mayau  
dewadewana ugona dewadewana, mayau kakai  
ugona apapoena. <sup>18</sup> Mayau dewadewana apeg  
ugona kakai ina houni ma mayau kakai apeg ugo  
dewadewana ina houni. <sup>19</sup> Inapa mayau ega hina  
ugugo imahi yaka apo Yaubada ina tala halehi  
po ina apuhi. <sup>20</sup> Yaka apo lawa dewadewahi  
po apapoehi ona galena tuhagahi hai bagibagi  
uyahihiyei.

<sup>21</sup> ‘Lawa hi maga duma uyahihie he  
kawakawaiguyau, ma tamogi atapuhi apeg  
hina lui Amau anani taniwaga uyahina, ma  
iyawoi tauhi Amau hoi yada a nugotuhu tu  
wiponawogogena tauhi tunawahie. <sup>22</sup> Iyeta he  
nenei uyahihie lawa magomaoguhi apo hina baha  
hina pa, “Guyau, Guyau, i bagibagi gowamgei to  
dewahi: to baha piko po alugo apapoehi to iyagahi  
po manini magomagouhi to dewadewahi.” <sup>23</sup> Ma  
apo a baha nae uyahihie ana pa, “Lolowa ega ata  
hanapugemi taumi tu bagibagi apapoehi ona  
nehaleu.”’

*Tu lunuma luwaga*  
(Luka 6:47-49)

<sup>24</sup> U wibaabani geka apo taumi iyawoi ona  
nonola imahiyeya po ona wiponawogogeya yaka  
apo taumi mei tu lunuma hanahanapuna po hoi  
gaima a numa amaka i wogoya. <sup>25</sup> Ma houga  
apapoena ina nei apo gadiwewe ina atuna po  
goila ina hopu ma togowa baneina ina togo mai  
numana uyahina ma apegia ina guli, matababana  
gaima u tepana i witowoli po i kadilili. <sup>26</sup> Apo

taumi iyawoi u wibaabani geka ega ona nonola imahiyeya po ega ona wiponawogogeya, yaka apo taumi mei tu lunuma buubuwana a numa hoi bubu i wogowogoya pite. <sup>27</sup> Ma hougana gadidawewe baneina ina atuna po goila hina hopu ma togowa baneina ina togo mai numana uyahina, yaka apo ina dubali po ina lugolugoluhi.'

<sup>28</sup> Yesu a wibaabani i wikkokowi ma lawa magomagouhi hi nugogohola duma a wiatatiyana binei, <sup>29</sup> babana a baha hi wipoya ipa lawa hina wotagoya, ma ega mei lugagayo tanitaniwagahi hai wiatatiyana.

## 8

*Yesu lepelo lawana i widewadewaya  
(Maki 1:40-45; Luka 5:12-16)*

<sup>1</sup> Yesu oyagei i hopu mai po bolu baneina hi wotagoya. <sup>2</sup> Ma lawa lepelepelona i nei Yesu uyahina po anai wiyateyatena i polou ma i baha i pa, ‘Guyau, inapa nugenugom yaka una luyawahiu.’

<sup>3</sup> Yesu nimana i lodomi po lawana i wodadani ma i pa, ‘Apo a luyawahim. Amaka ma una dewadewa.’ Mala emosi ma a lepelo i kokoe. <sup>4</sup> Yesu i baha nae lawana uyahina i pa, ‘Ega lawa gehouna una palipaliweleya, ma una nae tu witalaguyaba uyahihi po una bahena mem una pa, “Amaka a dewadewa” ma om ani’mbenena una houni mei Mose a lugagayo bukana uyahina i gilugilumi pite, po hina hanapugem tam amaka u luyagohana.’

*Gawiya taniwagana a witumagana  
(Luka 7:1-10)*

<sup>5</sup> Yesu i nei meyagai gehouna gowana Kapanueum ma Loma lawana tauna tu wigawiya tu galena itetehi i nei po i lubayadeya <sup>6</sup>i pa, ‘Guyau, u hewali gehouna a totogo i lata po i wiyuwa duma po hoi numa eneno ma ega emoemotana po ina widagudagu.’

<sup>7</sup> Yesu i baha nae uyahina i pa, ‘Apo a nehi po a widewadewaya.’

<sup>8</sup> Tu galena itetena i baha nae Yesu uyahina i pa, ‘Guyau, ega u dewadewa awai ipa a winim po una lui mai u numa u hinena tamogi baha yawa una baheya ma apo u hewali ina luyagohana. <sup>9</sup> Ma tau gasi witaniwaga gehouna a tu bagibagi po tu wigawiya u nimau hi hounihi po a gagalena itetehi. Ma apo tu wigawiya emosi uyahina ana pa, “Una nae,” ma e nae. Ma apo gehouna uyahina ana pa, “Una nei,” ma e nei. Ma gasi apo u tu bagibagi uyahina ana pa, “Geka una dewaya,” ma e dewaya.’

<sup>10</sup> Hougana geka bahahi Yesu i noonolihi po i goholi ma hi imulitagoya uyahih i baha nae i pa, ‘A baha duma uyahimi, yohola mi Isalaela u hinemi ega lawa awai a witumagana ata galeya po mei geka lawana. <sup>11</sup> A paliwelemi, kabudala anani geleta po anani yoli lawa magomagouhi hina nei po hina tugula gogona hoi ani am Yaubada anani taniwaga uyahina, Abelaham ma Isako po Yakobo mitehi. <sup>12</sup> Ma taumi Isalaela googana gehoumi anani taniwaga u hinena o memae apo ina wihulu hopunemi hoi tupo uguwa po tou ma omhanakidiyana ona tuhagaya.’

<sup>13</sup> Yesu tu wigawiya hai taniwaga uyahina i baha nae i pa, ‘Una nae om hewali apo ina

luyagohana om witumagana binei.’ Houga naka  
uyahina tu tootogona a kadidili i tuhaga meya.

*Yesu lawa magomagouhi i widewadewahi  
(Maki 1:29-34; Luka 4:38-41)*

<sup>14</sup> Yesu i nae Pita a numa uyahina po pohiyana  
i hinigugupouma i galeya hoi ani eno i eneno  
<sup>15</sup> yaka Yesu nimana i lodomi po wawinena i  
wogoya po a gupouma i kokoe, ma i towolo po i  
poulehi.

<sup>16</sup> Aipompom ma tu tootogo lawa hi neihinimai  
Yesu uyahina, tauhi alugo apapoehi i luiluinhi  
ma Yesu i galehi yaka i paliyehi po hi lowo ma  
gasi tootogohi i widewadewahi. <sup>17</sup> Geka dewahi  
hi gelegeleta naka tu bahapiko Isaiya a baha i  
limoineya. Geka pitenana a wibaabani i pa,  
‘Tauna ata wigwameyameya  
ma ata totogo witeihi ina awalihi.’

*Yesu lawa ipa hina wotagoya  
(Luka 9:57-62)*

<sup>18</sup> Naka hougana uyahina Yesu bolu banei du-  
mana hi mewiwileya ma i galehi, yaka a hewahe-  
wali i baha nae uyahihi po ipa wam uyahina hina  
gelu po hina woe damana u tupona. <sup>19</sup> Lugagayo  
taniwigana gehouna i nei Yesu uyahina po i  
baha i pa, ‘Bada, om nae atapuhu uyahihi ipa a  
wotagom.’

<sup>20</sup> Yesu i baha lawana uyahina i pa, ‘Gamog-  
amo mi pitepitena waidomohi po kiu moyanei  
waipatahi. Ma Lawa Moinau ega meka nawatatau  
ani wienona gehouha.’

<sup>21</sup> Yesu tu wotagona gehouna i nei uyahina po i lubayada i pa, ‘Guyau, una palihaleu po a nae amau a guluwa tahaeya ma apoma a wotagom.’

<sup>22</sup> Yesu a baha i wimiheya i pa, ‘Lawa hai luyaghana mei tu hilahilage una palihalehi po tu hilahilage uyahiji hina galena nae.’

*Yesu togowa baneina i palidumoli  
(Maki 4:35-41; Luka 8:22-25)*

<sup>23</sup> Yesu a hewahewali mitehi wam uyahina hi gelu po hi damadamana <sup>24</sup> po mala emosi ma togowa baneina hi wialoni po guletutu i huluugeleteya wam u hinena ma apo hita yoli. Ma Yesu amaka i eno hilage. <sup>25</sup> Yesu a hewahewali hi nei po hi limaamahi po i towolo ma hi pa, ‘Guyau, una luyawahita, kikina ma apo ta yoli.’

<sup>26</sup> Yesu i baha nae a hewahewali uyahiji i pa, ‘Awai binei o matomatouta? Omi witumagana hi habulu hota,’ ma i towolo po togowa ma guletutu i paliyehi po noka hougana dumola baneina.

<sup>27</sup> A hewahewali hi gohola dumahi ma tunawahi hi ibaabani hi pa, ‘Geka lawana iyai, po togowa ma guletutu he iponawogogeya?’

*Yesu alugo apapoehi i wiyangahi  
(Maki 5:1-20; Luka 8:26-39)*

<sup>28</sup> Galili bogana u tuponei dobu gowana Gadala apoma uyahina hi lugeleta. Hougana hi laugeleta lawa luwaga hi tuhangahi naka tauhi alugo apapoehi hi luinihi po kokowaga u domohi hi memae. Hai dewa hi apapoe duma po ega emoemotana lawa gehouna tupo noka uyahina tunawana ina nae. <sup>29</sup> Hai luwagahi Yesu hi galeya yaka hi otu hopu uyahina hi pa, ‘Yaubada Natuna tam. Awai

ipa una dewaya uyahiyai? Yohola ega libahibahi hougana ma ipa hiniwiyuwa una weliyai?’

<sup>30</sup> Ma polo boluhi hi banibani, ega balana ita dao Yesu uyahinei. <sup>31</sup> Ega yaka alugo apapoeahi Yesu uyahina hi lupali gonugonuwa hi pa, ‘Inapa una iyagiyai yaka to luhogaleya ipa una himiliyai po noka polohi uyahihi to lui.’

<sup>32</sup> Ega yaka Yesu i baha nae uyahihi i pa, ‘Ona hopu.’ Lawahi luwaga uyahihiyei alugo apapoeahi hi hopu po hi nae polo uyahihi po hi lui, ma polohi boluhi hi nohanoha mehi po hoi gubala hi holuholugehi hoi boga po hi halele atapuhi.

<sup>33</sup> Ma polo tu galena itetehi hi lowo po hi nae dobu baneina uyahina hi wibenabenama awai hi gelegeleta ma lawahi alugo apapoeahi hi luiluinihi ubeihi hi wibenabenama. <sup>34</sup> Ega yaka lawa atapuhi meyageina hi’mboina nae Yesu uyahina po hi galeya ma hi baha gonugonuwa uyahina po ipa tupo noka ina nehaleya.

## 9

*Yesu gwameyameya lawana i widewadewaya  
(Maki 2:1-12; Luka 5:17-26)*

<sup>1</sup> Yesu hoi wam i gelu po hi damana meme a dobu uyahina. <sup>2</sup> Bolu gehouhi lawa waigwameyameyana hoi ani eno hi neiyai Yesu uyahina. Hougana Yesu hai witumagana i galeya po i baha nae totogo lawana uyahina i pa, ‘Natuwe, om apapoe amaka a paligiglihi.’

<sup>3</sup> Yesu a wibaabani lugagayo tanitaniwagahi hi noonoli po tunawahi ma hi ibaabani hi pa, ‘Geka lawana Yaubada e idibogi.’

<sup>4</sup> Hai winugonugotuhu Yesu amaka i hanapugeya ega yaka i baha nae uyahih i pa, ‘Awai binei o inugonugotuhu powa? <sup>5</sup> Meka baha dewadewana ega ita ipilipili? Om apapoe a paligigili bo una towolo po una nae? <sup>6</sup> Apo uyahimi a limoineya naka tau Lawa Moinau, wipoya Yaubada i weleu po hoi hipuli apo apapoe a paligigili.’ Ega yaka i baha nae lawa waigwameyameyana uyahina i pa, ‘Una towolo po om ani eno una awali po una nae om meyagai uyahina.’ <sup>7</sup> Ega yaka lawana i wotowolo po i nae anu meyagai. <sup>8</sup> Ma bolu hi gagaleya po hi matouta duma ma Yaubada hi wotalagiyea po hi pa, ‘Nugote Yaubada a wipoya atapuna Yesu i weleya.’

*Yesu Matiu i otugeya  
(Maki 2:13-17; Luka 5:27-32)*

<sup>9</sup> Yesu tupo noka i nehaleya po i nenaem lawa gehouna gowana Matiu takisi tu tama anani bagibagi numana uyahina i tugutugula ma i galleya. Ega yaka Yesu i baha nae uyahina i pa, ‘Una wotagou.’ Matiu i towolo po Yesu i wotagoya.

<sup>10</sup> Houga naka uyahina Yesu mitehi hi tugula Matiu anu numa po hi’mam, ma takisi tu tama po tu apapoe po Yesu a hewahewali hi nei po mitehi hi’mam. <sup>11</sup> Ma Palisi lawahi Yesu hi gagaleya po ega yaka a hewahewali hi lubayadehi hi pa, ‘Awai binei omi tu wiatatiyana takisi tu tama po tu apapoe mitehi he yam gogona?’

<sup>12</sup> Yesu hai baha i noonoli po i baha nae uyahih i pa, ‘Lawa ega hita tootogo ega tu lumulamula nuginugohi ma tu tootogo tauhi nuginugohi tu

lumulamula. <sup>13</sup> Yaubada a baha hoi Buka hi gilugilumi o hanapugeya, bo eega? Geka pitenana hi baheya hi pa, “A luhogaleya lunugotootogo ma ega ata luhogaleya witalaguyaba.” Anenei ega ipa tu dewadumalu a otugehi ma tu apapoe a otugehi po hina nugobui.’

*Wiyohi lubayadana  
(Maki 2:18-22; Luka 5:33-39)*

<sup>14</sup> Yoni a hewahewali hi nei Yesu uyahina po hi lubayadeya hi pa, ‘Awai binei tauyai ma Palisi lawahi i tapalolo binei to iyohi ma tam om hewahewali mitehi o’mam?’

<sup>15</sup> Ma Yesu i’mpaliluwaluwa uyahih i pa, ‘Itapa tu tawine olotona a tawine tolehana uyahina tauna ita memae, moina apo a toumana hita iyohi? Apega. Tamogi iyeta he nenei apo tu tawine olotona a gawiya hina wihaleya ma noka iyetahi uyahih i apoma apo hina wiyo.

<sup>16</sup> ‘Ega iyai luilui wouna ita papaya po luilui odubona uyahina ita hilahilama lawiteya. Inapa ina dewaya yaka naka luiluina wouna amaka i wiapapoeya ma gasi apo gunalolona ina lata.

<sup>17</sup> Ma ega iyai wine wouna ita hiwohiwoga hopuneya tala gigoila gamogamo opihiyei hi dewadewaya odubona uyahina. Inapa ina dewaya yaka apo winena wouna ina hahana po tala gigoilana ina gunahaiya po wine ina kolologeya. Apega iyai ina dewaya. Tamogi wine wouna ipa tala gigoila wouna uyahina hina hiwohiwoga hopuneya po atapuna ina dewadewa pahi.’

*Yesu wiwine luwaga i widewadewahi  
(Maki 2:18-22; Luka 5:33-39)*

**18** Yesu i ibaabani ma taniwaga gehouna i nei uyahina po i polou ma i baha nae uyahina i pa, ‘Natuwe wawinena amalai i hilage. Ma a luhogalem ipa una nei po una wogodadani po ina luyagohana.’ **19** Yesu a hewahewali mitehi hi wotowolo po taniwagana hi wotagoya.

**20** Po hi nenaе ma wawinena gehouna tootogona, tauna a totogo naka tala i kolokololo bolima magouhi 12. Wawinena mulihiyei i nei po Yesu a kaleko mutuna i wodadani. **21** Matababana u nugonugona i lugeleteya i pa, ‘Apo Yesu a kaleko yawa a wogodadani yaka a luyagohana.’

**22** Hougana Yesu a kaleko i wodadani, ma i luhagawileya po i baha nae uyahina i pa, ‘Natuwe, una kaoha om witumagana i luyawahim.’ Mala emosi wawinena a dewadewa i tuhagaya.

**23** Yesu a hewahewali mitehi hi nae po taniwagana a numa uyahina hi geleta, po hi gagalena naka tu widilehu hi dilehu, hai nugowiyuwa binei ma hi tutou labalabatana. **24** Ega yaka Yesu i paliyehi i pa, ‘Atapumi tewela geka ona nehaleya po ona hopu hoi uputa; tewela geka ega ita hilage ma e’neno.’ Geka bahana uyahina ma lawa atapuhi hi winameya. **25** Bolu atapuhi numana hi hopu haleya ma Yesu i lui po tewelana u nimana i wogo ma i witowoli. **26** Ma u mulina Yesu tuwegana hi nohaya tupo atapuna uyahihi.

### *Yesu matakeke lawahi luwaga i widewadewahi*

**27** Yesu numa noka i nehaleya po tahayagei i nenaе ma tu matakeke luwaga hi wotagoya po hi ototu hi pa, ‘Yesu, Dawita gogana, apo uta lunugootogogeiyai.’

<sup>28</sup> Yesu numa u hinena i lui po i memae, ma tu matakekehi hi nei uyahina po i lubayadehi i pa, ‘O witumaganeu ipa apo matami a widewadewahi?’

Tauhi a baha hi wimiheya hi pa, ‘Guyau, to witumaganem.’

<sup>29</sup> Ega yaka matahi i wodadanihi ma i baha nae uyahihi i pa, ‘Omi witumagana binei apo matami hina lugiiigilihi.’ <sup>30</sup> Yaka matahi hi lugiiigilihi. Ma Yesu i lugagayogehi i pa, ‘Ega lawa gehouna uyahina ona bahebaheu.’ <sup>31</sup> Hai luwagahi hi nenaе po Yesu a baha ega hita wotagoya ma a bagibagi tuwegana hi deedeniyeya tupo atapuna uyahina.

### *Yesu badebade gehouna i widewadewaya*

<sup>32</sup> Yesu a hewahewali mitehi hi nenaе ma lawa gehouna menana alugo apapoena i wobuiya po ega ita ibaabani ma hi neiyai uyahina, <sup>33</sup> po Yesu i wiyagaya ma lawana i dewadewa meme po i ibaabani. Ma lawa boluhi hi kaoha duma po Yesu hi kawaidewedewaya po hi pa, ‘Ega kikina lawa gehouna a bagibagi tata galeya Isalaela u hinena geka pitenana.’ <sup>34</sup> Ma Palisi lawahi hi gagaleya po ega yaka hi baha hi pa, ‘Ega naka tauna a wipoyagei ita wobagibagi ma Tomodulele balau i weleya po uyahinei alugo apapoehi e iyagahi.’

### *Yesu lawa i galena lunugotootogogehi*

<sup>35</sup> Yesu dobu po meyagai uyahihi i wiwila nae, ma hai numa tapalolo uyahihi i iatatiyana, ma Yaubada anani taniwaga tuwegana i bahebaheya ma gasi tu tootogo magomagouhi i lauyawahih.

<sup>36</sup> Ma lawa boluhi i gagalehi po i lunugotooto-gogehi, babana witai atapuhi uyahihia ega kikina hai tu hagu gehouna, galenahi mei gamogamo hi nenebayababa ega hai tu galena itete.  
<sup>37</sup> Ega yaka Yesu a hewahewali i paliwelehi i pa, ‘Mahula i lauliligeya ma tu yaba luemoemotahi.  
<sup>38</sup> Uyahinei ona lupali mahula Guyouna uyahina po tu yaba gehouhi ina himilihi po hina nae mahula hina tuwaluhi.’

## 10

*Yesu a hewahewali gowahi  
(Maki 3:13-19; Luka 6:12-16)*

<sup>1</sup> Yesu a hewahewali magouhi 12 i otugehi po wipoya i welehi, po apo alugo apapoehi lawa uyahihia hina iyagahi ma totogo galenahi tapuhi po tapuhi hina luyawahihi.

<sup>2</sup> Geka a hewahewalihi magouhi 12 i wigowahi po tu wituwetuwega, lawa tahatahayana Simona tauna gowana hi buiya po Pita, ma walehina Andulu, ma Yamesa ma walehina Yoni tauhi Sebedi natunatuna. <sup>3</sup> Pilipo ma Batolomiu, Tomasi ma Matiu tauna takisi tu tama ma gasi Yamesa gehouna tauna Alipi natuna ma Tadiyesi, <sup>4</sup> ma Simona gehouna tauna tu’mgudugudu mi Loma hai ani taniwaga uyahinei, ma Yudasa Isakaliyota Yesu tu nugohalenana.

*Yesu a hewahewali hai bagibagi  
(Maki 6:7-13; Luka 9:1-6)*

<sup>5</sup> Yesu a hewahewali magouhi 12 i himihimilihi ma hai lugagayo i paliwelehi i pa, ‘Tauhi ega mi Yudeya uyahihia ega ona nena, po gasi

Samaliya meyageihi uyahiji ega ona luilui. <sup>6</sup> Ma ata lawa mi Isalaela uyahiji ona nae, babana tauhi galenahi mei gamogamo weluwelupowahi <sup>7</sup> po uyahiji ona wipaliwelena ona pa, “Kikina ma Yaubada a taniwaga ina geleta uyahita po ina taniwageta!” <sup>8</sup> Tu tootogo ona widewadewahi po mei gasi hilahilagehi ona witowolo mehi, ma gasi tu lepelo ona liyeuyeuh. Ma alugo apapoehi lawa u nugenugohi ona wiyagahi. Yaubada a manini i weleyababami yaka taumi gasi lawa uyahiji ona hagu yababa. <sup>9</sup> Omi kadau binei ega mone, kina bo toea, ona pohapohahi omi outu u hinena. <sup>10</sup> Omi kadau binei geka ginoulihi ega ona tamitamih, omi outu, omi kaleko wiluwagana, oma ae humahuma po gasi omi digona, matababana tu bagibagi apo a iligona ina tuhagaya.

<sup>11</sup> ‘Hougana dobu po meyagai uyahiji ona luilui ona lubayada tahaya po lawa awai a dewa wodewadewana ina baha uyahimi, yaka ona lui a numa u hinena po ona memae a sigana omi houga omhoe yaka apoma ona nehaleya. <sup>12</sup> Hougana ona luilui numa u hinena yaka ona wimaamala tahaya lawana uyahina ona pa, “Yaubada a nungodumola mitehi ona memae,” ma apoma ona lui. <sup>13</sup> Apo gugunihi omi baha wimaamala ina linanahi yaka omi wimaamala ina memae, ma inapa ega ina linanahi yaka omi baha wimaamala ina gunawilena meya uyahimi. <sup>14</sup> Ma inapa lawa ega hina kaohem po omi baha hina nonoli. Yaka naka meyagaina bo numana ona nehaleya. Ma ona nenaehougana aemi dubudubuna ona lihooholi u matahi. <sup>15</sup> A baha duma uyahimi,

Libahibahi Iyetana uyahina apo hai wiyuwa ina lata duma ma mi Sodom ma mi Gomola hai wiyuwa ina habulu.'

*Wiyuwa houga u matata binei*  
*(Maki 13:9-13; Luka 21:12-17, 12.2-9)*

<sup>16</sup> 'Tau a himihimilimi gagalenami mei sipi, ma kedewa woyahiyahihi u hayahi o nenaе, yaka ipa ona nugohanahananapu po mei mota, ma ona nugohegoya po mei bunebune. <sup>17</sup> Ma lawa ona galena imahiyehi, babana tauhi apo hina niyemi po hina libahibahimi hai omboina uyahidi ma hai numa dalabu uyahidi apo hina wilawimi. <sup>18</sup> Ma gowau binei apo hina niyemi taniwaga po wasawasa baneihi uyahidi. Ma naka omi gaogao apo tuwega dewadewana ona nohaya tu meuputa u matahi. <sup>19</sup> Hougana apo hina panimi po hina niyemi libahibahi binei ega ona genogeno ipa apo awai ona baheya uyahidi. Yaubada tauna apo omi baha ina woogeleteya u nuponugomi, <sup>20</sup> babana awai o bahebaheya ega tunawami, ma Amami Alugona apo ina wiatatiyemi omi wibaabani uyahidi.

<sup>21</sup> 'Houga noka uyahina lawa apo gugunihi yawa apo hina igawigawiya biugei po walehina ina palihaleya po hina lihilageni. Mei gasi lawa natuna apo ina nugohaleya po hina lihilageni ma logaloga amamahi po hinahinahi hina palihalehi po hina lihilagenihi. <sup>22</sup> Apo gowau binei ma lawa atapuhi hina wihinigigiyemi. Ma apo taumi iyawoi on'omtaibagibagi ma ona towolo kandidili po a sigana houga anani kokoe uyahina yaka apo luyagohana ona tuhagaya. <sup>23</sup> Apo dobu

awai uyahina wiyuwa hina welewelemi yaka ona lowo nae dobu gehouna uyahina. A baha duma uyahimi Isalaela dobuna atapuna apegaa ona wikkokowi ma tau Lawa Moinau apo a gunawilena meu.

<sup>24</sup> ‘Tu lunonola a tu wiatatiyana apegaa ina gelagoni. Mei gasi tu bagibagi a bada apegaa ina taniwageya. <sup>25</sup> Taumi tu wotagotagou apegaa ona gelagoniu geka amaka omi dewa ipa mei u dewa. Lawa hi igowau hi pa tau Tomodulele yaka apo gasi hina wigowami po Tomodulele a lawa.

<sup>26</sup> ‘Lawa ega ona matumatutehi, babana ginouli awai humahumana apo ina lugeleteya, bo gowagowadana apo lawa hina hanapugeya. <sup>27</sup> Awai hoi uguwa a bahebaheya apo hoi yayata lawa ona paliwelehi, ma awai a iyaguhayahayageya dobu atapuna ona iototugeya.

<sup>28</sup> ‘Iyawoi hinimi hin’ununi ega ona matumatutehi babana alugomi apegaa hina lihilagenihi. Ma tamogi Yaubada ona matuteya, babana emoe-motana apo hinimi po alugomi mayau alalatana uyahina ina houni. <sup>29</sup> Kiu muhomuhohi luwaga mihahi 10 toea tamogi Yaubada e gagalena itetehi po gehouna ina hilage naka Amami hoi yada a nugotuhugei. <sup>30</sup> Ma gasi ununumi apala atapuhi Yaubada i hiyawa pahi. <sup>31</sup> Yaka ega ona matomatouta, taumi o geduma ma apoma kiu boluhi.

<sup>32</sup> ‘Iyai bolu u matahi ma ina bahena geleteu naka tau e itumaganeu yaka tau Amau hoi yada u matana apo tauna a bahena geleteya. <sup>33</sup> Ma iyai ina bowiyeu bolu u matahi yaka tau Amau hoi yada u matana apo tauna a bowiyeya.’

*Ega witulatulana tunawana Yesu ita neiyai ma gawiya gasi  
(Luka 12:51-53, 14:26-27)*

<sup>34</sup> ‘Omi nugotuhu o pa nugodumola ata neiyai hoi hipuli, bo? A paliwelemi, eega. Ega nugodumola ata neiyai ma tamogi gawiya. <sup>35</sup> Tau amaka a nei yaka apo wikahakaha ina wawala.

Apo lawa natuna olotona ina towolo po amana ina wigawiyeya.

Apo natuna wawinena ina towolo po hinana ina wigawiyeya.

Pohiyana wawinena apo ina towolo po pohiyana wawinena ina wigawiyeya.

<sup>36</sup> Po gasi lawa a guguni dumahi apo hina wigawiyeya.

<sup>37</sup> ‘Apo lawa awai amana ma hinana ina luhogalena dumahi ma tau tupo hotana tauna ega emoemotana po ina wotagou. Ma apo lawa awai natuna olotona bo wawinena ina luhogalena dumahi ma tau tupo hotana naka lawana ega emoemotana po ina wimulitagou. <sup>38</sup> Apo iyai anani take ega ina awali po ina wotagou tauna ega emoemotana po ina wotagou. <sup>39</sup> Apo lawa awai a luyagohana ina nugoneya yaka apo ina haleya ma apo iyawoi tau biugei hina hilage yaka apo yautuhi hina tuhagahi.’

*Maiha binei  
(Maki 9:41)*

<sup>40</sup> ‘Apo lawa awai ina kaohem i yaka naka tau i likaohau po tu himiliu i likaohaya. <sup>41</sup> Apo lawa awai tu bahapiko ina likaohaya babana tauna tu bahapiko yaka a meiha ma tu bahapikona a

meiha emoemotahi. Ma apo lawa awai tu dumalu lawana ina likao haya babana tauna tu dumalu po una yaka a meiha ma tu dumaluna a meiha emoemotahi. <sup>42</sup> Apo tu witumaganeu wouna uyopopona ina haleya po ina nei uyahim ma goila wayowayouna una weleya, babana e wotagou a paliwelem tam meiha apo una tuhagaya.'

## 11

*Yoni bapatiso Yesu tuwegana i nonoli*

*(Luka 7:18-35)*

<sup>1</sup> Yesu a hewahewali magouhi 12 uyahihia a wiatatiyana i wifikowi, ma tupo noka i nehaleya po i wiwilia tupo emosi po emosi uyahihia ma i guuguya.

<sup>2</sup> Houga naka uyahina Yoni tu wibapatiso amaka hi houna luiyeya hoi numa panipani, ma Keliso a bagibagi tuwegana i nonoli ma ega yaka a hewahewali i himilihi po hi nae Yesu uyahina po hi lubayada, <sup>3</sup> hi pa, ‘Tam iyai? Besinana lawana bimgei to iotonana ipa apo una nenei bo ega tam ma lawa gehouna to iotonaneya?’

<sup>4</sup> Ega yaka Yesu hai lubayadana i wimihena meya i pa, ‘Awai o gagalehi po o noonolihi ona gunawilemi po Yoni ona paliweleya. <sup>5</sup> Tu matakeke he gagalena imahi po tu aeapapoe he neneimahi po lepelo lawahi he wodewadewa meme po tu tanigapupu he launonola po lawa hilahilagehi hi towolo meme po tu dayadayabu tuwega dewadewana he noonoli. <sup>6</sup> Iyai ega ita inugomagomagougeu tauna a kawaidewedeweya.’

<sup>7</sup> Yoni a hewahewali hi gunawilena mehi po hi memae, ma Yesu i wiwawala po bolu uyahihia

i ipaliwelena Yoni binei i pa, ‘Hougana o nenaе hoi balabala yabayababa Yoni uyahina omi nugotuhu ipa awai ona galeya? Ega togowa didiyala ita kwadikwadiyeya ma ota galeya. <sup>8</sup> Ma omi nugotuhu ipa awai ona galeya? Ega ipa lawa a wihiya gegena, bo? Babana lawa noke pite hai wihiya po hai wigapola naka tauhi wasawasa hai u numa he tugutugula. <sup>9</sup> Ona paliweleu awai ipa ona galeya? Tu bahapiko, bo? Moina tauna tu bahapiko tamogi tu bahapiko atapuhi i gelagonihi. <sup>10</sup> Matababana Yaubada a Buka uyahina tauna binei hi baha i pa,

“Apo u tu winoyanoya a himila tahaeyem  
po om tahaya ina wononogogeyea.”

<sup>11</sup> A baha duma uyahimi, ega meka lawa hita guni po a gae mei Yoni bapatiso. Tamogi Yaubada anani taniwaga uyahina iyawoi hina idayadayabu tauhi hi geduma ma apoma Yoni. <sup>12</sup> Yoni bapatiso a houga uyahina ma i nei po amalai tu kadidili hai kadidiliyei Yaubada anani taniwaga he luiluiya. <sup>13</sup> Odubona tu bahapiko atapuhi hai wibaabani po gasi Mose a lugagayo uyahihiyei Yaubada anani taniwaga hi wogeleteya anani kokoe Yoni i nei. <sup>14</sup> Ma Yoni a nei mei tu bahapiko odubona i bahebaheya Guyau ina nenei apo Elaisiya ina tahaya, ma o luhogaleya ipa ona hanapugeya. A paliwelemi Elaisiyana naka tauna Yoni. <sup>15</sup> Apo uyahimiyei lawa awai waitanigana yaka baha geka ina nonola imahiyeya.

<sup>16</sup> ‘Lawa geka hapanana apo awai uyahina a wiluweluwena niyehi? Po galenahi awai? Tauhi

mei logaloga ani gimala meyageina uyahina he tugula ma he yampalidamadamana he pa,

**17** “Ubeimi to lauinainaga ma ega ota hala.

Ma to tutou ma ega ota tou haguiyai.”

**18** Ma Yoni i nei naka a omhilagena po ega wine ita umaya ma lawa hi ibaabani hi pa, “Tauna alugo apapoena u hinena.” **19** Tau Lawa Moinau a nenei anai omniu po anai umau po lawa hi pa, “Geka lawana ona galeya, tauna tu’mlabatana po tu umabuubuuwa po a lawa takisi tu tama po tu apapoe.” Tamogi Yaubada a hanapu bagibagi dewadewana uyahina naka hanapu moinana.’

*Dobu apapoehi gehouhi apo libahibahi hina tuhagaya*

(*Luka 10:13-15*)

**20** Dobu gehouhi uyahihhi Yesu a manini hi galeya ma ega hita nugobui yaka i paliyehi i pa,

**21** ‘Kihoni Kolasini tu nugodubu lawami. Kihoni Besaida tu nugodubu lawami. Itapa manini u hinemi hi dewadewahi u Taya po u Saidoni hita dewahi amaka lolowa lawahi hita nugobui. Ma hai nugobuina apo hita wogeleteya po kaleko apapoehi hita otena ma hita lugobu. **22** Tamogi Libahibahi Iyetana uyahina apo Yaubada Taya ma Saidoni ina lunugotootogogena dumahi ma apoma taumi. **23-24** Ma taumi Kapaneum lawami omi nugotuhu o pa ona wohepa memi po ona gae hoi yada, bo? Apo Yaubada ina halena hopunemi mayau alalatana uyahina. Ma mi Sodom hai libahibahi ina habulu babana itapa odubona mi Sodom u manini hita galeya, apo hita nugobui po apegia Yaubada ita hamaga halehi.’

*Wiyagohina Yesu uyahina  
(Luka 10:21-22)*

<sup>25</sup> Naka houganana Yesu i baha i pa, ‘Amau yada po hipuli hai Guyau, a wotalagiyem babana lawa hanahanapuhi po wainugonugotuhi uyahihai awai u gowagowadi naka tu winugoneina uyahihai u wogeleteya. <sup>26</sup> Moina Amau geka pite ipa om lunugotootogoge ina wawala.

<sup>27</sup> ‘Amau ginouli atapuhi i weleu. Ega iyai tau ita hanapugeu ma Amau tunawana. Gasi ega iyai Amau ita hanapugeya, ma tau Natuna po iyawoi a inaganihi uyahihai Amau a woogeleteya tunawiyai to hanapugeya.

<sup>28</sup> ‘Taumi iyawoi omi awala po omi bagibagi hina witai, yaka ona nei uyahiu po apo alugomi wiyagohina hina tuhagaya, <sup>29-30</sup> po u bagibagi ona dewaya babana u bagibagi awalana i teyateya gasi u memae ona lubuya po alugomi wiyagohina hina tuhagaya, matababana tau u dewa nugohe-goya ma nugohopuhopu.’

## 12

*Yesu dalabu taniwagana*

<sup>1</sup> Hoi dalabu Yesu a hewahewali mitehi yaniyani mei pegapega tanona tipolinei hi nena po am hi hilage yaka pegapega ugohi hi'mgomugomu po hi'mam. <sup>2</sup> Ma Palisi lawahi hi galehi yaka Yesu hi paliweleya hi pa, ‘I lugagayo i baheya ipa ega hoi dalabu to wobagibagi, ma iyowai po om hewahewali geka pite he dewadewaya?’

<sup>3</sup> Ega yaka Yesu i paliwelehi i pa, ‘Dawita po iyawoi tauna mitehi am hi hilage ma awai i dewadewaya o hiyawi, bo eega? <sup>4</sup> Tauna i lui po Yaubada a numa u hinena palawa wailugagayona i waya po i ani ma a hewahewali i welewelehi. Tamogi ata lugagayo i baheya ipa ega iyai ina anani ma tu witalaguyaba tunawahи. <sup>5</sup> Ma Lugagayo bukana u hinena giluma e memae i pa, dalabu iyetana uyahihi tu witalaguyaba he wobagibagi po dalabu lugagayona he lagolagoni naka ega genona po gasi ega apapoena. <sup>6</sup> A baha uyahimi lawa gehouna u hayami e memae tauna numa dalabu i gelagoni. <sup>7</sup> Yaubada a baha ega ota hanapugeya i pa, “Talaguyaba ega ginouli baneina ma lunugotootogo naka ginouli baneina.” Yaka ega u hewahewali ona igouhi. <sup>8</sup> Tau Lawa Moinau dalabu taniwaganan.’

*Lawa nimana wogiyogiyona  
(Maki 3:1-6; Luka 6:6-11)*

<sup>9</sup> Yesu i nae po hai numa tapalolo uyahina i lui, <sup>10</sup> po lawa nimana wogiyogiyona i memae ma i galeya ega yaka tanitaniwaga hi lubayadeya hi pa, ‘Emoemotana apo dalabugei lawa tata widewadewahi?’ Hai lubayada babana ipa iyowai ma Yesu hina wigouya.

<sup>11</sup> Ega yaka Yesu hai baha i wimiheya i pa, ‘Iyowai taumi apo lawa gehouna a gamogamo emosi hota iyeta dalabu uyahina ma ina peu hoi domo apo ina wihalena meya, bo eega? Nugote apo ina haguya. <sup>12</sup> A paliwelemi gamogamo ginouli habuluna ma lawa geka ginouli baneina yaka

iyeta dalabu uyahina emoemotana apo lawa ta widewadewaya.'

<sup>13</sup> Yesu lawana i paliweleya i pa, 'Nimam una lodomi,' ega yaka lawana nimana i lodolodomi po i dewadewa po mei nimana gehouna. <sup>14</sup> Palisi lawahi hi nehaleya po hi wiwogatala hi pa, 'Apo iyowai ma Yesu ta lihilageni?'

### *Yaubada a tu bagibagi*

<sup>15</sup> Ma hai wiwogatala gowagowada Yesu amaka i hanapugeya, ega yaka tupo noka i nehaleya po i nae tupo gehouna uyahina ma lawa boluhi hi wotagoya po hai totogo i widewadewa mehi. <sup>16</sup> Ma i paliwelehi i pa, 'Ega ona palipaligeleteu lawa uyahihhi.' <sup>17</sup> A bagibagi geka hi gelegeleta matababana Yaubada a baha Isaiya i bahebaheya i pa,

<sup>18</sup> 'Ona galeya u tu bagibagi a winagani.

Tauna u ani kaoha po u ani luhogala.

Alugou a hiwoga haleya uyahina

po dewa dumadumaluna ina wituwe-tuvegeya lawa magomagouhi uyahihhi.

<sup>19</sup> Tauna ega emoemotana po ina wogalahi

po gasi apega in'omlahalaha uheiya lawa ponana apega hina nonoli.

<sup>20</sup> Tu tapitapiya apega ina wihinigigiyeji,

tu lunugoluwaluwaga hai yayata apega ina bohoya,

a siga a taniwaga dumadumaluna ina kadidili,

<sup>21</sup> po tauna gowanei hipuli atapuna hai luhogala hina wialona imahiyeya.'

*Yesu a wibaabani Tomodulele binei  
(Maki 3:20-30; Luka 11:14-23)*

**22** Lawa gehouna alugo apapoehi matana hi likekeya po menana hi wobuiya po ega ita ibaabani, ma hi neiyai Yesu uyahina po i widewadewaya ma i wibaabani imahi ma gasi i galena meme. **23** Lawa magomagouhi hi goholo dumahi po ega yaka hi ibaabani hi pa, ‘Nugote geka Besinana lawana tauna Dawita gogana?’

**24** Palisi lawahi tuwegana hi nonoli po tunawahi ma hi ibaabani hi pa, ‘Palouma hai bada Tomodulele Yesu balau i weleya po uyahinei alugo apapoehi e iyagahi.’

**25** Yesu hai winugonugotuhu amaka i hanapugeya yaka uyahih i baha i pa, ‘Apo ani taniwaga gehouna u tipolina ina gunakahaya po hina igawigawiyena mehi apo hai mae ina apapoe. Mei gasi apo guguni emosi ma ina gunakahaya po hina igawiyena mehi apegia hina towolo kadidili. **26** Uyahinei ma inapa Tomodulele anani taniwaga ina gunakahaya po bolu ina luluwageya po hina igawigawiyena mehi apo iyowai a kadidili galenana. **27** Taumi o baha o pa, Tomodulele a wipoya uyahinei a wobagibagi po alugo apapoehi a iyagahi, yaka taumi omi lawa iyowai he iyaga. Tauhi uyahihiyei nugotuhu dumaluna apo ona tuhagaya. **28** Tamogi inapa Yaubada Alugona uyahinei alugo apapoehi ana iyagahi yaka Yaubada anani taniwaga amaka i nei uyahimi.

**29** ‘Ani galena gehouna ipa a paliwelemi, ega emoemotana lawa kadikadidilina a numa ta luiya po a gapola ta danenehi. Inapa numana taniwagan ta womomohi po aena ma nimana ta panipanihi yaka apo ta lui a numa u hinena po a gapola ta danenehi.

**30** ‘Iyai ega tau miteu yaka tauna e igawiyeu. Ma iyai ega tau miteu to nugoemota yaka tauna tu’mnoha. **31** Uyahinei a paliwelemi lawa hai apapoe po gasi hai baha woapapoehi atapuhi Yaubada apo ina paligiglihi. Ma Alugo Woiyawa uyahina ta baha apapoe ega emoemotana po ita apapoe ina paligiglihi. **32** Apo lawa gehouna ina baha apapoe tau Lawa Moinau uyahiu yaka apo Yaubada ina paligigli. Tamogi iyai Alugo Woiyawa ina paliguyoguyougeya yaka geka hougana po houga he nenei uyahihu tauna apega Yaubada ina paligigli.’

*Mayau ma ugona  
(Luka 6:43-45)*

**33** ‘Mayau dewadewana ugo dewadewana e ugugogeya, ma mayau kakai ugo apapoena e ugugogeya. Yaka ugo emosi po emosi uyahinei apo ta galena tuhagaya. **34** Taumi tu apapoe mei mota natunatuna, yaka ega emoemotana po baha dewadewahi ona bahehi, babana taumi tu apapoe po omi winugonugotuhu u nugonugomi he memae naka tauhi gamomiyei o bahebahena geletehi. **35** Lawa dewadewana u nugonugona ginouli dewadewahi he memae apo ina hauhopunehi. Ma lawa apapoena u nugonugona ginouli apapoehi he memae apo ina hauhopunehi. **36** A paliwelemi iyeta libahibahi uyahina lawa hai baha apapoehi atapuhi ubeihi Yaubada apo ina lubayadehi po anohi hina bahena geletehi. **37** Omi baha uyahihiyei Yaubada apo ina kawaiidewedewemi, ma omi baha uyahihiyei Yaubada apo ina kawaiapapoenimi.’

*Yesu a manini  
(Maki 8:11-12; Luka 11:29-32)*

<sup>38</sup> Palisi lawahi po lugagayo tanitaniwagahi Yesu hi lubayadeya hi pa, ‘Bada, to luhogaleya ipa om manini wekiwekilalana una dewaya po to galeya.’

<sup>39</sup> Yesu i baha nae uyahihi i pa, ‘Taumi geka hapanana hapa apapoena po matami hi maga. Omi luhogala ipa manini Yaubada uyahimi ina woogeleteya. Tamogi apegia manini gehouna ina wogeleteya uyahimi ma wekiwekilala tu bahapiko Yona i woogeleteya tunawana. <sup>40</sup> Babana Yona tauna iyana baneina i lumehaya po u koibana i memae iyeta tonuga ma ididibala tonuga, mei tau Lawa Moinau apo iyeta tonuga ma ididibala tonuga hipuli ina lumehau po u hinena a memae. <sup>41</sup> Libahibahi Iyetana uyahina apo Ninewa lawahi hina towolo po hina wigoumi. Matababana Yona a guguya hi noonoli po hai apapoe hi palihalehi. Ma a paliwelemi, geka hosi lawa gehouna i geduma ma apoma Yona. <sup>42</sup> Tupo yawana hai wasawasa wawinena apo Libahibahi Iyetana uyahina ina towolo po ina libahibahimi. Matababana hipuli anani kokoe uyahina ma i nei po Solomona a wiatatiyana hanahanapu i nonoli. Ma a paliwelemi, geka hosi lawa gehouna i geduma apoma Solomona.’

*Alugo apapoena a gunawilana  
(Luka 11:24-26)*

<sup>43</sup> ‘Hougana alugo apapoena lawa ina hopu haleya naka dobu ega ita igoila e yayahi po e nena e ani wiyaghina e bibeihha. Ma inapa ega emosi

ina tuhagaya <sup>44</sup> yaka apo tunawana ina baha ina pa, “Apo a gunawilena meu u numa a nenehaleya uyahina.” Ma hougana i gunagunawileya po numana kokoena po yeuyeuna po ginouli hi houna imahiyeji ma i galeya. <sup>45</sup> Yaka apoma apo ina nae po alugo apapoe dumahi magouhi 7 ina weluwinihi po hina lui po noka hosi hina mae. Uyahinei mehougana hina meyato po ina kokoe yaka naka lawana a mae apo ina apapoe duma ma apoma lolowa. Galenana mei geka taumi happanana apo omi apapoe hina lata lagona duma.’

*Yesu hinana ma walewalehina  
(Maki 3:31-35; Luka 8:19-21)*

<sup>46</sup> Yesu bolu uyahihi i ibaabani ma walewalehina hinahi mitehi hi nei po hoi uputa hi towolo ma hi laubayadeya, hai luhogala ipa mitehi hina wibaabani. <sup>47</sup> Ega yaka lawa gehouna i nae po Yesu i paliweleya i pa, ‘Walewalehim hinami mitehi hi luhogalem ipa ona wibaabani.’

<sup>48</sup> Yesu lawana a baha i wimiheya i pa, ‘Hinau iyai? Ma walewalehiu iyawoi nawa?’ <sup>49</sup> Ega yaka tu wotagona atapuhi i winimayoyogehi i pa, ‘Geka taumi hinahinau ma walewalehiu. <sup>50</sup> Matababana apo iyai Amau hoi yada a nugotuhu ina dewadewaya naka tauna walehiu po nouwe po hinau.’

## 13

*Pehi tu liholina  
(Maki 4:1-9; Luka 8:4-8)*

<sup>1</sup> Noka iyetana uyahina Yesu numa hinenei i hopu po i nae boga u liyaliana po i memae.

<sup>2</sup> Ma bolu baneina hi'mboina mai uyahina ma ega yaka wam uyahina i gelu po i tugula imahi ma bolu hoi dedeyani hi towotowolo, <sup>3</sup> ma ega yaka baha wiluwaluwagei ginouli magomagouhi i wiatatiyehi i pa, ‘Tu lupehi i nae a tano uyahina po a pehi polahi i nohanohahi. <sup>4</sup> I ihulu po pola gehouhi hi peu tahaya u liyaliiyana ma kiu hi nei po hi anih. <sup>5</sup> Ma pola gehouhi hi peu dobu waigaigaimana uyahina po hi laha yagiyaginehi babana hipulina ega ita potopoto. <sup>6</sup> Ma kabudala a houga lalana uyahina mala emosi ma hi kokodila, babana dedehi ega hipuli dewadewana hita tuhagaya. <sup>7</sup> Ma pola gehouhi hiyamoni waidonadonana u hayahi hi peu po hougana hi lahalahahi naka donadona i numa panipani unihi. <sup>8</sup> Ma pola gehouhi hipuli dewadewana uyahina hi peu po hi lata po hi ugo. Hai houga ugo naka gehouhi hi ugo labatana ma gehouhi ega hit'ugo duma ma gehouhi ega hit'ugo imahi. <sup>9</sup> Taumi iyawoi waitanigami yaka ona launonola.’

*Awai binei Yesu i bahabaha wiluwaluwa  
(Maki 4:10-12; Luka 8:9-10)*

<sup>10</sup> Yesu a hewahewali hi nei uyahina po hi lubayadeya hi pa, ‘Awai binei bolu uyahihi baha wiluwaluwagei u wiatatiyehi?’

<sup>11</sup> Yesu hai baha i wimiheya i pa, ‘Taumi Yaubada anani taniwaga baha gowagowadana i lugeleteya uyahimi. Ma geka boluhiji baha wiluwaluwa geka hi nonoli ma anona ega hita hanapugeya. <sup>12</sup> Matababana iyai uyahina awai dewadewana e memae apo Yaubada ina luwitani

tauna uyahina yaka luwitana baneina ina tuhagaya. Ma iyai uyahina ega ginouli gehouna ita memae, awai habuluna e memae apo Yaubada ina wihaleya. <sup>13</sup> Geka binei ma baha wiluwaluwagei a iatatiyana babana

“Apo hina ihalugeya ma apegahina galena tuhaga po apo hina lutanihana ma apegahina hanapugeya.”

<sup>14</sup> Uyahinei ma odubona Isaiya baha i bahebaheya i lugeleteya i pa,

“Apo ona nonoli ma tamogi apegahina hanapugeya.

Apo ona galeya ma tamogi apegahina hanapugeya.

<sup>15</sup> Matababana lawahi tanigahi hi pota,

po palihi hi bagibagi,

yaka apegahina tanigahiyei hina nonoli

ma matahi hi keke

po apegahina galeya

ma u nuponugohi apegahina lugiihili,

yaka apegahina nugobui

po a wiluyagohanihi.”

<sup>16</sup> ‘Ma taumi ona kaoha duma babana matamiyei o galeya ma tanigamiyei o nonoli.

<sup>17</sup> A baha duma uyahimi, naka awai o gagalehi tu bahapiko po tu dewadumalu odubohi hai luhogala ipa hina galehi ma ega hita galehi. Ma awai o noonolihi hai luhogala ipa hina nonolihi ma ega hita nonolihi.’

*Yesu a wiatatiyana pegapega polana baha wiluwaluwana binei*  
*(Maki 4:13-20; Luka 8:11-15)*

**18** ‘Pehi tu wihuluna baha wiluwaluwana anona ona nonoli. **19** Apo lawa awai Yaubada anani taniwaga bahana ina nonoli ma ega nugonugona ina lugiigili naka galenana mei Tomodulele i nei po bahana u nugonugona i wihaleya, bahana anona naka pola hoi tahaya hi pipeu. **20** Ma pola dobu waigaigaimana uyahina hi pipeu naka anona iyai amaka anai kaohana Yaubada a baha i nonoli, **21** tamogi ega dedena uyahinei ma e itumagana po ega daona ma witai po pilipili i wialonihi naka amaka e peu. **22** Ma pola hiyamoni waidonadonahi u hayahi hi pipeu anona naka iyai amaka Yaubada a baha i nonoli ma tamogi hipuli genona ma gapola wasawasahi nugona i waya po bahana ega ita luhogaleya yaka ega emoemotana po ugona ina houni. **23** Ma pola hipuli dewadewana uyahina hi pipeu anona naka lawa tauhi baha hi nonoli po hi hanapugeya yaka apo hin’ugugo. Gehouhi hi ugo labatana ma gehouhi ega hit’ugo duma ma gehouhi ega hit’ugo imahi.’

### *Pehi apapoena baha wiluwaluwana*

**24** Yesu baha wiluwaluwa gehouna i paliwelehi i pa, ‘Yaubada a taniwaga galenana mei lawa gehouna a pehi dewadewana i nae po a tano uyahina i ugohi. **25** Ma uguwei i eneno ma upom bolinai a gawiya lawana i nei po a tanona uyahina pehi apapoena i ugohi ma i nehaleya po i nae. **26** Ma hi laha gogonehi po hi lata apoma ugohi gagalenahi uyahihiyei ma hi galena tuhagahi.

**27** ‘Ega yaka badana a tu bagibagi hi nae po hai taniwaga hi paliweleya hi pa, “Bada, lolowa pehi dewadewana u nei po ugohi om tano uyahina, ma

iyowai po pehi apapoehi mitehi hi laha gogonehi po hi lata?"

**28** 'Ma tano taniwagana i paliwelehi i pa, "Nugote u gawiya gehouna i nei po i ugohi."

'Ega yaka a tu bagibagi hi baha nae hi pa, "Iyowai, apo pehi apapoehi to hapuhapuhalehi?"

**29** 'Ma hai badana i baha i pa, "Amaka ma hina lata gogona babana apo ona'mhapuhapu po pehi dewadewahi mitehi ona hapu gogonehi.

**30** Ma houga omlohi hougana uyahina tu bagibagi apo a paliwelehi po pehi apapoehi hina hapuhapuhalehi ma hina lugogonihi po hina apuhi, ma pehi dewadewahi hina tuwaluhi po hina houna luiyehi hanali u hinena." ,

*Ihagila polana baha wiluwaluwana*  
*(Maki 4:30-32; Luka 13:18-19)*

**31** Baha wiluwaluwa gehouna i paliwelehi i pa, 'Yaubada anani taniwaga galenana mei lawa ihagila polana e waya po a tano uyahina e ugohi.  
**32** Ma ihagilana polana i habulu duma ma a houga lata uyahina i wimayau baneina po i lata lagona ma kiu he liya mai uyahina po hai pata he wogowogohi.'

*Ani lihaahana baha wiluwaluwana*  
*(Luka 13:20-21)*

**33** Baha wiluwaluwa gehouna i paliwelehi i pa, 'Yaubada anani taniwaga galenana mei palawa ani lihaahana wawine e waya po palawa humahi tonuga uyahihi e houna hopunehi. Ma e mudamudaya po palawana atapuna e hahaha pahi.'

*Awai binei Yesu i bahabaha wiluwaluwa  
(Maki 4:33-34)*

<sup>34</sup> Yesu a wibaabani atapuna naka baha wiluwaluwa uyahinei bolu i atatiyehi babana tauna a dewa dumana baha wiluwaluwa wiatatiyanana. <sup>35</sup> Geka dewana uyahinei ma ipa tu bahapiko gehouna a baha anona ina lugeletena imahiyeya.

‘Baha wiluwaluwagei uyahihia ibaabani,  
po Yaubada hipuli i iwawali ma ginouli i huhouna  
gowadihi a paligeletehi.’

*Pehi apapoena baha luwaluwana anona*

<sup>36</sup> Yesu bolu i nehalehi po i lui hoi numa, ma a hewahewali hi nae uyahina po hi lubayadeya hi pa, ‘Pehi apapoena baha wiluwaluwana anona una liyayahi po to hanapugeya.’

<sup>37</sup> Ega yaka Yesu i paliwelehi i pa, ‘Pehi dewadewana tu liholina naka tau Lawa Moinau. <sup>38</sup> Ma tano naka hipuli tupo wohepali ma pehi dewadewahi naka Yaubada a taniwaga tu wotagona ma pehi apapoehi naka Tomodulele a taniwaga tu wotagona. <sup>39</sup> Ma pehi apapoehi tu ugohina naka Tomodulele, ma houga om lohina naka houga anani kokoe, ma tu hounaboiboina naka tu winoyanoya hoi yada.

<sup>40</sup> ‘Apo houga anani kokoe uyahina tu apapoe lawahi galenahi mei pehi apapoehi apo hina lugogonihi po hina apu halehi. <sup>41</sup> Apo tau Lawa Moinau u tu winoyanoya mi yadena a himilihi po apapoe tu dewana po tu nugogobu atapuhi hina lugogonihi mai u ani taniwaga u upuna, <sup>42</sup> po hina wihulu hopunehi mayau alalatana u hinena, naka tuponana uyahina tou po omhanakidiyana

hina tuhagahi. <sup>43</sup> Houga naka uyahina tauhi tu dumalu lawahi apo hina lui Amau anani taniwaga u hinena po hina namanamalihi, gagalenahi mei kabudala namalana. Apo iyai waitanigana yaka u baha geka ina nonoli po ina nonola imahiyeya po ina hanapugeya.

### *Gapola gowagowadana baha wiluwaluwana*

<sup>44</sup> Yaubada a taniwaga galenana mei gapola gegena hoi hipuli i memae ma lawa gehouna i tuhugaya po i gowada imahiyeya ma anai kaohana i nae po a gapola atapuhi i gimaleda halehi ma a gapolahi mihahi uyahinei tanona i gimaleya po gapola gegena i wialoni.

### *Giniuba matana baha wiluwaluwana*

<sup>45</sup> Yaubada a taniwaga mei giniuba matana dewadewana e memae ma lawa gehouna a luhogala ipa hilaki ita tuhagaya. <sup>46</sup> Yaka apo a gapola ina halehi po iyawe pelina giniuba matana dewadewa dumana ina waya.

### *Hagida baha luwaluwana*

<sup>47</sup> ‘Ma Yaubada anani taniwaga galenana mei tu ebaebaga hagida u boga he teleteleneya ma iyana atapuhi he onona, <sup>48</sup> ma hagidana ina hogoya ma hina teina geleteya po hoi hayahaya hina tugula ma iyana hi onona hina wikahahi po dewadewahi hoi gaeba hina hounihi ma apapoehi hina wihulu hopunehi. <sup>49</sup> Apo naka pitenana houga anani kokoe uyahina tu winoyanoya mi yadena hina nei po tu apapoe hina kahahi tu dewadewa u hayahi <sup>50</sup> po hina wihulu hopunehi mayau alalatana u hinena po tou ma omhanakidiyana hina tuhagaya.’

*Gapola wouna odubona*

<sup>51</sup> Yesu i lubayada nae uyahih i pa, ‘Geka baha luwaluwahi a palipaliwelemi amaka o hanapugehi, bo eega?’

Ma hi baha hi pa, ‘Ee.’

<sup>52</sup> Ega yaka i paliwelena mehi i pa, ‘Lugagayo tanitaniwagahi atapuhi baha gilugilumana odubona hi hanapugeya ma Yaubada a taniwaga hi wotagoya, yaka tauhi mei tu waigapola lawana a hanali gapolana wouna po odubona i houna geletehi a numa hinena uyahinei.’

*Mi Nasaleta Yesu hi wihinigigiyea*

(Maki 6:1-6; Luka 4:16-30)

<sup>53</sup> Yesu a baha wiluwaluwa geka i wikkokowi ma tupo noka i nehaleya, <sup>54</sup> po i nae tauna a meyagai dumana uyahina po hai numa tapalolo uyahina i lui po i atatiyana lawa uyahih. Ma nugenugohi hi gohola dumahi ma hi ibaabani hi pa, ‘Geka lawana meka hotanana a hanapu po a manini i tuhagahi? <sup>55</sup> Geka lawana amana kamda ma hinana Maliya ma walewalehina Yamesa ma Yosepa ma Simona ma Yuda, <sup>56</sup> ma nounouna mitehi ta memae ma iyowai po a hanapu geka pitenana gagalenahi?’ <sup>57</sup> Ega yaka Yesu hi wihinigigiyea.

Ma i paliwelehi i pa, ‘Tu bahapiko u tupo geha lawa hi wiyyateyateya ma a meyagai po a guguni ega hita wiyyateyateya.’

<sup>58</sup> Yaka Yesu a manini i dewadewahi ega hita maga babana ega hita witumaganeya.

# 14

*Yoni tu bapatiso a hilage  
(Maki 6:14-29; Luka 9:7-9)*

<sup>1</sup> Houga noka uyahina Heloda tu wasawasa Yesu a bagibagi tuwegana i nonoli. <sup>2</sup> Ega yaka a tu bagibagi i paliwelehi i pa, ‘Nugote Yoni tu bapatiso hilage uyahinei i towolo meme po manini geka e dewadewahi.’

<sup>3</sup> Tauna Yonina lolowa Heloda i numa panipani po hoi numa panipani i houni, a lui babana wawine gowana Helodiyasi naka Pilipo agona. <sup>4</sup> Helodana walehina Pilipo ma agona i haloya. Uyahinei Yoni i gagaleya po ega ita dumalu yaka i baha nae Heloda uyahina i pa, ‘Ega naka ita dumalu babana tulam agona ma u lawagi.’ <sup>5</sup> Hougana Yoni hoi numa panipani i memae Heloda i luhogaleya ipa Yoni in’uni ma ega emoemotana babana lawa magomagouhi Yoni hi kawatubahapikogeya po Heloda i matouta po ega it’uni.

<sup>6</sup> Ma hi memae po Heloda a houga guni iyetana i geleta, po a houga gunina tolehana i dewaya. Ma Helodiyasi natuna wawinena i hopu po Heloda u matana i halahala ipa ina kaoha. <sup>7</sup> Guguhinina a hala binei ma Heloda i kaoha duma po i baha gwala natuna guguhinina uyahina i pa, ‘Inapa awai om luhogala yaka apo geka hougana a welem.’

<sup>8</sup> Ega yaka guguhinina i nae po hinana uyahina i baha i pa, ‘Apo awai u luhogala Heloda uyahina a baheya?’

Ega yaka hinana i pa, ‘Una nae po una baha una pa, “A luhogaleya ipa Yoni tu wibapatiso unununa hoi gaeba una houni ma una weleu.”’  
**9** Geka bahana Wasawasa i noonoli po nugonugona i wiyuwa duma, ma tamogi a bahagwala tu witouumanena amaka hi nonoli ega yaka i paliha-leya. **10** Yaka tu bagibagi i himilihi po hi nae hoi numa panipani po Yoni gadouna hi boli **11** po hoi gaeba hi houni ma hi niyeya po guguhinina hi weleya, ma guguhinina i waya po i niyeya hinana uyahina. **12** Ma Yoni a hewahewali hi nei po hinina hi waya po hoi kokowaga hi guluwi, ma hi nae Yesu hi paliweleya.

*Yesu bolu i wianahi  
(Maki 6.30-44; Luka 9.10-17; Yoni 6.1-14)*

**13** Yesu tuwega geka i nonoli yaka wam uyahina i gelu po i nae hoi balabala yababayababa. Ma bolu Yesu a naena amaka hi hanapugeya hai meyagai hi nehalehi po tahayagei hi nae po Yesu uyahina hi geleta. **14** Yesu wam uyahinei i huhopu po bolu baneina i gagalehi po i galena lunugotootogogehi yaka tu tootogo i widewadewahi.

**15** Ma amaka aipompom ma ega yaka a hewahewali hi nae po Yesu hi lubayadeya hi pa, ‘Bada, geka dobuna naka balabala yababayababa, ma kabudala amaka i yoli yaka geka lawahi boluhi una himilihi po hina nae hoi meyagai po hai am hina gimala.’

**16** Yesu hai baha i wimiheya i pa, ‘Apega hina nae; taumi aniani ona welehi po hina am.’

**17** A hewahewali hi baha hi pa, ‘I am ega ita lata palawa magouna nimitutu ma iyana luwaga.’

**18** Yesu i baha i pa, ‘Palawa ma iyana ona weleu.’ **19** Ma i baha po bolu hi tugula hoi hiyamoni ma Yesu palawahi nimitutu ma iyanahi luwaga i winihi po i galena gae hoi yada ma Yaubada uyahina i wimaamala. Ma i’mtomutomu po i kokoe ma a hewahewali i welehi po hi gutaya bolu uyahihhi. **20** Lawa atapuhi hi’mam po hi’mhiyougo ma yaniyani tupotupona hi tu-tuwaluta meya naka poha magouhi 12 hi lihogohi, **21** Lawa hi’mam hi hiyahiyawi ololoto magouhi tausana nimututu ma wiwine po logaloga ega hita hiyawahihi.

*Yesu boga tepanei i nenea  
(Maki 6:45-52; Yoni 6:16-21)*

**22** A hewahewali i paliwelehi i pa, ‘Wam ona geluya po ona tahatahaya noka u tuponana ma tau lawa a himilihi po hina nae hai u dobu.’ **23** A hewahewali hi gelu po hi nenea ma Yesu bolu i himilihi po hi nenea ma tauna tunawana i gae hoi oya ipa ina lupali. Ma amaka aipom ma Yesu tunawana hoi oya i memae. **24** A hewahewali tunawahi wamgei hi woe hopu po boga u tipolina, ma togowa po guletutu hi wialonihi, ma gasi togowana hai wam naonei i togo mai po hai wam i laududu meya.

**25** Kikina ipa apo malinatom, ma Yesu i nei po boga tepanei i nenea po a hewahewali u liyalihahi i geleta. **26** Yesu hi gagaleya ma boga tepanei i nenei uyahihhi ma hi matouta duma po hi taatawa ma hi iototu hai nugotuhu hi pa lawa hilahilagena alugona hita tuhagaya.

<sup>27</sup> Ma Yesu i baha nae uyahih i pa, ‘Awai matoutana? Ona nugomotu, Tau.’

<sup>28</sup> Ega yaka Pita i baha nae uyahina i pa, ‘Guyau, inapa tam yaka una baha po boga tepanei a nehi uyahim.’

<sup>29</sup> Yesu i pa, ‘Una nei.’

Ega yaka Pita wam uyahinei i hopu po ipa boga tepanei ina nae Yesu uyahina, <sup>30</sup> i tunae kikeina ma guletutu i gagalehi po i matouta ma i hale-halele, yaka i otu i pa, ‘Guyau, una haguwe.’

<sup>31</sup> Yesu i wogo nae Pita uyahina po i lunimani, ma i baha i pa, ‘Om witumagana i habulu duma awai binei e lauluwaluwaga.’

<sup>32</sup> Hai luwagahi hi gelu geleta hoi wam ma togowa i dumoli. <sup>33</sup> Wam tu gelugeluna atapuhi Yesu hi wotalagiyeya hi pa, ‘Moina dumana tam Yaubada Natuna.’

*Tu tootogo Genesaleta u meyageina i widewade-wahi  
(Maki 6:53-56)*

<sup>34</sup> Hi damana po Genesaleta u tuponana higota.

<sup>35</sup> Ma meyageina tu miyena Yesu hi galena tuhagaya yaka hi nae po hai tu tootogo meyagai atapuhi uyahih i paliwelehi po hi neihini mai Yesu uyahina, <sup>36</sup> po hi lubayada hi pa, ‘Bada, emuemotana apo tu tootogo geka om kaleko hita wogodadani?’ Ega yaka i baha po a kaleko hi wodadani ma hi luyaghohana meme hai totogo uyahihiyei.

## 15

*Googahi hai wiatatiyana  
(Maki 7:1-13)*

<sup>1</sup> Palisi lawahi po lugagayo tanitaniwagahi Yelusalemgei hi nei po hi lubayada Yesu uyahina hi pa, <sup>2</sup> ‘Awai binei po om hewahewali am binei ega hita inimaoga ma googata hai lugagayo he tutulagoni?’

<sup>3</sup> Yesu hai lubayada i wimiheya i pa, ‘Taumi Yaubada a lugagayo o tutulagoni, babana taumi Yaubada a lugagayo o wihinigigiyea ma omi lugagayogei o iatatiyana. <sup>4</sup> Yaubada a lugagayo i baheya i pa, “Amam ma hinam una wiyatateyatehi, apo lawa awai hinana ma amana ina kawaiapopoehi yaka hina lihilageni.” <sup>5</sup> Naka lugagayona o wihinigigiyea ma taumi omi lugagayogeи o baheya o pa, apo lawa awai hinana ma amana ina palihalehi po ina pa, “U gapola atapuna amaka a palihaleya Yaubada uyahina po ega emoemotau a hagumi.” <sup>6</sup> Yaka naka lawana a hagu po a wiyatateyate amana ma hinana uyahihi i kokoe. Omi babada hai lugagayo uyahinei Yaubada a baha o laiyababaya. <sup>7</sup> Taumi tu wikoyakoyama dumami, naka binei Yaubada a baha Isaiya tu bahapiko i gilumi i pa,

<sup>8</sup> “Geka lawahi gamohi yawa e bahabaha wiyatateu  
ma nuponugohi hi mebala dao uyahiugei.

<sup>9</sup> Uyahiu he tapatapalolo yababa,  
babana hai wiatatiyana ega tau uyhaugei ma  
tauhi hai winugonugotuhugei.” ’

*Lawa hai apapoe  
(Maki 7:14-23)*

<sup>10</sup> Ega yaka Yesu a lawa i otugehi po hi nei uyahina ma i paliwelehi i pa, ‘Ona lutanigana

po ona hanapugeya. <sup>11</sup> Yaniyani emosi po emosi gamomiyei o anani ega emoemotana po ina wiapapoenimi, ma awai gamomiyei e gelegeletai naka tauna e iapapoenimi.’

<sup>12</sup> Yesu a hewahewali hi nei uyahina po hi baha hi pa, ‘Amaka u hanapugeya geka om bahana binei ma Palisi lawahi he nugonugoapapoe uyahim?’

<sup>13</sup> Yesu i baha i pa, ‘Amau yadei mayau ega ita ugugohihi apo yohola ina hapuhapuhalehi. <sup>14</sup> Palisi lawahi hawehi hina memae a sigana hina peu, babana tauhi taniwaga matahi i likekeya. Inapa tu matakeke tulana ina weluwaya yaka apo hoi domo hina peu gogona.’

<sup>15</sup> Pita i lubayadeya nae i pa, ‘Om baha wiluwaluwa gamo binei anona una paliweliyai po u nagonugoiyai ina lugiigila imahiyeya.’

<sup>16</sup> Yesu i baha nae uyahih i pa, ‘Taumi gasi nugote yohola ega nagonugomi hita lugiigilihi?

<sup>17</sup> Anona gegeka yaniyani awai o ani po e luilui u amamohi houga kukuna ma apo ina hopu meme hoi nudanuda. <sup>18</sup> Ma baha awai gamomiyei e gelegeleta naka nagonugomi hi nenei e gelegeletai naka tauna apo ina wiapapoenimi.

<sup>19</sup> Geka ginoulihi nagonugomi hinehiyei he gelegeleta nuggobu, omunugo, wihola, matamaga, danene, baha koyakoyama, widibodiboga. <sup>20</sup> Geka ginoulihi tauhi lawa he iapapoenihi, ma inapa ega ta winima oga ma tan’omam naka apeg alugota ina wiapapoeyaa.’

*Wawinena gehouna a witumagana  
(Maki 7:24-30)*

**21** Mi Isalaela hai tupo Yesu i nehaleya po i nae Taya ma Saidoni tupohihi uyahihī. **22** Ma Kanani wawinena gehouna i nei Yesu uyahina po i baha i pa, ‘Guyau, tam Dawita gogana, una lunugootogogeū, babana natuwe wawinena alugo apa-poena i luiya po i totogo.’

**23** Yesu wawinena a baha ega ita wimiheya, ma a hewahewali hi nei po uyahina hi baha nae hi pa, ‘Wawinena una himili po ina nae babana i wihinigaligali duma.’

**24** Yesu hai baha i wimiheya i pa, ‘Tau u nei Isalaela u hinena sipi hi laugowadehi a bihehi, ma ega tupo gehouhi ubeihi ata nei.’

**25** Wawinena i nae po Yesu u aena i polou ma i baha i pa, ‘Guyau, una haguwe.’

**26** Yesu i baha nae uyahina i pa, ‘Ega a dumalu po logaloga hai yam kedewa ta welehi.’

**27** Ma wawinena Yesu a baha i wimiheya i pa, ‘Guyau, naka baha dumana, ma kedewa logaloga hai am hamomouna he lemolemoya.’

**28** Yesu i baha nae wawinena uyahina i pa, ‘Tinani baneina wawine, tam tu witumagana wawinem, yaka om witumagana anona apo ina lugeleteyā.’ Houga naka uyahina wawinena natuna i luyagohana meme.

### *Yesu tu tootogo atapuhi i wiluyagohanihi*

**29** Yesu tupo noka i nehaleya po Galili bogana liyaliyanei i nenaē po i gae hoi oya yaka i tugula.

**30** Ma bolu baneina lawa tootogohi hi nehinimai Yesu uyahina, daladalahi, po matahi keekehi po nimahi habehabeluhi po wobadebadehi, po gasi totogo gehouhi. Tauhi hi nehinimai Yesu aena u

babana po i widewadewahi. <sup>31</sup> Ma lawa mago-magouhi hi gagalena po badebade lawahi hi ibaabani ma nimahi habehabeluhi hi kadidili, ma daladalahi hi towolo po hi nenea, ma matahi keekehi matahi hi lugiigilihi, lawa mi Isalaela hai Yaubada hi wotalagiyeya.

*Yesu patala baneina i wiyanahi  
(Maki 8:1-10)*

<sup>32</sup> Yesu a hewahewali i otugehi po hi nae uyahina ma i baha uyahih i pa, ‘Lawa geka nugonugou i wiyuwena dumahi, babana iyeta tonuga uyahita hi memae ma ega kikina hai yam, yaka ega ata luhogaleya ipa anai omhilagehi ta himila mehi po hina nae babana apo hoi tahaya kamnahi hina apapoe.’

<sup>33</sup> Ma a hewahewali hi baha nae uyahina hi pa, ‘Geka balabala yababayaba ma iyowai apo yaniyani ta tuhagaya po bolu geka ta wanihi?’

<sup>34</sup> Yesu i lubayadena mehi i pa, ‘Omi palawa wabihaga he memae.’

Ega yaka hi paliweleya hi pa, ‘Palawa magouhi 7 he memae, ma iyana muhomuhohi ega hita maga.’

<sup>35</sup> Ega yaka i baha po lawa boluhi hi tugula hoi hiyamoni. <sup>36</sup> Ma palawa magouhi 7 i winihi ma iyana, ma Yaubada uyahina i wimaamala. Ma i'mtomutomu po i kokoe ma a hewahewali i welehi po hi gutaya lawa uyahih i. <sup>37</sup> Lawa atapuhi hi'mam po hi'mhiyougo ma yaniyani tupotupona hi tutuwaluhi naka poha magouna 7 hi lihogohi. <sup>38</sup> Lawa hi'mam a lata hi hiyahiyawi naka ololoto

magouhi tausana wohepali, ma wiwine po logaloga ega hita hiyawihi.<sup>39</sup> Yesu lawa boluhi i himilihi po hi nena ma wam uyahina hi gelu po hi nae Magadini u tupona.

## 16

*Yesu a manini wekiwekilalana  
(Maki 8:11-13; Luka 12:54-56)*

<sup>1</sup> Houga gehouna Palisi lawahi ma Sadusi hai bolu hi nei Yesu uyahina po hina ludadani po hi lubayadeya ipa wekiwekilala yadei gehouna ina dewaya.

<sup>2</sup> Ega yaka Yesu i baha nae uyahihi i pa, ‘Heki, kabudala a yoli ona galeya hoi tupo yalasi e imago-magololo yaka o pa, “Hoimalatom apo houga dewadewa.”<sup>3</sup> Ma inapa malatomtomgei ma kabudala ina geleta po yada ina kaya yaka o pa, “Noka gadiwewe a wekiwekilala.” Taumi houga apo galenana iyowai naka yada o galehi ma o ipikogehi. Tamogi iyowai po geka hougana Yaubada a bagibagi anona ega emoemotami ona baheya.<sup>4</sup> Taumi geka hapanana hapa apopoena po matami hi maga. Omi luhogala ipa manini wekiwekilalana Yaubada uyahimi ina woogeleteuya. Tamogi apegia manini gehouna ina woogeleteuya uyahimi ma wekiwekilala Yona i woogeleteuya tunawana.’ Ma Yesu i nehalehi po i nae.

*Palisi ma Sadusi hai palawa ani lihaahanana  
(Maki 8:14-21)*

<sup>5</sup> A hewahewali mitehi hi damana u tuponei, ma hai palawa nugohi i guluwi po ega hita waya.<sup>6</sup> Ma Yesu i baha nae uyahihi i pa, ‘Ona gagalena imahi

Palisi po Sadusi hai palawa ani lihaahanana naka nugohine gowagowada.’

<sup>7</sup> Yesu a hewahewali tunawihi ma hi ibaabani hi pa, ‘Geka a nugotuhuna binei ma ata palawa nugota i guluwi po ega tata waya.’

<sup>8</sup> Ma Yesu hai wibaabani gowada amaka i hanapugeya, ega yaka i lubayadehi i pa, ‘Awai o ibaabaniyenya, ega omi palawa, bo? Nugote ega ota witumaganeu, po yohola ega ota galena tuhagau. <sup>9</sup> Ona nugotuhuya lolowa palawa magouhi nimitutu uyahinei lawa magouhi tausana nimitutu iyanahi ma tupotupona o tuwaluta meya po poha magouhi <sup>12</sup> o leihogohi. <sup>10</sup> Ma gasi lawa magouhi tausana wohepalu palawa magouhi <sup>7</sup> uyahinei a ianihi, ma tupotupona o tutuwaluhi poha magouhi <sup>7</sup> o leihogohi? <sup>11</sup> Ma taumi iyowai po ega nugenugomi hita lugiigilihi, palawa binei ega ata ibaabani? Ma tamogi a baha wiluwaluwa Palisi po Sadusi hai ani lihaahana ona matuteya.’ <sup>12</sup> Geka a bahana uyahina ma a hewahewali nugenugohi hi lugiigilihi, ega palawa binei ita ibaabani ma Palisi po Sadusi hai wiatatiyana koyakoyama ipa uyahinei hi lowolowo.

*Pita i baha dumalu Yesu binei  
(Maki 8:27-30; Luka 9:18-21)*

<sup>13</sup> Yesu mitehi hi nae Sisaliya Pilipai u tuponana, ma a hewahewali i lubayadehi i pa, ‘Ona paliweleu, lawa hi pa Lawa Moinau tau iyai?’

<sup>14</sup> Ma a baha hi wimiheya hi pa, ‘Lawa gehouhi hi pa tam Yoni bapatiso, ma lawa gehouhi hi pa tam Elaisiya, ma lawa gehouhi hi pa tam Yelemaya bo tu bahapiko odubona gehouna.’

**15** Apoma a hewahewali uyahihi i baha nae i pa, ‘Ma taumi omi nugotuhu o pa tau iyai?’

**16** Ma Simona Pita a baha i wimiheya i pa, ‘Tam Yaubada Lauyagohanana Natuna ma a Besinana lawana.’

**17** Yesu i baha nae Simona uyahina i pa, ‘Simona, tam Yoni natuna, a baha duma uyahim, tam lawa kaokaoham, babana om hanapu geka ega tam uyahimgei, ma Amau hoi yada a hanapu i welem. **18** Yaka a paliwelem, tam gowam Pita, anona gaima kadikadililina, apo gaima geka u tepana u bolu a witowolihi po hilage apapoena a kadidili ega ina wogowogodadanihi. **19** Apo Yaubada anani taniwaga ani’mhoena a welem, po ginouli hoi hipuli una hoeya yaka hoi yada hina hoeya, ma ginouli hoi hipuli una guduya yaka hoi yada hina guduya.’ **20** Naka hotanana ma Yesu i baha kadidili uyahihi i pa, ‘Ega kikina lawa gehouna ona palipaliweleya ona pa, “Yesu Besinana lawana.”’

*Yesu a hilage yohola ma bahana i bahena tahaeya*

(Maki 8:31-9:1; Luka 9:22-27)

**21** Naka hougana uyahina i wiwawala po a hewahewali i wiatatiyehi i pa, ‘Apo ta nae Yelusalem po noka hotanana wiyuwa galenahi magomagouhi a wialonihi, mi Yudeya hai tanitaniwaga po tu witalaguyaba babadahi po lugagayo tanitaniwagahi uyahihiyei. Ma apo hin’uniu po iyeta witonugana uyahina a towolo meme.’

<sup>22</sup> Ega yaka Pita i weluwaya po hi tunae uheiya ma i baha kadidili uyahina i pa, ‘Guyau, ega a dumalu ipa geka dewana uyahim ina geleta.’

<sup>23</sup> Yesu i luhagawileya po i baha nae Pita uyahina i pa, ‘Tomodulele, geka hougana una nehaleu, ega una laipeuniu om winugonugotuhu mei lawa hota hai winugonugotuhu, ma ega mei Yaubada a nugotuhu.’

<sup>24</sup> Ega yaka Yesu a hewahewali i paliwelehi i pa, ‘Inapa lawa awai nugenugona ina wotagou yaka a luyagohana ina palihaleya. Ma anani take ina awali ma ina wotagou. <sup>25</sup> Apo iyai ega biugei ina hilage yaka apo yautuna ina halehi. Ma iyai tau biugei ina hilage apegaa yautuna ina halehi.

<sup>26</sup> Inapa iyai ina wigapola duma yaka Yaubada a dewa apo ina winugoguluwi, naka apo awai dewadewana ina tuhagaya? Ma lawa a luyagohana naka ginouli baneina. <sup>27</sup> Babana yohola apo tau Lawa Moinau u tu winoyanoya mitehi to nenei Amau a wasawasa namanamalinei ma lawa atapuhi hai bagibagi mihana a welehi. <sup>28</sup> A baha duma uyahimi, lawa gehoumi geka hosi o towotowolo apegaa ona hilage a sigana tau Lawa Moinau u taniwaga waiwasawasanei ona galeu.’

## 17

*Yesu a wasawasa namanamalina i wogeleteya  
hoi oya*

*(Maki 9:2-13; Luka 9:28-36)*

<sup>1</sup> Iyeta magouhi 6 hi kokoe, Pita ma Yamesa walehina Yoni mitehi tunawahi weluwinihi po hi gae oya baneina u tepana. <sup>2</sup> Oyana uyahina hi

memae, ma Yesu tepana galenana i buiya a hewahewali u matahi po i namanamali mei kabudala namalana, ma a kaleko wakekena i wimatatona. <sup>3</sup> Ma mala emosi ma babada odubohi hi lugeletehi po tauna mitehi hi ibaabani. Babadahi naka Mose ma Elaisiya.

<sup>4</sup> Pita i baha Yesu uyahina i pa, ‘Guyau, i haki duma po tauyai geka hosi. U luhogaleya ipa kape tonuga a wogohi, emosi tam bimgei, ma emosi Mose binei, ma emosi Elaisiya binei?’

<sup>5</sup> Pita yohola i ibaabani ma gahu yayatana i lutatahi, ma gahuna u hinena baha hi noonoli i pa, ‘Natuwe geka a luhogaleya, tauna binei a kaoha duma; a baha ona iponawogogeya.’

<sup>6</sup> Ma a hewahewali baha geka hi noonoli po hi matouta duma, yaka hi guli hoi hipuli po hi lautalapupugehi. <sup>7</sup> Ma Yesu i nei po i limaamahihi i pa, ‘Ona towolo, ega ona matomatouta.’ <sup>8</sup> A hewahewali hi lauwatastehi po ega lawa gehouna hita galeya ma Yesu tunawana i towotowolo.

<sup>9</sup> Oyagei hi hopuhopu mai ma Yesu a hewahewali i paliwelehi i pa, ‘Ega lawa uyahihia ona bahebaheu, awai o gagalehi, a sigana tau Lawa Moinau hilage uyahinei apo a towolo meme.’

<sup>10</sup> A hewahewali hi lubayadeya hi pa, ‘Awai binei lugagayo tanitaniwagahi hi baheya hi pa, apo Elaisiya ina tahaya mai ma u mulina apo Besinana lawana ina nei?’

<sup>11</sup> Yesu i baha nae uyahihia i pa, ‘Naka moina dumana, Elaisiya ipa ina tahaya mai po ginouli atapuhi ina lidumaluhi. <sup>12</sup> A paliwelemi Elaisiyana amaka i nei, ma lawa ega hita hanapugeya, po hi wihinigigiyeya ma tau Lawa Moinau gasi apo

hina wihiniwiyuwau.’ <sup>13</sup> Yaka a hewahewalihi hi hanapugeya Elaisiya anona Yoni tu wibapatiso.

*Tewela olotona alugo apapoena i luiya ma Yesu i luyawahi 17.14:*

*(Maki 9:14-29; Luka 9:37-43a)*

<sup>14</sup> Yesu a hewahewali mitehi oyagei hi hopu mai bolu uyahihī, ma lawa gehouna i nei po anai wiyatayatena i polou Yesu uyahina <sup>15</sup> ma i baha i pa, ‘Guyau, natuwe una lunugotootogogeya po una luyawahi. Houga magomagouna alugo apapoena e tapeibadebadeya po u hinina wiyuwa he lalata duma. Houga gehouhi mayau alalatana uyahina e pipeu, ma houga gehouhi goila uyahina e yoliyoli. <sup>16</sup> Ma om hewahewali uyahihī a neneiyai po ega emoemotahi hina widewadewaya.’

<sup>17</sup> Yesu i baha i pa, ‘Taumi geka hapana ega omi witumagana po apapoe lawami. Houga a dao awai apo a meme liyaliyanimi po a genogenogemi? Tewelana ona neiyai uyahiu.’ <sup>18</sup> Yesu alugo apapoena i paliyeya po tewelana i hopu haleya, ma naka kabudalana i dewadewa même.

<sup>19</sup> Ma Yesu a hewahewali tunawahi hi nei Yesu uyahina po hi lubayadeya hi pa, ‘Iyowai po ega emoemotiyai alugo apapoena to wiyangaya?’

<sup>20</sup> “Yesu i baha nae uyahihī i pa, ‘Ega alugo apapoehi ota iyagahi babana omi witumagana ega ita lata. A baha duma uyahimi, itapa omi witumagana a lata mei ihagila polana apo oya uyahina ota baha ota pa, “Una nae noka hosi,” apo ita wiponawogogemi. Tu witumagana uyahimi ginouli magomagouhi hi teyateya. [<sup>21</sup>] Ega tahaya

gehouna po ipa apo dewa geka pitenana ta de-wahi, tahaya emosi hota naka lupali po wiyohi.]'

*Yesu a hilage bahana i wiluwagaya uyahihi  
(Maki 9:30-32; Luka 9:43b-45)*

<sup>22</sup> U Galili atapuhi hi'mboina gogona ma Yesu i paliwelehi i pa, 'Lawa Moinau apo hina houna damaneu lawa u nimahi <sup>23</sup> po hina lihilageniu, ma iyeta tonuga hina kokoe ma apo a towolo meme.' Yesu a baha geka binei ma nugenugohi hi wiyuwa duma.

*Hai numa dalabu monena hounana*

<sup>24</sup> Hi nae po Kapaneum u meyageina hi memae ma numa dalabu monena tu tama hi nei po Pita uyahina hi baha hi pa, 'Iyowai apo omi tu wiatatiyana mone ina houni, bo apeega?'

<sup>25</sup> Ega yaka Pita i baha i pa, 'Ee, apo mone ina houni.'

Pita i gunawilena meya hoi numa, ma Yesu Pita i lubayadefa i pa, 'Simona, om winugonugotuhu hipuli wasawasahi uyahihi iyawoi, hai mone he tamatama natunatuhi uyahihiyei, bo lawa tapuhi uyahihiyei?'

<sup>26</sup> Pita i baha i pa, 'Lawa tapuhi uyahihiyei ma ega natunatuhi uyahihiyei.'

Yesu i baha i pa, 'Moina dumana, tauhi natunatuhi ega hai witai gehouhi. <sup>27</sup> Ma tauta uyahita apo hina nugoapapoe, yaka geka houhana sili una waya ma una nae u boga po una wisili, po iyana tahatahayana un'ununi naka u gamona mone una waya, po apo ita hagu una houni tam ma tau ubeita.'

# 18

*Iyai lawa baneina Yaubada u matana*  
*(Maki 9:33-37, 42-48; Luka 9:46-48, 17.1-2, 15.3-7)*

<sup>1</sup> Naka hougana Yesu a hewahewali hi nei uyahina po hi lubayadeya hi pa, ‘Iyai tauna lawa gegena Yaubada anani taniwaga uyahina?’

<sup>2</sup> Yesu tewela gehouna i otugeya po i nei u matahi po i towolo, <sup>3</sup> ma Yesu i baha nae uyahihi i pa, ‘A baha duma uyahimi, inapa ega ona nugobui po mei logaloga yaka apega Yaubada anani taniwaga ona luiya. <sup>4</sup> Apo iyai ina nugohopuhopu po mei geka tewelana yaka apo tauna ina geduma Yaubada anani taniwaga uyahina. <sup>5</sup> Apo u hayami lawa awai gowaugei logaloga mei geka tewelana ina likao haya yaka naka tau i likao hau.

<sup>6</sup> ‘Apo tu witumaganeu lawana a winugonugotuhu mei geka tewelana, ma lawa awai ina lipeuya, yaka a dumalu itapa gaima baneina u gadouna hita duli ma u boga dumdum hita halena hopuneya po ita yoli. Ma ega ita dewadewa geka tu tapitapiyana ina dewaya po apapoe ina dewadewaya. <sup>7</sup> Kihoni tu mehipuli taumi tu nugodubu ani peu ludadanahi binei. Moina ani peu ludadanahi apo hina nei, tamogi iyai i dewahi po he waawala tauna tu nugodubu. <sup>8</sup> Apo tam lawa awai aem bo nimam ina laipeunim, yaka una boli haleya. Naka ega apapoe awai, babana apo aem emosi bo nimam emosi yaka luyagohana una tuhagaya. Tamogi woapapoe dumana naka aem po nimam luwaga a dewadewahi ma apo hina halena hopunem mayau alatana ega sigasigana

uyahina. <sup>9</sup> Mei gasi matam naka pite apo ina laipeunim yaka una wahi haleya, babana ega apapoe awai apo matam emosi hota, yaka om luyaghana ina dewadewa, tamogi woapapoe dumana uyahim naka apo matam luwaga a dewadewahi ma hina halena hopunem meyagai waipoyana uyahina.

<sup>10</sup> ‘Logaloga mei geka tewelana ega ona gagalena hopuhopunehi. Tauhi hai tu winoyanoya hoi yada he memae houga magomagouna Amau u matana. [<sup>11</sup> Ma Lawa Moinau a nenei ipa tu welupowa lawahi a wiluyagohanihi.]

<sup>12</sup> ‘Omi winugonugotuhu awai? Apo lawa gehouna a sipi magouhi handele emosi ma emosi ina welupowa, apo awai ina dewaya? Apo hoi oya atapuhi hina memae ma ina nae po emosina ina bibiheya a sigana ina tuhagaya. <sup>13</sup> A baha duma uyahimi, apo ina tuhagaya yaka a kaoha ina lata duma, ma magomagouhihi uyahihi ega ita kaoha duma po mei geka emosina. <sup>14</sup> Naka pitenana Amau hoi yada e memae ega ita luhogaleya ipa tewela emosi apapoe ina wialoni po ina welupowa.’

### *Walehita a apapoe binei*

<sup>15</sup> Yesu i baha meme i pa, ‘Apo walehim gehouna uyahim apapoe ina dewaya, yaka una wileta po omi luwaga ona lidumalu a apapoe binei. Ma ponam ina nonoli yaka naka i dewadewa duma, babana amaka walehim u tuhagaya po mitehi o witulana meme. <sup>16</sup> Ma inapa ega ponam ina nonoli, yaka lawa emosi bo luwaga una winihi

po mitehi walehimna uyahina ona wibaabani po a apapoe ina galena tuhaga imahiyeya. <sup>17</sup> Ma ega ina luhogaleya ipa omi baha ina nonoli, yaka tu tapalolo hai bolu uyahihia ona paligeleteya, po bolu hai baha ega ina nonoli, yaka ona palihaleya po tauna galenana mei tu meuputa bo takisi tu tama woapapoena.

<sup>18</sup> ‘A baha duma uyahimi, hoi hipuli ginouli awai ona numa panipani yaka hoi yada hina numa panipani. Ma ginouli awai hoi hipuli ona hoeya, yaka hoi yada hina hoeya.

<sup>19</sup> ‘Geka hougana a paliwelemi apo taumi iyawoi omi luwaga hota hoi hipuli ona nugoemota omi luhogala binei po Amau hoi yada uyahina ona laupali, yaka apo ina dewaya bimiyei. <sup>20</sup> Babana tupo awai uyahina lawa luwaga bo tonuga tau gowaugei hin’omboina gogona naka tau mitehi to memae.’

### *Paligigila baha luwaluwana*

<sup>21</sup> Pita i nae Yesu uyahina po i baha nae i pa, ‘Guyau, apo walehiu gehouna houga magomagouna uyahiu apapoe ina dewadewaya, ma mala wabihaga apo a apapoe a paligiglihi mala 7 bo mala wabihaga?’

<sup>22</sup> Ega yaka Yesu i baha nae uyahina i pa, ‘Ega una pa mala 7 hota, ma tamogi 7 magouhi 70.’

<sup>23</sup> Ega yaka Yesu baha wiluwaluwagei i paliwelehi i pa, ‘Yaubada a taniwaga mei tu wasawasa banei dumana, ma i luhogaleya ipa a tu bagibagi hai yaga hina lidumaluhi uyahina. <sup>24</sup> Ega yaka i wiwawala po lawa gehouna a yagayaga mone magouhi tausana 10 i bahena geleteya. <sup>25</sup> Geka

lawana a yagayaga ega emoemotana po ipa ina lidumaluya, ega yaka tu wasawasana i baha po ipa lawana ma agona po natunatuhi, po gasi a gapola atapuhi hina gimalena halehi po mihihi tu wasawasana ina waya, ma a hewalina a yaga hina dumalu.

<sup>26</sup> ‘Ma a tu bagibagina a nugodubuna i polou u matana, ma i lupali a bada uyahina i pa, “Bada, una lunugotootogogeu ma apo u yagayaga atapuna houga he nenei uyahihi a lidumaluhi.” <sup>27</sup> Ega yaka tu wasawasana a hewalina i lunugotootogogeya po a yagayaga atapuhi i paligiglihi ma a hewalina i hopu po i nae.

<sup>28</sup> Ma lawana i hopu po i nenaе, ma tulana gehouna mone magouhi <sup>10</sup> i weleya po i bagibagi ega ita wimihena yagiyagineya ma i memae, ma lawana i tuhagaya po i lugadouni ma i pa, “Geka hougana om yaga uyahiu una lidumaluya.”

<sup>29</sup> ‘Ma tulanana i polou uyahina po i lupali i pa, “Tulau, una lunugotootogogeu, ma houga he nenei apo u yaga uyahim a lidumaluya.”

<sup>30</sup> ‘Ma tulana a lupali ega ita genogeya po ponana ega ita nonoli, ma i houna luiyeya hoi numa panipani po i memae a sigana a yaga atapuna i lidumaluya. <sup>31</sup> Ma hai lawa hai dewa hi gagalehi po hi nugoapapoe, yaka hi nae po tu wasawasana hi paliweleya hai lawa hi itona binei.

<sup>32</sup> ‘Ega yaka badana a hewalina i otugeya po i paliweleya i pa, “Tam tu bagibagi apapoem babana om yagayaga uyahiu ubeihi u lupali po a lunugotootogogem po a paligilim, <sup>33</sup> awai binei tulam ega uta lunugotootogogeya po a yaga uyahim uta paligigli?” <sup>34</sup> Tu wasawasana uyona

i gigai duma yaka i baha po numapani tu galena itetena hi paliweleya, po a tu bagibagi hi niyeya po hi houna luyiyea hoi numa panipani, po i memae a sigana a yagayaga atapuhi i lidumaluhi.

<sup>35</sup> ‘Amau hoi yada apo naka pitenana uyahimi ina dewaya, inapa omi lawa hai apapoe ega ona lunugotootogogehi po ona paligilihi yaka apegia ina paligilim.’

## 19

### *Yesu wihulu binei i iatatiyana (Maki 10:1-12)*

<sup>1</sup> Yesu a wiatatiyana i wikkowi ma tupo Galili i nehaleya po i nenea Yudeya Yodani goilana i damani u tupona. <sup>2</sup> Ma bolu baneina Yesu hi wotagoya po hai totogo i widewadewahi.

<sup>3</sup> Ma Palisi lawahi hi nei Yesu uyahina ipa hina ludadani hi pa, ‘Apo lawa agona a dewa binei ega ita kaoha, iyowai a dumalu, ipa ina haleya bo ega?’

<sup>4</sup> Ega yaka Yesu i paliwelehi i pa, ‘Yaubada a Buka uyahina gilugilumana amaka o hanapugeya, “Houga a wawala uyahina tu wiwawala lawa luwaga i wiwawalihi oloto ma wawine.”

<sup>5</sup> Ma baha gehouna i pa, “Oloto amana ma hinana ina nehalehi po agona ina waya po mitehi hina megogona po hai luwaga hinihi emosi hota.”

<sup>6</sup> ‘Yaka hai luwaga hina wihiniemosi ma ega hini luwaga. Oloto ma wawine hai tawine Yaubada i popo emotehi, uyahinei ega emoemotana po ta lupena halehi.’

<sup>7</sup> Ega yaka hi lubayadeya hi pa, ‘Matababana awai po Mose lugagayo i houni i pa, “Apo lawa agona ina hahaleya yaka giluma gehouna ina gilumi po wawinena ina weleya ma apoma ina wihulu”?’

<sup>8</sup> Yesu hai baha i wimiheya i pa, ‘Naka omi palibagibagi tepanei ma Mose lugagayo geka i baheya uyahimi po ipa wihulu wekiwekilalana ona gilumi, yaka apoma agagomi ona hahalehi. Tamogi houga a wawala uyahinei i nenei ega geka pitenana. <sup>9</sup> Ma a paliwelemi apo oloto awai agona ega ina wihola ma ina haleya, po ina tawine damana wawine gehouna uyahina, yaka naka lawana e matamatamaga.’

<sup>10</sup> Ega yaka a hewahewali hi baha nae uyahina hi pa, ‘Inapa oloto ma wawine ita lugagayo geka pitenana yaka ega ta tawitawine.’

<sup>11</sup> Ma hai baha i wimiheya i pa, ‘Wiatatiyana geka ega lawa magomagoumi ubeimi, ma iyawoi Yaubada nugotuhu i welewelehi tauhi tunawahi. <sup>12</sup> Matababana ololoto gehouhi hi gunigunihi po ega tawine luhogalana uyahihi ita memae. Ma ololoto gehouhi he hapihapihi po ega emoemotahi hina tawine. Ma ololoto gehouhi Yaubada anani taniwaga binei ma luhogalahi tauhi hi gudu mehi, po tawine ega hita luhogaleya. Inapa lawa awai geka dewana emoemotana yaka ina wotagoya.’

*Yesu logaloga i baha lunugotootogogehi  
(Maki 10:13-16; Luka 18:15-17)*

<sup>13</sup> Ega yaka lawa gehouhi logaloga hi neihini mai Yesu uyahina ipa ina wotepanihi, ma ina lupali ubeihi. Ma a hewahewali hi paliyehi.

**14** Ma Yesu i baha i pa, ‘Logaloga ona palihalehi po hina nenei uyahiu ma ega ona guduguduhi. Matababana lawa mei geka logalogahi apo Yaubada anani taniwaga hina luiya.’ **15** Yesu nimana i lodomi po logaloga i wotepanihi, ma i nehalehi.

*Hewali waigapolana  
(Maki 10:17-31; Luka 18:18-30)*

**16** Tu waigapola gehouna i nei Yesu uyahina po i baha i pa, ‘Bada, bagibagi dewadewana awai a dewaya po luyagohana tuwetuwenai a tuhagaya?’

**17** Yesu i baha nae uyahina i pa, ‘Awai binei e laubayadeu bagibagi dewadewana binei? Tu dewadewa emosi hota e memae, inapa luyagohana tuwetuwenai una luhogaleya yaka Yaubada a lugagayo una wotagohi.’

**18** Hewalina Yesu i lubayadeya i pa, ‘Lugagayo awai?’

Yesu i baha i pa, ‘ “Ega una yamunugo, ega una matamatamaga, ega una danedanene, ega una igou koyakoyama. **19** Amam ma hinam una wiylateyatehi” ma “Uliyaliyam tu mae una luhogalehi po mei tam e lauhogalena mem.” ’

**20** Ma hewalina i baha i pa, ‘Geka lugagayohi a wotagohi, ma apo awai a dewaya?’

**21** Yesu i baha nae hewalina uyahina i pa, ‘Apo om luhogala ipa om dewa atapuna ina dewadewa, yaka om gapola magomagouhi una gimalena halehi po mihahi tu dayadayabu una welehi. Apo hoi yada una wigapola ma una nei po una wimilitagou.’

**22** Hewalina Yesu a baha i noonoli po a nugo-dubuna i gunawilena meya, babana a gapola hi maga duma.

**23** Ega yaka Yesu a hewahewali tauhi i pali-welehi i pa, ‘A baha duma uyahimi, tu wigapola lawahi hai lui Yaubada anani taniwaga uyahina i witai. **24** A paliwelena memi, kamela ega emoemotana heyau domona ina honogi. Ma tu wigapola lawana a lui Yaubada anani taniwaga uyahina i wipilipili lagona ma apoma naka gamogamona a honoga.’

**25** Yesu a hewahewali baha geka hi noonoli po nugenugohi hi gohola dumahi po hi pa, ‘Heki, iyai apoma apo luyagohana ina tuhagaya?’

**26** Yesu i gagalehi po i kokoe ma i pa, ‘Lawa uyahihhi luyagohana tuhagana ega emoemotahi ma Yaubada uyahina ginouli atapuhi emoemotana.’

**27** Ega yaka Pita i baha nae Yesu uyahina i pa, ‘U galeya i gapola atapuhi to nehalehi po to wootagom, tauyai apo awai to tuhagaya?’

**28** Yesu i baha nae uyahihhi i pa, ‘A baha duma uyahimi, yohola apo hipuli wouna uyahina tau Lawa Moinau, u ani wiwasawasa namanamalina uyahina a tugula, ma taumi tu wotagou magoumi 12, ani luhetala ona tugulehi, ma Isalaela gugunina magouhi 12 ona luhetalehi. **29** Apo iyawoi hai meyagai bo walewalehihi bo nounouhi bo amamahi po hinahinahi bo natunatuhi bo hai tano, tau biugei ma hina nehalehi, tauhi apo mihahi hina tuhaga lagoneya ma luyagohana tuwe-tuwenai hina tuhagaya. **30** Ma amalai gehouhi he

tahatahaya apo hina wimuli. Ma amalai gehouhi he imuli apo hina tahaya.

## 20

### *Tano tu bagibagi baha luwaluwahi*

<sup>1</sup> Yaubada anani taniwaga mei lawa gehouna a tano. Malatomtom kikina ma i nae po a tu bagibagi i weluwinihī po ipa a tano uyahina hina bagibagi. <sup>2</sup> Ma a lugagayo i baheya i pa, “Iyeta emosi mihana naka kina emosi omi bagibagi mihana,” po hi kaoha ega yaka i himilihi po hi nae hoi tano po hi wobagibagi.

<sup>3</sup> Kabudala i gegei ma gasi i nae hoi ani gimala po lawa gehouhi i gagalehi ega hai bagibagi ma hi meme yabayababa, <sup>4</sup> ega yaka i paliwelehi i pa, “Emoemotana apo ota nae u tano uyahina po ota bagibagi? Po omi bagibagi a lata naka pitenana ata wimihena tagoya,” ega yaka hi nae hoi tano po hi wobagibagi.

<sup>5</sup> Iyeta bolinai po ibigei i nenememe po lawa gehouhi hi memae ma i galehi, yaka i paliwelehi po hi nae a tano uyahina po hi bagibagi.

<sup>6</sup> Kabudala i yoliyoli ma i nenaē po lawa gehouhi i tuhagahi, ega yaka i baha nae uyahihi i pa, “Awai binei bagibagi iyetana o halena yababaya?”

<sup>7</sup> Ma hi baha hi pa, “Babana ega lawa gehouna ita paliweliyai ipa apo a bagibagi to dewaya.”

‘Ega yaka badana i baha i pa, “Taumi ona nae u tano uyahina po ona bagibagi.”

<sup>8</sup> I uguguwi, ma tanona tu galena itetena i paliweleya i pa, “Tu bagibagi atapuhi una liwoloehi po hai meiha hina tama. Tu bagibagi waimulihī

uyahihi una wiwawala po tu bagibagi tahata-hayahi uyahihi una liwoloe.”

<sup>9</sup> Tauhi kabudala i yoliyoli ma hi nei po hi wobagibagi noka mihami kina emosi i welehi naka pitenana lawa atapuhi apo gasi kina emosi po emosi hina waya. <sup>10</sup> Ma lawa tu bagibagi tahata-hayahi hai winugonugotuhu hi pa, apo maiha baneina hina waya, tamogi ega atapuhihi mihami galenana emosi. <sup>11</sup> Hai meiha hi tama po i kokoe, ma mihami a lata hi gagaleya po hi nugoapapoe tano taniwagana uyahina. <sup>12</sup> Ega yaka hi baha nae taniwaga uyahina hi pa, “Lawa wouhi ega hita luhilage, po mei tauyai to lauhilage, tauyai iyeta atapuna to bagibagiyeya, ma i meiha atapuyeina emoemotiyai.”

<sup>13</sup> ‘Ma taniwagana i paliwelehi i pa, “U lawa, ega u taniwaga ita apapoe, ma kina emosi mihana o lueeneya yaka naka amaka. <sup>14</sup> Omi meiha kina emosi po emosi ona waya ma ona nae. Ma u taniwaga lawa waimulihi hai bagibagi mihana a lata mei mihami a lata. <sup>15</sup> Tau u mone a tanitani-wageya, yaka u ani’mbenenana lawa a welewelehi ega binei ona nugenugoapapoe.”

<sup>16</sup> ‘Amalai gehouhi he tahatahaya apo hina wimuli. Ma amalai gehouhi he imuli apo hina tahaya.’

### *Yesu a hilage bahana i witonugaya*

<sup>17</sup> Yesu a hewahewali magouhi 12 mitehi hi gegae Yelusalem po hoi tahaya ma i paliwelehi i pa, <sup>18</sup> ‘Tauta ta nenaue u Yelusalem apo Lawa Moinau hina palihaleu tu witalaguyaba babadahi,

po lugagayo tanitaniwagahi u nimahi, po u hilage binei hina taniwaga. <sup>19</sup> Ma hina palihaleu tu meuputa hai tu wigawiya u nimahi po apo hina paliguyoguyougeu ma gulawa uyahinei hina kodikodiliu po ina kokoe ma hoi ani take hina tutulawiteu. Ma iyeta tonuga hina kokoe apo a towolo meme.’

*Yamesa ma Yoni hinahi a lupali Yesu uyahina  
(Maki 10.35-45)*

<sup>20</sup> Sebedi agona ma natunatuna luwaga hi nei Yesu uyahina, po i polou ma i lupali Yamesa ma Yoni ubeihi.

<sup>21</sup> Ega yaka Yesu i lubayadeya i pa, ‘Awai om luhogala?’

Ma wawinena i baha i pa, ‘A luhogaleya ipa om ani taniwaga una tutuhagaya hougana, natunatuwe mitehi apo ota tugula gogona, gehouna u awala hinebawam ma gehouna u keham.’

<sup>22</sup> Ega yaka Yesu hai baha i wimiheya i pa, ‘Omi lupali anona ega ota hanapugeya. Emoemotami apo wiywana ani umana a umumaya taumi on’umaya?’

Ma hi baha hi pa, ‘Emoemotiyai.’

<sup>23</sup> Yesu i baha nae uyahih i pa, ‘Naka moina apo wiywana a umumaya taumi on’umaya. Ma tamogi ega emoemotau po a winaganimi po ipa apo iyai u awala hinebawau ina tugula ma iyai u kehau ina tugula. Amau tauna e woononogo iyawoi apo hina tugula.’

<sup>24</sup> Ma a hewahewali magouhi 10, Yamesa ma Yoni hai lubayada hi noonoli po hi luuyogigai duma. <sup>25</sup> Ega yaka Yesu i boinihi po i baha nae

uyahihi i pa, ‘O hanapugeya tanitaniwaga hipuligei lawa uyahihi hi taniwaga kadidili duma, po tauhi mei tu wasawasa. <sup>26</sup> Ma taumi ega ipa naka pitenana ona dewadewaya, apo u hayami tam iyai ipa una witaniwaga, yaka una witubagibagi om lawa ubeihi. <sup>27</sup> Apo iyai u hayami ipa ina tahaemi, yaka tauna a lawa ubeihi ina witupupoula. <sup>28</sup> Mei tau Lawa Moinau a nenei hoi hipuli ega ipa lawa biugei hina bagibagi, ma tau ipa a witubagibagi lawa ubeihi, po apo yautuwe a palihaleya lawa magomagouhi ubeihi ipa a lumenihi.’

*Matakeke luwaga Yesu i widewadewahi  
(Maki 10.46-52; Luka 18.35-43)*

<sup>29</sup> Yeliko hi nehaleya po hi nenaem ma bolu banei dumana hi wotagohi. <sup>30</sup> Ma lawa luwaga matahi keekehi hoi tahaya hi tugutugula, ma Yesu i nei po i nenaem ma tuwegana hi nonoli, yaka hi otu hi pa, ‘Yesu, Dawita gogana, uta lunugotootogogeiyai.’

<sup>31</sup> Ma bolu hi paliyehi hi pa, ‘Hei, ona genuwana.’

Ma apoma hi ototu labalabatana hi pa, ‘Guyau, Dawita gogana, una lunugotootogogeiyai.’

<sup>32</sup> Ega yaka Yesu i tutowolo ma i otugehi po hi nei uyahina po i lubayadehi i pa, ‘Omi luhogala ipa awai bimiyei a dewaya?’

<sup>33</sup> Ma tauhi hi pa, ‘Guyau, nugenugoyai to galena meme.’

<sup>34</sup> Yesu i lunugotootogogeji yaka matahi i wodadanihi po mala emosi ma matahi hi galeneya, ma Yesu hi wotagoya.

## 21

*Yesu i luilui Yelusalem*

*(Maki 11.1-11; Luka 19.28-40; Yoni 12.12-19)*

<sup>1</sup> Yesu a hewahewali mitehi hi nae Yelusalem u liyaliyana po hi geleta u Betepage, naka oya Oliweta uyahina po noka hota ma Yesu a hewahewali luwaga i himila tahaehi po <sup>2</sup> i pa, ‘Meyagai u naomi ona nae po ona luiluiya naka hota doniki ma natuna olotona ona tuhagahi. Ona lupenihi po ona neih i mai uyahiu. <sup>3</sup> Apo ona lupelupenihi ma hina laubayademi yaka ona pa, “Guyau ipa ina wibagibagi, ma apo ina gunawileya.” ’

<sup>4</sup> Geka dewahi hai geleta odubona tu bahapiko amaka i bahena nonogogeya i pa,

<sup>5</sup> ‘Saiyoni lawahi ona paliwelehi ona pa,  
“Omi wasawasa ona galeya e nenehi uyahimi  
anai nugohopuhopuna doniki i geluya.  
Naka donikina natuna olotona i geluya.” ’

<sup>6</sup> Yesu a hewahewali a baha hi wotagoya po hi nae. <sup>7</sup> Apoma donikina natuna mitehi hi niyehi Yesu uyahina, ma hai kalekogei doniki upuna wihiyeya ma Yesu i gelu. <sup>8</sup> Ma bolu baneina hai kalekogei tahayana hi lutouli, ma lawa gehouhi mayau lagahi anai luguluguhi hi bolihi po a tahaya hi lutouli. <sup>9</sup> Bolu gehouhi u naonei ma bolu gehouhi mulinei hi nena, ma lawa atapuhi hi otu labatana ma hi wotalagae hi pa,

‘Tam Dawita gogana, to wotalagiyem!’

‘Guyau gowanei e nenei Yaubada ina kawaidewedewem!’

‘Ani’mhuna duma tam Gegewahagam uyahim!’

<sup>10</sup> A luina uyahina Yelusalem tu miyena hi goholihi po hi ibaabani hi pa, ‘Noka tauna iyai?’

<sup>11</sup> Ma lawa boluhi Yelusalem tu miyena hai lubayada hi imiheya hi pa, ‘Tu bahapiko lawa Nasaletagei gowana Yesu, Galili anani taniwaga uyahinei i nei.’

*Yesu numa dalabu i liyeuyeuaya*

(*Maki 11.15-19; Luka 19.45-48; Yoni 2.13-22*)

<sup>12</sup> Yesu numa dalabu baneina i luiya, po i tugudu po tu gimagimala i wiyagahi, ma mone tu wiyawepeli hai pata i lugoluhi, ma bunebune tu gimalahalenahi hai ani tugula i lubuiya. <sup>13</sup> Ma i baha nae uyahih i pa, ‘Yaubada a Buka hi gilugilumi uyahina i baheya i pa, “U numa lawa hai ani lupali numana.” Ma taumi o buiya po tu danedanene hai ani megowada.’

<sup>14</sup> Matakeke lawahi po lawa daladalahi hi nei numa dalabu u hinena po Yesu i widewadewahi.

<sup>15</sup> Tu witalaguyaba babadahi po lugagayo taniwagahi Yesu a bagibagi maninina hi galeya, ma logaloga hi ototu numa dalabu u hinena hi pa, ‘Dawita gogana ta wotalagiyeya.’

<sup>16</sup> Tanitaniwaga hi luuyogigai po hi pa, ‘Awai binei logaloga hai wiototu ega uta liwoloeyea?’

Yesu hai baha i wimiheya i pa, ‘Yaubada a Buka o hiyahiyawi babana iyowai? I pa, “Apo logaloga muhomuhohi uyahihiyei om wotalagae una wiatatiyehi.” ’

<sup>17</sup> Ega yaka Yesu Yelusalem i nehaleya po i nae u Betani po noka hotanana i eno.

*Yesu mayau i paligubaya*

(*Maki 11.12-14, 20-24*)

<sup>18</sup> Yesu malatomtom kikina ma i gunawilena meya po i nenaе Yelusalem po hoi tahaya ma am

i hilage. <sup>19</sup> Ma hoi tahaya mayau i towotowolo ma i galeya po i nae u liyaliyana ma tamogi ega ugona ita tuhagaya ma lugu yawa, ega yaka Yesu mayouna i paliyeya i pa, ‘Apega una ugo meme.’ Mala emosi ma mayouna i kokodila.

<sup>20</sup> Ma Yesu a hewahewali mayouna hi gagaleya po hi gohola dumahi po tunawahi hi ibaabani hi pa, ‘Iyowai po mayouna a hilage i bulili duma?’

<sup>21</sup> Ma Yesu i paliwelehi i pa, ‘A baha duma uyahimi ona witumagana ma ega ona launugoluwaluwaga mayau geka uyahina awai a dewadewaya binei, taumi ipa ona dewaya po mei awai a dewadewaya pite. Ma inapa geka oyana uyahina ona baha apo ina gunawotowi po u boga ina yoli yaka apo ina wiponawogogemi. <sup>22</sup> Inapa omi luhogala awai a witumaganami ona laupali yaka apo ona tuhagaya.’

*Yesu tauna a taniwaga  
(Maki 11.27-33; Luka 20.1-8)*

<sup>23</sup> Yesu i lui hoi numa dalabu baneina uyahina po i iatatiyana ma tu witalaguyaba babadahi, po Yudeya tanitaniwagahi hi nei po Yesu hi lubayadeya hi pa, ‘Witaniwaga awai u waya po geka ginoulihi e dewadewahi, bo iyai geka witaniwagana i welem?’

<sup>24</sup> Yesu hai baha i wimiheya i pa, ‘Hapali tau lubayada a welemi po ona wimiheya yaka apo omi lubayada a wimiheya, po iyai geka witaniwagana i weleu. <sup>25</sup> Yoni a witaniwaga yadei i nei bo lawa uyahihiyei i nei po i ibapatiso?’

Ma tunawahi u hayahi hi ibaabani hi pa, ‘Apo awai ta baheya! Apo tana pa, “Yadei,” apo ina

pa, “Awai binei ega ota witumaganeya?” <sup>26</sup> Ega emoemotana tana pa, “Lawa uyahineiyei,” baba lawa boluhi ta matutehi, ma hai winugonugotuhu naka tu bahapiko gehouna.’ <sup>27</sup> Ega yaka a baha hi wimiheya hi pa, ‘Ega tota hanapugeya miyei i nei.’

Ma Yesu uyahihi i baha i pa, ‘Tau gasi apega a paliwelemi witaniwaga awai a waya po geka ginoulihi a dewadewahi.’

### *Lawa natunatuna luwaga baha luwaluwahi*

<sup>28</sup> Yesu i baha meme uyahihi i pa, ‘Apo lawa natunatuna ololotohi luwaga, ma tutuwoga i paliweleya i pa, “Natuwe, amalai apo una nae hoi tano una bagibagiyeya.” <sup>29</sup> Ma i luhinigai, ma tamogi muliyei i nugobui po i nae i bagibagi.

<sup>30</sup> ‘Ma natuna habuluna i paliweleya i pa, “Natuwe, una nae hoi tano una bagibagi,” ma natuna habuluna i pa, “Ee, i haki apo a nae,” ma tamogi ega ita nae.

<sup>31</sup> ‘Hai luwagahi iyai amahi a nugotuhu i wiponawogogeya?’

Ma tauhi hi baha hi pa, ‘Tutuwoga.’

Ega yaka Yesu i baha nae uyahihi i pa, ‘A baha duma uyahimi tauhi tu apapoe po tauhi t matamaga wiwinehi apo hina lui Yaubada anani taniwaga uyahina, ma taumi apega ona lui. <sup>32</sup> Yoni lolowa tahaya dumadumaluna i atatiyemi, ma ega ota witumaganeya, ma takisi tu tama po tu matamaga wiwinehi hi witumaganeya po hai witumagana o gagalehi ma taumi ega kikina ota witumagana po ota nugobui.

*Wine tanona tu galena itetehi paliluwaluwahi  
(Maki 12.1-12; Luka 20.9-19)*

<sup>33</sup> ‘Paliluwaluwa gehouna tano taniwagana binei ona nonoli. Tano taniwagana gologolowa ugona uyahina wine he dewadewaya i lupehiyeya, ma gali i dewaya po i wiwila, ma wine pihagana i dewaya, ma gasi tanona u hinena ani luwiyau numana i wogoya, ma tu galena itete hai ututu i lawi ma i nehalehi po i nae bala daodaona. <sup>34</sup> Ma wine i ugo po i magula, ma houga omlohina hougana a hewahewali i himilihi po hi nae ipa ugona tupona hina welehi.

<sup>35</sup> ‘Ma tano tu galena itete baha tu hihiwa hi womomohihi po gehouna hi kodikodili ma wiluwagana hi lihilageni, ma witonugana gaimei hi wilawi. <sup>36</sup> Ega yaka taniwagana hewahewali gehouhi i himilihi kikina hi maga ma gasi naka pitenana tu galena itetehi hi dewaya. <sup>37</sup> Anani kokoe naka tauna natuna dumana i himili ma i pa, “Geka tauna natu hotau yaka apo hina wiyatayateya.”

<sup>38</sup> ‘Tamogi hougana tano tu galena itete natunana hi gagaleya po tunawahi hi ibaabani hi pa, “Tanona muliyei tu witaniwagena geegeka. Ta uni po geka tanona ipa ina nenaue uyahina naka apo ina wigalitiyei.” <sup>39</sup> Ega yaka hi womomohi, po hi halena hopuneyaa tanona uputana po hi uni.’

<sup>40</sup> Yesu i lubayada i pa, ‘Houga awai apo tanona taniwagana ina gunagunawileya tu galena itete iyowai ina dewahi?’

<sup>41</sup> Ma hi baha hi pa, ‘Tu leihilage apo ina wia-papoe dumahi, ma tano tu galena itete gehouhi u nimahi tanona ina houni, tauhi apo tanona ugougona tupona tano taniwagana hina weleya.’

<sup>42</sup> Ega yaka Yesu i baha nae babadahi uyahih i pa, ‘Nugote Yaubada a Buka hi gilugilumi, yohola ega ota nugotuhu tuhagaya i pa,  
“Ogolana tauna tu lunuma hi ihinigigiyea amalai i gunabuiya po i dewadewa lagona.  
Naka Guyau a bagibagi u matata ani nugogohola.”

<sup>43</sup> Yaka a paliwelemi Yaubada anani taniwaga uyahimi ina wihaleya po bolu tapuhi ina welehi po tauhi uyahihiyei ugo dewadewana ina geleta.  
[<sup>44</sup> “Iyai ina peu po noka ogolana uyahina ina yato apo ina lauhedalena meya po tupotupona. Ma inapa noka ogolana ina guli po iyai ina lutataya apo ina lumutumutuya.”]’

<sup>45</sup> Yesu a paliluwaluwa geka tu witalaguyaba babadahi po gasi Palisi lawahi hi noonoli po hi nugohanapu po hi pa, tauhi ubeihi ita’mpaliluwaluwa. <sup>46</sup> Ega yaka Yesu hi iletaya ipa hina numa panipani, ma tamogi bolu hi matutehi, matababana Yesu hi kawatubahapikogeya.

## 22

### *Tawine tolehana baha luwaluwana (Luka 14.15-24)*

<sup>1</sup> Baha luwaluwua gehouhi Yesu i paliwelehi i pa, <sup>2</sup> Yaubada anani taniwaga mei tu wasawasa baneina toleha i dewaya natuna olotona a tawine tolehana binei. <sup>3</sup> Ma a tu bagibagi i himilihi iyawoi tauhi i utanehi ipa hina weluwinishi po hina nei tolehana uyahina, ma tauhi hi luhinigigai.

<sup>4</sup> ‘Ega yaka a tu bagibagi gehouhi i himilihi po ipa hina paliwelehi hina pa, “Bada a toleha amaka hougana i geleta, a bulamakau amaka i unihi po

gasi aniani atapuhi amaka hi wononogogehi. Ona nei po ta nae a tolehana uyahina.”

<sup>5</sup> ‘Ma hai baha ega hita wiponawogogehya po gehouhi hi nae hai tano uyahih, ma lawa gehouhi hi nae tauhi hai bagibagi uyahih. <sup>6</sup> Ma gehouhi tu wasawasana a tu bagibagi hi womomohihi po hi wilawihi, ma hi wiapapoenihi ma hi lihilagenihi. <sup>7</sup> Wasawasana uyona i gigai yaka a tu wigawiya i himilihi po hi nae po tu’munugohi hi uni pahihi ma hai dobu hi apuya.

<sup>8</sup> ‘Ega yaka taniwagana a tu bagibagi uyahih i baha i pa, “Tawine tolehana amaka i nonogo, ma tamogi lawa a iutanehi tauhi ega emoemotahi ipa hina nei toleha uyahina babana tauhi tu apapoe. <sup>9</sup> Ona hopu po tahayagei ona nena, ma lawa awai ona tuhagahi yaka ona wiutanehi po hina nei tawine tolehana uyahina po hina am.” <sup>10</sup> Ega yaka hi hopu po tahayagei hi nena, ma lawa hi tamitamihi tauhi, tu dewadewa po tu apapoe po tawine numana hi wihogoya.

<sup>11</sup> ‘Hougana tu wasawasana i nei po a toumana i gagalena niyehi po lawa gehouna i galena tuhagaya tauna ega tawine kalekona ita oteni. <sup>12</sup> Ega yaka i lubayadeya i pa, “Tulau, awai binei ega tawine tolehana kalekona uta oteni, ma awai binei u lui mai?” Lawana geka lubayada ega emoemotana po ina wimiheya.

<sup>13</sup> ‘Ega yaka wasawasana a tu bagibagi i baha uyahih i pa, “Geka lawana ona womomohi, po aena ma nimana ona panihi po ona halena hopuneya hoi dobu uguwa po noka hotanana tou ma omhanakidiyana ina tuhagaya.”

**14** ‘Babana Yaubada lawa magomagouhi i iutanihi ma ega hita maga i winaganihi.’

*Sisa takisi taniwaga baneina  
(Maki 12.13-17; Luka 20.20-26)*

**15** Palisi lawahi tunawahi hai omboina uyahina hi wogatala hi pa, ‘Iyowai ma apo Yesu a baha powa ta tuhagaya?’ **16** Hi inugonugotuhu po ega yaka hai hewahewali po Heloda a bolu mitehi hi himilihi po hi nae Yesu uyahina po hi pa, ‘Bada, to hanapugem tam lawa dumadumalum, po Yaubada a tahaya dumana e iatatiyaneya, ma lawa kadikadidilihi ega uta genogenogehi ma baha e bahebahehi lawa magomagouhi uyahih.’ **17** Ega yaka hi lubayada hi pa, ‘Om winugonugotuhu iyowai? Mi Loma hai taniwaga ta wotagoya po takisi ta huhouni Sisa binei, bo ega?’

**18** Yesu hai wiwogatala gowagowada amaka i hanapugeya, yaka i baha i pa, ‘Taumi tu wikoy-akoyama, awai binei o laudadani?’ **19** Ega yaka Yesu i baha i pa, ‘Heki, takisi monena ona weleu po a galeya,’ **20** po i wiatatiyehi ma i lubayadehi i pa, ‘Iyai tepana galenana po gowana geka monena uyahina?’

**21** Ma hi baha hi pa, ‘Sisa galenana.’

Ega yaka Yesu uyahih i baha i pa, ‘Heki, ginouli awai Sisa galinei Sisa ona weleya. Ma ginouli awai Yaubada galinei Yaubada ona weleya.’

**22** Yesu a baha hi noonoli hi gohola dumahi. Ega yaka hi nehaleya po hi nae.

*Yesu towolo meme binei hi lubayadeya  
(Maki 12.18-27; Luka 20.27-40)*

<sup>23</sup> Noka iyetana uyahina Sadusi hai bolu tauhi hi nei Yesu uyahina, tauhi hilage towolo memena ega hita itumaganeya. <sup>24</sup> Tauhi hi lubayadeya hi pa, ‘Bada, Mose geka lugagayona ubeiyai i gilumi i pa, “Oloto awai ina tawine po ega ina winatuna ma ina hilage apo walehina hiwapena ina lawagi po hina winatuna naka popoyana galinei.” <sup>25</sup> Lawa gehouna natunatuna ololotohi magouhi 7. Tutuwoga i tawine po ega natuna ma i hilage. Ma walehina i haulatuya hiwapena i lawagi, <sup>26</sup> po ega natuna ma i hilage. Po gasi witonugahi ma atapuna magouhi 7 emoemotahi. <sup>27</sup> Muliyei apoma wawinena i hilage. <sup>28</sup> Uyahinei ma hoi towolo meme wawinena apo agona iyai? Matababana atapuhi magouhi 7 i lawaga pahihi?’

<sup>29</sup> Ma Yesu hai lubayada i wimiheya i pa, ‘Taumi naka o koyakoyamena memi babana Yaubada a Buka gilugilumana ega ota hanapugeya, ma gasi a wipoya ega ota hanapugeya. <sup>30</sup> Towolomeme hougana uyahina lawa apegia hina tawitawine po apegia hina itawinehi, tamogi hai mae yada uyahina tauhi ani galenahi mei tu winoyanoya mi yadena. <sup>31</sup> Ma Yaubada a baha hi gilugilumi towolo meme binei amaka o hiyawa tuhagaya i pa, <sup>32</sup> “Abelaham a Yaubada tau, po Isako a Yaubada tau, po Yakobo a Yaubada tau.” Tauna ega lawa hilahilagehi hai Yaubada, ma lawa lauyagohanahi hai Yaubada.’

<sup>33</sup> Yesu a wiatatiyana bolu hi noonoli po hi go-hola dumahi.

*Lugagayo banei dumana  
(Maki 12.28-34; Luka 10.25-28)*

<sup>34</sup> Palisi lawahi Yesu noyana hi nonoli ipa Sadusi hai lubayada amaka i wimiheya po ega hai ani baha gehouna, ega yaka Palisi hi'mboina gogona ma hi nei Yesu uyahina, <sup>35</sup> po Palisi uyahihiyei lawa gehouna lugagayo tu hanapugena Yesu i ludadani i pa, <sup>36</sup> ‘Bada, lugagayo atapuhi uyahihiyei lugagayo awai i lata duma?’ <sup>37</sup> Ma Yesu a lubayadana i wimiheya i pa, ‘Guyau om Yaubada luhogalam atapunei po alugom atapunei po nugenugom atapunei una luhogaleya. <sup>38</sup> Geka lugagayo tahatahayana po gasi i lagona duma. <sup>39</sup> Ma lugagayo wiluwagana geka pitenana i baheya i pa, “Lawa u liyaliyama tu mae una luhogalehi po mei e lauhogalena mem.” <sup>40</sup> Geka lugagayohi luwaga naka, lugagayo magomagouhi po tu bahapiko hai wibaabani magomagouhi hai baba.’

*Yesu i lubayadehi Dawita gogana binei  
(Maki 12.35-37; Luka 20.41-44)*

<sup>41</sup> Naka hougana Palisi hi'mboina gogona mai ma Yesu i lubayadehi <sup>42</sup> i pa, ‘Iyowai omi winugonugotuhu, Besinana lawana gogana iyai?’

Ma hi baha hi pa, ‘Gogana Dawita.’

<sup>43</sup> Ega yaka Yesu i baha i pa, ‘Ma iyowai po lolowa Alugo Woiyawa nugotuhu Dawita i weleya po Besinana lawana i kawaiguyougeya i pa,

<sup>44</sup> ‘Yaubada i baha u Guyau uyahina i pa,  
‘U awala hinebawau una memae  
a sigana om gawiya a houna hopunehi  
po aem ani luhanatanahi.’ ”

<sup>45</sup> Noka hougana Dawita Besinana lawana i kawaiguyougeya. Uyahinei Dawita ega Besinana lawana gogana dumana.’ <sup>46</sup> Yesu a lubayada geka

ega emoemotana po lawa awai ina wimiheya,  
geka uyahinei Yesu hi lowogeya po ega hita  
lubabayadena gawahi.

## 23

*Yesu lugagayo tanitaniwagahi po Palisi lawahi i paliyehi*

*(Maki 12.38-40; Luka 11.39-44, 46, 52, 20.45-47)*

<sup>1</sup> Yesu a hewahewali po gasi bolu mitehi ma uyahih i baha i pa, <sup>2</sup> ‘Omi lugagayo tanitaniwagahihi po Palisi lawahi, tauhi Mose a lugagayo odubohi he iatatiyanehi mi Isalaela uyahimi. <sup>3</sup> Yaka awai he iatatiyemi ona wotagoya, ma tamogi hai bagibagi ega ona itutupoganehi, babana he iatatiyana hota ma ega hita wootagohi. <sup>4</sup> Hai lugagayo hi witai duma po lawa he laiwitenihi, ma ega kikina hita wileta po lugagayo geka hita wotagohi.

<sup>5</sup> ‘Hai bagibagi atapuhi ipa lawa hina galehi ma hina hunehi, po Yaubada a Buka uyahinei hi gilumihi po u tepahi hi numa panipani lawitehi po nimahi uyahih po hai ani lupali kalekohi hi lidaohi ma he ototenih. <sup>6</sup> Ma tauhi hai luhogala ani tugula gegehi toleha uyahih po gasi ani tugula dewadewahi hoi numa dalabu. <sup>7</sup> Hai luhogala ipa ani gimala uyahina lawa wiyatayategei hina mamalihi ma hina kawaiguyougehi.

<sup>8</sup> ‘Ma taumi tu wotagou yaka apegaa naka pite hina kawaiguyougemba omi Guyau emosi hota po atapumina emoemotami. <sup>9</sup> Hoi hipuli ega iyai uyahina ona kawakawaiamana, babana Amami emosi hota hoi yada e memae. <sup>10</sup> Lawa ega

hina kawakawaitaniwagemi, babana Besinana lawana tau tunawau omi taniwaga. <sup>11</sup> Ma apo uyahimi lawa awai ina tahaemi, yaka tauna ina witubagibagi uyahimi. <sup>12</sup> Matababana iyai e wohepa meya apo ina hopu ma iyai e wohop-unena meya apo ina gae.

<sup>13</sup> ‘Kihoni lugagayo tanitaniwagami po Palisi lawami taumi tu nugodubu. Omi wikoyakoyama binei lawa o guduhi po apega Yaubada anani taniwaga uyahina hina lui. Taumi ega ota lui yaka lawa ega hita lui, babana o guduguduhi. <sup>15</sup> Kihoni lugagayo tanitaniwagami po Palisi lawami taumi tu nugodubu. Omi wikoyakoyama gehouna boga ma hipuli uyahihhi o kadakadau wiwila dobu magomagouhi uyahihhi, ipa omi hewali emosi hota ona waya po omi wiatatiyana powa binei apo a apapoe omi apapoe ina lata lagoni po tauna ma taumi dobu ebebalana ona wialoni.

<sup>16</sup> ‘Kihoni tanitaniwaga matami keekehi taumi tu nugodubu. Obaha o pa, “Apo iyai numa dalabu gowanei ina igwala naka ega ginouli baneina, ma apo lawa awai gapola numa dalabu u hinena he memae uyahihiyei ina igwala, yaka naka ginouli banei dumana po apo ginoulina ina dewaya.” <sup>17</sup> Taumi o buuwa duma po matami hi keke. Ginouli awai i dewadewa duma, numa dalabu bo gapola? Nugote numa dalabu babana numa dalabu u hinena gapola he memae tauhi hi wiwoiyawa babana numa dalabu u hinena. <sup>18</sup> Ma o baha o pa, “Apo iyai ani talaguyaba gowanei ina igwala naka ega ginouli baneina, ma tamogi ina igwala anani’mbenena ani talaguyaba uyahina, po ginouli awai i pikogeya apo ina de-

waya.” <sup>19</sup> Taumi matami hi keke, ginouli awai i dewadewa, ani’mbenena bo ani witalaguyaba tauna ombenena e iwoiyaweya? <sup>20</sup> Uyahinei apo lawa awai ani talaguyaba gowanei ina igwala, yaka tauna gasi ginouli atapuhi ani talaguyaba uyahihi e igwalehi. <sup>21</sup> Ma apo lawa awai gasi numa dalabu gowanei ina igwala, yaka tauna gasi numa dalabu gapolahi gowanei e igwala. <sup>22</sup> Ma apo lawa awai yada gowanei ina igwala tauna Yaubada anani mae gowanei po gasi Yaubada gowanei e igwala.

<sup>23</sup> ‘Kihoni lugagayo tanitaniwagami po Palisi lawami taumi tu nugodubu. Yaubada uyahina omi koyamagei o yambenena ma omi ani’mbenenahi omi ginouli atapuhi baneihi po habuluhi uyahihiyei, tamogi lugagayo dumahi o winugoguluwihi, dewa dumadumaluna ma lunugotootogo ma witumagana tauhi o winugoguluwihi, emoemotami ginouli baneihi geka ona dewahi, ma gasi ginouli habuluhi ega ipa ona inugoguluwihi. <sup>24</sup> Taumi tanitaniwaga matami keekehi, omi gulai u hinena nabugala o wihaley po ega ota umaya, ma gamogamo baneihi o laumehahi.

<sup>25</sup> ‘Kihoni lugagayo tanitaniwagami po Palisi lawami taumi tu nugodubu. Omi wikoyakoyama binei, omi keyaka po omi gaeba upuhi o laiyeuyeuh ma tamogi u hinemi omboho po dewa apapoe i wihogomi. <sup>26</sup> Taumi Palisi matami hi keke duma omi keyaka po omi gaeba hinehi ona liyeuyeuh tahaehi, yaka apo upuhi hina yeuyeuh.

<sup>27</sup> ‘Kihoni lugagayo tanitaniwagami po Palisi lawami taumi tu nugodubu. Omi wikoyakoyama binei taumi mei kokowaga, tepana o wihiyeya po

i yeuyeu po galenana i haki, ma tamogi u hinena lawa geyamihi bowabowahi po gobugobuhi he memae. <sup>28</sup> Taumi lawa u matahi galenami mei tanitaniwaga dumadumalumi, ma nugenugomi u hinena koyama po apapoe hi maga duma ma he memae.

<sup>29</sup> Kihoni lugagayo tanitaniwagami po Palisi lawami taumi tu nugodubu. O ikoyakoyama, baba tu bahapiko odubohi kokowagahi o dewahi ma tu dewadumalu odubohi ani nugomomotahi o wononogogehi, <sup>30</sup> ma o baha o pa, “Itapa odubona googata hai houga uyahina tata memae apegta tata haguhaguhi, ma tu bahapikohi hita lahilagenihi.” <sup>31</sup> Omi wibaabani uyahina ma o bahena memi, o pa, “Tu’munugo googahi tauyai.” <sup>32</sup> Yaka hai bagibagina taumi apo ona wotagoya.

<sup>33</sup> ‘Baha dumana taumi ani galenami mei mota deewa yaka ega emoemotami ipa dobu ebebalana ona lowo haleya. <sup>34</sup> Tu bahapiko po tu dewadewa po tu wiatatiyana apo gehouhi a himihimilihi po ona unihi po hina hilage, ma gehouhi ani take uyahina ona tutulawitehi, ma gehouhi omi numa tapalolo u hinehi ona wilawihi ma meyagai emosi po emosi uyahihi ona iyaga niyehi. <sup>35</sup> Houga a kokoe uyahina tu dumalu atapuhi hai hilage bigona taumi apo ona waya, Abele tu dumalu a hilage uyahina i wawali ma i nei po amalai Belekiya natuna Sekaliya numa dalabu ma ani talaguyaba u tipolinana o lihilageni naka bigohi apo ona waya. <sup>36</sup> A baha duma uyahimi taumi geka hapanana apo bigo geka ona wialoni.

*Yesu Yelusalem binei i tou  
(Luka 13.34-35)*

<sup>37</sup> ‘Aee, Yelusalem, Yelusalem, tam tu bahapiko e ununihi po Yaubada a tu baha e laugaimahi. Houga i dao ipa natunatum a lugoogonihi po mei kamkam apapenei natunatuna e talatalaha-gauhi. Ma ega uta palihaleu po ata dewaya. <sup>38</sup> Uyahinei apo Yaubada om meyagai ina nehaleya po ina apapoe wahaga. <sup>39</sup> Ma a paliwelem, apegia una galeu a sigana u houga a gunawileu po una pa, “Tam Guyau gowanei e nenei to kawaidewedewem.” ’

## 24

### *Houga witai apo yohola ina geleta (Maki 13.1-13; Luka 21.5-19)*

<sup>1</sup> Yesu numa dalabu baneina i nehaleya po ipa ina nae u oya ma a hewahewali hi nae uyahina po numa dalabu ani galenana binei hi laiatatiyeya.

<sup>2</sup> Po Yesu i baha nae uyahihi i pa, ‘Geka numahi gaima uyahihiyei hi wogohi po o gagalehi a baha duma uyahimi, houga he nenei apo gaima emosi ega u uyawena ina memae. Atapuna apo hina dubadubalena pahi.’

<sup>3</sup> Hi ibaabani ma hi nenaе po Oliweta u oyana hi geleta po tunawahi hi tugula, ma a hewahewali hi lubayadeya hi pa, ‘Una paliweliyai meyanai apo numa dalabuna hina goluta haleya, ma houga awai apo om houga gunawilana po iyeta anani kokoe, wekiwekilalana awai una paliweliyai po to hanapugeya.’

<sup>4</sup> Yesu i paliwelehi i pa, ‘Ona gagalena imahi po apegia iyai ina witahaya powami <sup>5</sup> Matababana lawa hi maga apo hina towolo po gowaugei hina koyama hina pa, “Tau Besinana lawana,” po

lawa magomagouhi hina koyamehi. <sup>6</sup> Hougana gawiya po wogalahi tuwegahi ona noonolihi ega ona matomatouta babana geka dewahi apo hina wawala tahaya. Tamogi houga sigasigana yohola. <sup>7</sup> Tupo geha ma tupo geha apo hina wigawiya po gasi ani taniwaga geha ma ani taniwaga geha apo hina wigawiya ma houga gomala po guhuguhu hina geleta tupo magomagouhi uyahih. <sup>8</sup> Geka ginoulihi naka houga witai anani wawala dumana.

<sup>9</sup> Taumi apo lawa hina womomohimi po hina wihiniwiywami, ma hina laihilagenimi. Apo gowau binei ma tupo atapuhi uyahih lawa apo hina wihinigigiyemi. <sup>10</sup> Houga witai uyahina apo lawa gehouhi hina peu po hai lawa hina nugohalehi po hina wigawiyehi. <sup>11</sup> Apo tu bahapiko koyakoyama hina nei po lawa gehouhi hina tahaena powahi. <sup>12</sup> Apo dewa apapoena a lata binei ma lawa hai luhogala u nugonugohi hina tapiya. <sup>13</sup> Ma inapa iyai in'omtaibagibagi, ma ina nae po houga a sigasiga uyahina tauna apo luyagohana ina tuhagaya. <sup>14</sup> Ma Yaubada anani taniwaga tuwegana hina guguyeni hipuli tupo wohepali uyahina po hina nonola tahaeya, ma apoma houga sigasigana iyetana ina geleta.

*Houga woapapoe dumana  
(Maki 13.14-23; Luka 21.20-24)*

<sup>15</sup> ‘Apo yohola wekiwekilala tu bahapiko Daniyela i bahebaheya ina geleta, i pa, “Ginouli waigola dumana tupo waiwoiyawana uyahina e towotowolo.”’ (Taumi tu’mhiyawa ona wileta po baha geka anona ona hanapugena imahiyeya.) <sup>16</sup> ‘Ma iyawoi Yudeya u tupona ona memae yaka

ona lowo po ona nae u oya. <sup>17</sup> Iyai a numa uputana e memae apega ina lui po a ginouli ina tamatama. <sup>18</sup> Emoemotana gasi iyai hoi tano ina wobagibagi, apega ina gunawileya a kaleko binei. <sup>19</sup> Ma wiwine he igugu po koikoibahi noka hougana, tauhi tu nugodubu. <sup>20</sup> Ona laupali omi lowo iyetana binei, po ega houga wayau bo dalabu iyetahi uyahihi ona memae. <sup>21</sup> Houga witai banei dumana, babana hipuli a wawala uyahinei ma i nei po amalai, ega kikina witai mei geka pitenana, ma houga he nenei uyahihi apega witai hina geleta meme. <sup>22</sup> Iyeta witai noka itapa Yaubada ega hougana ita likukuya apo lawa atapuhi hita hilage pahihi, ma Yaubada hougana apo ina likukuya, babana a lawa i inaganihi ubeihi. <sup>23</sup> Apo lawa gehouna ina paliwelemi ina pa, “Ona galeya, geka bo noka Besinana lawana,” ega ona itumaganeya, <sup>24</sup> matababana Besinana koyakoyama po, tu bahapiko koyakoyama apo hina geleta po wekiwekilala waipoyahi po manini lawa u matahi hina wogeletehi, po Yaubada a bolu i inaganihi kikina apo gasi hita koyamehi. <sup>25</sup> Yaka taumi geka dewahi ubeihi ma amaka a palipaliwelena tahaemi.

<sup>26</sup> ‘Apo hina paliwelemi hina pa, “Keliso u pitapita e memae,” ega ona nenaue u pitapita. Apo hina baha hina pa, “Keliso numa u hine dumana e memae,” ega ona itumaganehi. <sup>27</sup> Babana tau Lawa Moinau u gunawilana galenana mei namanamala baneina, namalana hoi tupo kaluwabu po a siga tupo yalasi. <sup>28</sup> Meka hotanana waewae hina yamtuboina naka hosi popoya.

*Lawa Moinana a houga gunawilana  
(Maki 13.24-27; Luka 21.25-28)*

<sup>29</sup> ‘Houga witai u mulina,  
Kabudala a kadidili apo ina tapiya,  
ma wamahiya yayatana ina wigahugahu,  
ma yada ubonahi hina peu hopu mai,  
ma yada ginoulihi atapuhi hai kadidili apo hina  
tapiya.’

<sup>30</sup> Naka hougana apo tau Lawa Moinau u wekiwekilala hoi yada ina lugeleteya, po lawa tupo wohepali uyahihi nugenugohi hina launihi po hina tou bahabaha apoma apo Lawa Moinau a wipoyau po a diidiga lagonau ona gagaleu ma yaloigei a nei. <sup>31</sup> Ma himogo apo hina huweni po u tu winoyanoya a himilihi hipuli atapuna, togowa mata wohepali uyahihi po u lawa a inaganihi hina welugogonihi po hina nei uyahiu hipuli anani wawala po anani kokoe uyahinei.

*I galugalu gehouna  
(Maki 13.28-31; Luka 21.29-33)*

<sup>32</sup> ‘Ani galena a paliweleemi po ona nugenugotuhuya, i galugalu hougana uyahina ta hanapugeya naka ega daona ma apo higolo ina wawala. <sup>33</sup> Yaka wekiwekilala awai a palipaliweleemi hina wawala ma ona galehi yaka ona hanapugeya u houga gunawilana ega daona ma apo ina geleta babana hoi mateta a towotowolo. <sup>34</sup> A baha duma uyahimi, geka ginoulihi atapuhi apo hina wawala tahaya ma apoma geka hapanana lawahi hina hilage pahihi. <sup>35</sup> Yada ma hipuli apo hina yababa ma tau u baha apegia ina yababa.’

*Hougana ega iyai gehouna ita hanapugeya  
(Maki 13.32-37; Luka 17.26-30, 34-36)*

<sup>36</sup> ‘Ega iyai gehouna ita hanapugeya iyetana po kabudalana apo ina geleta mei gasi tu winoyanoya mi yadena ega hita hanapugeya. Tau gasi ega ata hanapugeya, Amau tunawana i hanapugeya. <sup>37</sup> Mei Nowa a houga emoemotana mei gasi apo Lawa Moinau u houga nei, <sup>38</sup> babana Nowa a houga uyahina lawa hi’mam, po hi umuma po hi tawitawine po hi itawitawine ma Nowa wam uyahina i gelu, <sup>39</sup> ma goila i hopu i ligohogoholihi, po lawa atapuhi hi hilage pahihi yaka tau Lawa Moinau, u houga gunawilana naka pitenana. <sup>40</sup> Naka hougana apo lawa luwaga hoi tano, yaka emosi Yaubada ina wihaleya ma emosi ina memae. <sup>41</sup> Wiwine luwaga apo pegapega hina yamapu po emosi Yaubada ina wihaleya ma emosi ina memae.

<sup>42</sup> ‘Uyahinei ona gagalena, babana tau omi Guyau u houga gunawilana iyetana ega ota hanapugeya. <sup>43</sup> Ma gegeka ona hanapugeya, itapa numa taniwigana uguwei tu danedanene a nei kabudalana ita hanapugeya apo matana ita kayakaya po apega a numa ita lupapaya po ita lui. <sup>44</sup> Taumi ipa gasi ona wononogo babana kabudala awai o pa apega a nenei naka u hinena apo Lawa Moinau a nei.

*Tu bagibagi waiponawogona bo waiponahalena  
(Luka 12.41-48)*

<sup>45</sup> ‘Iyai waiponawogona po wainugonugotuhuna? Tauna apo a bada ina witowoli po numa u hinena ina witaniwaga, ma tu bagibagi gehouhi

aniani kabudala dumalunei ina welewelehi. <sup>46</sup> Inapa badana ina gunagunawileya po geka dewana ina dewedeweya ma ina tuhagaya naka tu bagibagina tauna tu kaohadiidiga. <sup>47</sup> A baha duma uyahimi noka badana apo tu bagibagina ina witowoli po ginouli atapuhi ina gagalena itetehi. <sup>48</sup> Tamogi inapa tu bagibagina a dewa ina apapoe ma ina paliweleno meya ina pa, “Ubada, a gunawilana i wihinihinibiga, <sup>49</sup> ma ina wiwawala po tu bagibagi gehouhi ina kodikodilihi, ma in’omam ma in’umuma buuwa. <sup>50</sup> Noka tu bagibagina a bada iyeta emosi apo ina nei. Ma a neina naka tu bagibagina ipa apegia ina nei po kabudalana apegia ina hanapugeya. <sup>51</sup> Ma apo kwasikwasi daodaonei ina talatala mutuya po tu wikoyakoyama mitehi ina houna emotehi po noka hotanana tou ma omhanakidiyana ina tuhagaya.

## 25

### *Guguhini magouhi 10 baha luwaluwahi*

<sup>1</sup> Yaubada anani taniwaga galenana mei guguhini magouhi 10, hai lampa hi tama, ma hi nae ipa tu tawine olotona i nenei mitehi hina witutuhaga a tawine tolehana uyahina. <sup>2</sup> Uyahihiyei magouhi nimitutu buubuwahi, ma nimitutu hanahanapuhi. <sup>3</sup> Tu buubuuwa hai lampa bunamahi a luwitana ega hita waya, <sup>4</sup> ma tauhi hanahanapuhi hai bunamahi luwitanana hi waya hai lampa binei. <sup>5</sup> Tu tawine olotona i hinihinibiga, ma atapuhi hi otonana po hi eno hilage.

**6** ‘Ma amaka i wiupom bolina ma lawa gehouna i otu i pa, “Hei, tu tawine olotona amaka e nenei, ma ona towolo po mitehi ta witutuhaga.”

**7** ‘Ega yaka guguhinihi atapuhi hi towolo po hai lampa hi wononogogehi. **8** Ma guguhini bu-buwahi, hai lawa uyahihi hi baha hi pa, “I lawa, omi lampa a bunamahi tuponei ona weliyai babana kikina ma apo i lampa hina boho.”

**9** ‘Ma hanahanapuhi hi baha nae hi pa, “Nugote ega emoemotana po i lampa bunamahi tupohi to welemi amaka emoemotiyai, yaka taumi ona nae tu gimala uyahihi po omi lampa bunamahi ona gimala.”

**10** ‘Yaka hi nenaе ipa hina gimala, ma tu tawine olotona i nei po tauhi amaka hi woononogo mitehi hi lui tawine tolehana uyahina, ma mateta hi guduya.

**11** ‘Ma hai lawa hi gimala po i kokoe, ma hi gunagunawilehi po hoi uputa hi mae, ega yaka hi baha hi pa, “Bada, bada, gudu una hoeya ma to lui mahi.”

**12** ‘Ma hai baha i wimiheya i pa, “A baha duma uyahimi taumi bolu tapuna, ega ata hanapugemi.”

**13** ‘Uyahinei ipa ona gagalena babana u houga gunawilana iyetana po kabudalana ega ota hanapugeya.

*Bada a hewahewali hai ani bagibagi i gutaya  
(Luka 19.11-27)*

**14** ‘Galenana mei bada gehouna ipa ina nae ina kadau ma a tu bagibagi i otugehi po hai ututu i lawi, ma awai i lainanahi apo anani taniwaga tupona hina galena iteteya. **15** Ega yaka a tu

bagibagi gehouha mone a lata tausana nimitutu i weleya ma a hewali wiluwagana, tausana luwaga i weleya, ma a hewali witonugana tausana emosi i weleya. Emosi po emosi a hanapu a lata uyahinei ma hai guta i welehi, ma i nehalehi po i nae bala daodaona. <sup>16</sup> Ma lawana a bada mone tausana nimitutu i weleweleya i nae po i ibagibagi po a luwitana tausana nimitutu i tuhagahi. <sup>17</sup> Mei lawa wiluwagana a bada mone tausana luwaga i weleweleya i nae po i ibagibagi po tausana luwaga i tuhagaya. <sup>18</sup> Ma lawa witonugana a bada mone tausana emosi i weleweleya, i nae po a bada a mone ega ita wibagibagi ma hipuli i halaya ma i guluwi.

<sup>19</sup> ‘Ma hai badana a kadau hougana i dao, apoma i gunawilena meya po a hewahewali hai bagibagi anohi ina galehi ma ina lubayadehi. <sup>20</sup> Yaka lawana tausana nimitutu i weleweleya, naka i nei a tausana nimitutu i luwitani po u nimana ma i nei a bada uyahina i baha i pa, “Bada, geka tausana nimitutu u weleu po a ibagibagi geka gasi tausana nimitutu a tuhagaya po a luwitani ma a neiyai.”

<sup>21</sup> ‘A bada i baha i pa, “I dewadewa. Tam tu bagibagi dewadewam po dumadumalum, apo ginouli baneih una galena itetehi matababana ginouli habuluhi emoemotana a witumaganem, po u ani kaoha uyahina apo una memae.”

<sup>22</sup> ‘U mulina lawa wiluwagana i nei tauna tausana luwaga i weleweleya, po i baha i pa, “Bada, tausana luwaga u weleu ma a nae po a ibagibagi po geka tausana luwaga a luwitana a tuhagaya po a neiyai.”

**23** 'Yaka a bada i baha i pa, "I dewadewa. Tam tu upuhegoya dumam po dumadumalum. Amaka u wileta ginouli habuluhi uyahih, yaka apo a taniwagem po ginouli baneihi a welem po una taniwagehi, po u ani kaoha uyahina una memae."

**24** 'Ma lawana witonugana tauna tausana emosi i weleweleya i nei po i baha i pa, "Bada, a hanapugem tam ega lawa uta genogenogehi yaka om gapola e tamatama lawa gehouhi hai bagibagi uyahihiyei. **25** Uyahinei a matouta po om mone tausana emosi u weleweleu hipuli u hinena a gowadi, po amaka a tuhaga meya yaka geka om mone una waya."

**26** 'Ega yaka a bada i baha nae uyahina i pa, "Upum i dodola duma po tam tu bagibagi apopoem. U hanapugeu u gapola lawa gehouhi hai bagibagi uyahihiyei a tamatama, **27** awai binei u mone hoi banika ega uta houni? U gunawilana hougana uyahina u mone anai luwitanana ata waya?"

**28** 'Ega yaka a hewahewali uyahih i baha i pa, "Kina tausana emosi ona wihaleya po lawana iyai kina tausana 10 uyahina tauna ona weleya. **29** Lawa atapuhi uyahih awai e memae apo Yaubada ina luwitanahi po hina lata duma. Ma iyai uyahina ega awai ita memae, hawena habulu hotana ma Yaubada apo ina wihalena pahi. **30** Yaka hewalina apapoena ona halena hopuneya hoi uputa, tupo uguguwana uyahina po noka hotanana tou ma omhanakidiyana ina tahagaya."

*Hipuli tupo wohepali lawahi Yesu apo ina libahibahih*

<sup>31</sup> ‘Apo yohola tau Lawa Moinau tu winoy-anoya magomagouhi mitehi yada to nehaleya po to nenei u didiga hoi hipuli po u ani mae wasawasana uyahina a tugula. <sup>32</sup> Naka hougana apo ani taniwaga magomagouhi hin’omboina gogona mai u matau, ma lawa a wikahahi mei gamogamo gowahi sipi tu galena itetehi e kahakahahi goti u hayahiyei, <sup>33</sup> po sipi a houna liyehi u awala hinebawaugei, ma goti u awala kehakehaugei.

<sup>34</sup> ‘Tau hai wasawasa yaka apo lawa u awala hinebawau a paliwelehi ana pa, “Taumi Amau i kawakawaidewedewemi, ona nei omi ani taniwaga hipuli i iwawala tahaeya, ma ubeimi i wononogogeya ona waya. <sup>35</sup> Matababana taumi odubona am a hilage, ma yaniyani o weleu mei gasi uyopopou i haleeya, ma goila o weleu. A ihewahewa omi dobu uyahina ma o weluwiniu po a nehi omi numa uyahina, <sup>36</sup> ma ega u kaleko, ma taumi kaleko o weleu, a totogo ma o galena iteteu, hoi numa panipani a memae, ma o daadaniu.”

<sup>37</sup> ‘Uyahinei tu dumalu lawahi apo uyahiu hina baha hina pa, “Guyau, ega tota hanapugeya meyanai to gagalem ma am u hilage, ma yaniyani to welem, bo uyopopom i haleeya, ma goila to welem, <sup>38</sup> bo u ihewahewa ma to otugem po u nei i numa uyahina, bo ega om kaleko ma kaleko to welem, <sup>39</sup> bo u totogo ma to galena itetem ma hoi numa panipani u memae ma to weluweludadanim.”

<sup>40</sup> ‘Yaka tau tu wasawasa apo a paliwelehi ana pa, “A baha duma uyahimi, tam iyai walewalehiu tapitapiyahи emosi hota uyahina u ihaguhagu naka tau amaka u haguwe.”

**41** Uyahinei apo u awala kehakehau tu mae a paliwelehi ana pa, “Taumi tu apapoe ona nehaleu po ona nae mayau alalata wahagana uyahina, tauna Yaubada i wononogogeya Tomodulele a bolu ubeihi, **42** matababana lolowa am a hilage, ma ega yaniyani ota weleu, uyopopou i haleeya, ma ega goila ota weleu; **43** a ihewahewa omi dobu uyahina ma ega ota otugeu po ata nehi omi numa uyahina, ega u kaleko, ma kaleko ega ota weleu. A totogo ma ega ota galena iteteu, ma hoi numa panipani a memae ma ega ota weluweludadani.”

**44** ‘Apo tauhi u mulina hina baha hina pa, “Guyau, ega tota hanapugeya meyanai to gagalem ma am u hilage, bo uyopopom i haleeya, bo i dobu uyahina u wihewahewa, bo ega om kaleko, bo u totogo bo hoi numa panipani u memae ma ega tota haguhagum?”

**45** ‘Ma apo a baha uyahiji ana pa, “A baha duma uyahimi, hougana omi luyagohana u hinehi ega tu wotagou tapitapiyahi ota haguhaguhi, naka tau gasi ega ota haguwe.”

**46** ‘Uyahinei tauhi apo hina nae wiyuwa memehagana uyahina. Ma tu dumalu lawahi apo luyagohana tuwetuwai hina tuhagaya.’

## 26

*Babada hai luhogala ipa Yesu hina lihilageni  
(Maki 14.1-2; Luka 22.1-2; Yoni 11.45-53)*

**1** Yesu a wiatatiyana i wikkokowi ma a hewahewali i paliwelehi i pa, **2** ‘O hanapugeya iyeta luwaga ma apo Welulagona tolehana ta dewaya, po tau Lawa Moinau tu nugohaleu in’omweleneu

tu wigawiya uyahihī po hoi ani take hina tutulawiteu.'

<sup>3</sup> Naka hougana tu witalaguyaba babadahi po lugagayo tanitaniwaga po mi Yudeya hai tanitaniwaga hi'mboina gogona Kayapa a numa baneina u hinena, babana Kayapa tauna talaguyaba taniwagana. <sup>4</sup> Ma tunawahī hi wiwogatala ipa iyowai ma Yesu hina numa panipani gowadi po hin'uni. <sup>5</sup> Hi ibaabani po hi pa, 'Ega toleha u hinena Yesu ta panipani apo lawa hina wigawiyeta.'

*Wawine Yesu i wineuli u Betani  
(Maki 14.3-9; Yoni 12.1-8)*

<sup>6</sup> Yesu u Betani i memae, Simona lepelo a numa uyahina, <sup>7</sup> ma wawine gehouna wedu gaimei hi dewadewaya u hinena wakatu dimudimumuna i awali po i nei wakatuna mihana i lata duma ma weduna galenana i haki wahaga, ma Yesu uyahina i hiwogi.

<sup>8</sup> Ma Yesu a hewahewali wawinena hi gagaleya po uyohi i gigai po hi baha hi pa, 'Babana awai po wakatu geka u dewa guyougeya? <sup>9</sup> Wakatu geka emoemotana hita gimalena haleya po mone baneina hita waya po dayadayabu hita welehi.'

<sup>10</sup> Ma Yesu hai wibaabani amaka i hanapugeya yaka i baha nae uyahihī i pa, 'Geka wawinena ega ona genogenogeya. Awai uyahiu i dewadewaya naka i haki duma. <sup>11</sup> Tu dayadayabu hai hagu binei apo houga magomagouna u liyalijami hina memae ma tau apegā houga daodaona ta memae. <sup>12</sup> Wawinena i bunabunamiu naka hiniu i wononogogeya apo hoi kokowaga hina huhouniu binei. <sup>13</sup> A baha duma uyahimi yohola apo tuwegau hina guuguyeya lawa atapuhi uyahihī po hina

noonoli ma gasi wawine geka a bagibagi uyahiu i dewadewaya apo hina deedeya ani nugomomota tauna binei.’

*Yudasa i palihalena meya apo Yesu ina nugohaleya*

(*Maki 14.10-11; Luka 22.3-6*)

<sup>14</sup> Ega yaka Yesu a hewali gehouna gowana Yudasa Isakaliyota i nae witalaguyaba babadahi uyahihi <sup>15</sup> po i paliwelehi i pa, ‘Mone a lata awai apo ona weleu, ma Yesu uyahimi a palihaleya?’ Ega yaka mone bibitutuna magouhi 30 hi weleya. <sup>16</sup> Naka hougana Yudasa a gaogao i biheiha ipa iyowai ma apo Yesu ina nugohaleya.

*Welulagona tolehana hi dewaya*

(*Maki 14.12-21; Luka 22.7-14, 21-23; Yoni 13.21-30*)

<sup>17</sup> Welulagona tolehana uyahina palawa ega ani lihaahanana houga amna, noka iyeta emosi hota i iotonana, ma Yesu a hewahewali hi nei uyahina po hi pa, ‘Meka tuponana u luhogaleya apo uyahina toleha bimgei to wononogogeya?’

<sup>18</sup> Yesu i pa, ‘Meyagai baneina ona luiya po lawana amaka o hanapugeya ona paliweleya ona pa, “Bada geka pita a baha uyahim, i pa u houga dumana i tuliyaliyani, yaka apo u hewahewali mitehi welulagona tolehana om numa uyahina ton’ani.” ’ <sup>19</sup> Ega yaka Yesu a baha hi wotagoya po Welulagona tolehana hi wononogogeya.

<sup>20</sup> Aipompom Yesu a hewahewali magouhi 12 mitehi hi lui po hi duhuna po hi’mam. <sup>21</sup> Ma hai amna u hinena Yesu i baha i pa, ‘A baha

duma uyahimi uyahimiyei apo lawa gehouna ina nugohaleu.'

<sup>22</sup> Yesu a baha geka binei ma hi nugodubu, yaka emosi po emosi Yesu i laubayadeya i pa, ‘Guyau iyai? Nugote tau?’

<sup>23</sup> Ega yaka Yesu i baha i pa, ‘Lawana mitehi gaeba emosi uyahina to wohopu gogona tauna apo ina nugohaleu. <sup>24</sup> Lawa Moinau apo a hilage, mei Yaubada a Buka uyahina hi gilugilumi pite, tamogi lawa awai Lawa Moinau ina nugenugohaleu naka tauna tu nugodubu. Itapa lolowa ega hita guni po ita lata apo ita haki wahaga, ma apo ina winugototogo duma a apapoe binei.’

<sup>25</sup> Ega yaka Yudasa Yesu tu nugohalenana i baha i pa, “Guyau, nugote tau?”

Ma Yesu i baha i pa, ‘Amaka u bahena mem.’

### *Guyau a am*

(Maki 14.22-26; Luka 22.14-20; 1 Kolinito 11.23-25)

<sup>26</sup> Hai am uyahina Yesu aniani i waya po i wimaamala ma i tomutomuya po a hewahewali i welewelehi ma i baabani i pa, ‘Geka hiniu ona waya po on’ani.’

<sup>27</sup> Ma keyaka i waya po i wimaamala ma i welehi, ma i baha i pa, ‘Magomagoumi on’umaya,

<sup>28</sup> geka talau Yaubada a wogatala binei lawa atapuhi hai apapoe paligilana binei apo ina kololo.

<sup>29</sup> Ma a paliwelemei amalai ma i wawala po i ne-nae apega wine a umaya a sigana taumi ma tau Amau anani taniwaga uyahina, wine wouna apo tan’umaya.’

<sup>30</sup> Ega yaka hi lulougo ma hi hopu po hi gae Oliweta oyana uyahina.

*Pita apo ina bowibowi Yesu i bahena wahagi  
(Maki 14.27-31; Luka 22.31-34; Yoni 13.36-38)*

<sup>31</sup> Yesu i baha nae uyahih i pa, ‘Ididibala geka atapumi apo ona lowo haleu, mei Yaubada a Buka i bahebaheya i pa,

“Tu galena itete sipi ana ilawi  
ma sipi magomagouhi hina nohanoha mehi.”

<sup>32</sup> Ma u towolo meme u mulina apo a tahatahaya nae u Galili ma taumi muliugei ona nei.’

<sup>33</sup> Pita i baha kadidili i pa, ‘Atapuhi apo hina lowo halem, ma tau apega a lowo halem.’

<sup>34</sup> Ma Yesu Pita uyahina i baha nae i pa, ‘A baha duma uyahim, kamkam olotona apega ina tou, a sigana mala tonuga una bowiyeu.’

<sup>35</sup> Ma Pita i baha i pa, ‘Apeega. Apo hina laihilagenim, yaka tau gasi hina lihilageniu. Apega a bowiyem.’

Ma atapuhi hi baha hi pa, ‘Tauyai gasi, apega to lowo halem.’

*Yesu a lupali tano Gesemani uyahina  
(Maki 14.32-42; Luka 22.39-46)*

<sup>36</sup> Yesu a hewahewali tauhi mitehi hi nae tano Gesemani uyahina, ma i paliwelehi i pa, ‘Geka hotanana ona memae ma tau kikina a tunae po a lupali.’ <sup>37</sup> Ega yaka hai tonuga i weluwinihi po mitehi hi nae, Pita ma Sebedi natunatuna luwaga, ma Yesu anai nugowiyuwana po anai nogohelelena. <sup>38</sup> Ega yaka i paliwelehi i pa, ‘Nugonugou i wiyuwa duma nugote kikina ma apo a

hilage, uyahinei geka hotanana ona memae ma ta gagalena imahi.'

<sup>39</sup> Ma Yesu tupona i tunae ma i polou hoi hipuli ma i lupali i pa, 'Amau, apo emoemotana yaka geka wiyuwa keyakana uyahiu una wihaleya. Tau u nugotuhu hawena ma tam om nugotuhu una dewa tagoya.'

<sup>40</sup> Ma i gunawileya a hewahewali uyahihpo hi eneno ma i tuhagahi, ega yaka Pita uyahina i baha nae i pa, 'Pita, ega emoemotam kabudala gaogaona emosi ma ta gagalena? <sup>41</sup> Ona gagalena ma ona laupali po ipa ega ludadana ona ialoni. O luhogaleya ipa ona haguwe ma hinimi hi begabega.'

<sup>42</sup> Yesu i gunawilena meya po i lupali i pa, 'Amau, wiyuwa keyakana ega ata luhogaleya an'umaya, tamogi ipa om nugotuhu a wotagoya.'

<sup>43</sup> Ma i gunawilena meya a hewahewali uyahihpo hi eneno ma i tuhagahi, babana matahi hi pota.

<sup>44</sup> Ega yaka i nehalena mehi po i nae a lupali i witonugaya, ma a lupali i lilugo meya.

<sup>45</sup> Ma i gunawilena meya po a hewahewali uyahihpo hi eneno ma i tuhagahi, 'Iyowai yohola o eneno, ma o iyagohina? Ona galeya u houga amaka i geleta po tau Lawa Moinau hina nugohaleu tu apapoe u nimahi. <sup>46</sup> Ona towolo po ta nae babana tu nugohaleu amaka e nenei.'

### *Yesu hi numa panipani*

*(Maki 14.43-50; Luka 22.47-53; Yoni 18.3-12)*

<sup>47</sup> Yesu yohola i ibaabani ma Yudasa i geleta tauna a hewali gehouna. Ma lawa hi nenei naka

witalaguyaba babadahi po mi Yudeya hai tani-taniwaga hi himilihi po Yudasa mitehi hi nei ipa Yesu hina numa panipani, a nimagawiya gapolahi anai kwasikwasih po anai dabalumahi hi nei Yesu uyahina. <sup>48</sup> Ma Yudasa wekiwekilala gehouna uyahih i baheya i pa, ‘Apo ona gagaleu ma lawana a nae po niuna a yagoyagoni, naka tauna Yesu apo ona womomohi.’ <sup>49</sup> Ega yaka i dumalu po i nae Yesu uyahina po niuna i yagoni ma i mamali i pa, ‘Tinani Guyau.’

<sup>50</sup> Ma Yesu i baha nae Yudasa uyahina i pa, ‘Tulau, awai binei u nei?’

Ma tu wigawiya hi nei po Yesu hi womomohi. <sup>51</sup> Ma Yesu a bolu uyahihiyei lawa gehouna ni-mana i wohopuneya po a kwasikwasi i holi po tu witalaguyaba hai taniwaga a tu bagibagi i lubuya po tanigana i talutuiya.

<sup>52</sup> Ma Yesu lawana uyahina i baha nae i pa, ‘Amaka ma om kwasikwasi ani hounana uyahina una houna meya, babana tu wigawiya witona hai ani hilage. <sup>53</sup> A paliwelem inapa a lupali Amau uyahina hagu binei, yaka apo tu winoyanoya yadei bolu banei dumana ina himilihi. <sup>54</sup> Tamogi apeega, babana geka tahayana amaka Yaubada a Buka uyahina hi bahebaheya ipa limoinana ina geleta.’

<sup>55</sup> Naka hougana Yesu bolu uyahih i baha nae i pa, ‘Iyowai po nimagawiya gapolami o nei biugei mei tau tu danene? <sup>56</sup> Ma iyowai po iyeta magomagouna numa dalabu baneina uyahina a iyatatiyana ma ega ota paniu, ma geka dewahi ipa hina geleta po tu bahapiko hai wibaabani atapuhi Yaubada a Buka u hinena hi gilugilumihi anohi

hina limoinehi.’ Ega yaka Yesu a hewahewali atapuhi hi lowo haleya.

*Yesu i luhetala tanitaniwaga u matahi  
(Maki 14.53-65; Luka 22.54-55, 63-71; Yoni 18.13-14, 19-24)*

<sup>57</sup> Tu wigawiya boluhi Yesu hi numa pani-pani po hi niyeya tu witalaguyaba hai taniwaga gowana Kayapa uyahina, ma Kayapana a numa u hinena naka lugagayo tanitaniwagahi po mi Isalaela hai tanitaniwaga hi'mboina gogona po hi memae. <sup>58</sup> Ma Pita mulihiyei i wotago po i nae tu witalaguyaba hai taniwaga a numa u gali hinena i lui po tu galena itete mitehi hi tugutugula, ma i lautanigana ipa apo Yesu a taniwaga awai hina weleya.

<sup>59</sup> Ma tu witalaguyaba babadahi po tu wi-wogatala atapuhi Yesu hi gou koyakoyameya ipa iyowai ma Yesu a baba awai hina tuhagaya po hin'uni. <sup>60</sup> Ma tu wigou koyakoyama hi nei po Yesu hi igouya ma ega kikina lawa luwaga hai wigou nonolahi emosi.

Ma mulihiyei lawa luwaga hi nei po <sup>61</sup> hi baha hi pa, ‘Yesu lolowa i baha i pa, “Emoemotau apo numa dalabu geka a hoe haleya ma iyeta tonuga u hinena ma apo a wogo meya.”’ <sup>62</sup> Ega yaka tu witalaguyaba hai taniwaga i towolo po i baha i pa, ‘Iyowai? Ega emoemotana po noka lawahi hai wigou una wimiheya? Hai limoinana amaka ta nonoli ma om baha awai?’ <sup>63</sup> Ma Yesu i genuwana.

Ega yaka tu witalaguyaba hai taniwaga Yesu i paliweleya i pa, ‘A taniwagem Yaubada Memewahagana u matana, una baha dumalu, tam Besinana lawana, Yaubada Natuna?’

**64** Ma Yesu i baha i pa, ‘Naka amaka u baheya, ma a paliwelemi apo yohola tau Lawa Moinau, Tu maninidumana u awala hinebawana a tugutugula ma ona gagaleya, ma yaloi uyahinei a hopu mai.’

**65** Uyahinei tu witalaguyaba hai taniwaga uyona i gigai ma a kaleko i loloya ma i baha i pa, ‘A baha o nonoli, Yaubada i widibogi. Amaka ma ega tu wigou hina ibaabani a powa binei. **66** Ma iyowai taumi omi winugonugotuhu Yesu binei?’

Ma tauhi hi baha hi pa, ‘Yesu ina hilage.’

**67** Ma hi howaya ma hi lunawatatanu ma gehouhi hi kodikodili **68** ma hi laubayadeya hi pa, ‘Inapa tam Besinana lawana yaka una wipiko iyai i launim?’

### *Pita Yesu i bowiyeya*

(*Maki 14.66-72; Luka 22.56-62; Yoni 18.15-18, 25-27*)

**69** Ma Pita hoi galihine i memae ma tu bagibagi guguhinina gehouna i hopu mai po i baha nae i pa, Tam lawa Galiligei lolowa Yesu mitehi u memae.’

**70** Ma lawa magomagouhi u matahi ma i bowi i pa, ‘Om wibaabani anona ega ata hanapugeya.’

**71** Ega yaka Pitana i tudeiwa nae gali u matetana, ma guguhini gehouna Pita i galeya yaka lawa hi towotowolo uyahihi i baha i pa, ‘Naka lawana lolowa Yesu lawa Nasaletagei mitehi hi memae.’

**72** Pita i bowi meme ma i wigwala i pa, ‘Naka lawana tau ega ata hanapugeya.’

**73** Hi memae houga kukuna ma lawa gehouhi hi nei Pita uyahina po hi pa, ‘Baha dumana tam Yesu

a bolu gehouna, babana ponam gololona mei mi Galili ponahi gololona.'

<sup>74</sup> Ega yaka Pita i wigwala labatana i pa, 'U gwala amau, naka lawana tau ega ata hanapugeya.'

Naka kabudalana uyahina kamkam olotona i tou. <sup>75</sup> Ma Pita, Yesu a baha i nugotuhuya i pa, 'Apega kamkam olotona ina tou, a sigana mala tonuga una bowiyeu.' Ma i hopu hoi uputa po i tou duma.

## 27

### *Yesu hi niyeya Pilato uyahina (Maki 15.1; Luka 23.1-2; Yoni 18.28-32)*

<sup>1</sup> Malitom ma tu witalaguyaba babadahi atapuhi po gasi mi Yudeya hai tanitaniwaga hi baha gogona ipa Yesu hina lihilageni. <sup>2</sup> Ega yaka Yesu hi numa panipani po hi niyeya Pilato uyahina, babana tauna mi Loma hai taniwaga.

### *Yudasa a hilage (Bagibagi 1.18-19)*

<sup>3</sup> Yesu tu nugohalenana Yudasa i hanapugeya ipa apo kikina ma Yesu hina lihilageni, yaka nungonugona i buiya, po a mone bibitutuna magouhi 30 i waya ma i gunawilena meya tu witalaguyaba babadahi po gasi mi Yudeya hai tanitaniwaga uyahiji. <sup>4</sup> Po i baha i pa, 'Amaka a powaya, babana lawa dewadewana uyahimi a nugohaleya.'

Ma hi baha hi pa, 'Tauyai uyahiyai ega genona, ma tam tunawam om geno.'

<sup>5</sup> Ega yaka mone bibitutuna magouhi 30 numa dalabu u hinena i nohaya ma i nae po gulawa uyahinei i take po i hilage.

<sup>6</sup> Ma tu witalaguyaba babadahi monena hi tuwaluhi po hi pa, ‘Ega a dumalu ipa numa dalabu ombenenana binei ta houni, babana geka monena lawa a hilage mihana.’ <sup>7</sup> Ega yaka tunawahi ma hi nugenugotuhu po geka monena hi waya po walata tu bagibagiyena a hipuli hi gimaleya, po ipa hipulina tauhi tu wihewahewa hai kokowaga. <sup>8</sup> Ma hipulina hi wigowaya po hi pa, ‘Tala Hipulina’, geka gowanana yohola e memae. <sup>9</sup> Noka uyahina ma tu bahapiko Yelemaya Yaubada a baha uyahina i bahebaheya anona i lugeletuya, i pa, ‘Mi Isalaela mihana hi baheya, ma naka monena bibilituna magouhi 30 hi waya, <sup>10</sup> po walata tu bagibagiyena a hipuli hi gimaleya, mei Guyau a taniwaga uyahiu.’

*Pilato Yesu i luhetaleya*

(*Maki 15.2-5; Luka 23.3-5; Yoni 18.33-38*)

<sup>11</sup> Pilato mi Loma hai taniwaga baneina Yesu u matana i towolo. Ma Pilato Yesu i lubayadeya i pa, ‘Tam mi Yudeya hai wasawasa, bo?’

Ma Yesu i baha i pa, ‘Tam, om baha naka pite.’

<sup>12</sup> Tu witalaguyaba babadahi po mi Yudeya hai tanitaniwaga Yesu hi igouya ma ega kikina awai ita baheya. <sup>13</sup> Ega yaka Pilato i baha i pa, ‘Iyowai geka bahahi uyahihiyei hi igoum amaka u nonolihi?’ <sup>14</sup> Ma Yesu ega kikina baha awai ita baheya, ma i genugenuwana. Uyahinei ma Pilato nugenugona i gohola dumaya.

*Pilato i taniwaga po Yesu hina lihilageni*

(*Maki 15.6-15; Luka 23.13-25; Yoni 18.39-19.16*)

<sup>15</sup> Bolima emosi po emosi Welulagona tolehana uyahina mi Loma hai taniwaga a dewa apo lawa

hoi numa panipani he memae, apo lawa boluhi ma iyai hina nugotuhuya po hina baheya yaka apo ina lupena haleya hoi po ina hopu. <sup>16</sup> Ma naka hougana lawa gehouna hoi i memae ma lawa magomagouhi gowana hi hanapugeya, Balaba tauna lawa apapoe dumana. <sup>17</sup> Ega yaka lawa boluhi hi'mboina mai Pilato uyahina ma Pilato i lubayadehi i pa, ‘Lawa awai o luhogaleya apo a lupena haleya hoi, Balaba bo Yesu hi igowaya Besinana lawana?’ <sup>18</sup> Pilato hai matababana amaka i hanapugeya, Yesu hi'mgenagenaliliyeya yaka hi numa panipani po ipa hina lihilageni.

<sup>19</sup> Noka hougana Pilato yohola luhetala i noonoli, ma agona baha i himili uyahina i pa, ‘Naka lawana uyahina ega awai una dewadewaya, tauna lawa dumadumaluna, babana uguwei a luboniyeya po a matouta duma.’

<sup>20</sup> Hi ibaabani ma tu witalaguyaba babadahi po mi Yudeya hai tanitaniwaga lawa hi lihunahi po Pilato uyahina hi bahabaha gawata, ipa Balaba ina hoe haleya m Yesu hina lihilageni.

<sup>21</sup> Ega yaka Pilota i lubayadehi i pa, ‘Hai luwaga, ma iyai o luhogaleya apo a lupena haleya bimiyei?’

Ma hi baha hi pa, ‘Balaba.’

<sup>22</sup> Ma Pilato i lubayadehi i pa, ‘Yesu hi igowaya Besinana lawana iyowai apo a dewaya?’

Ma lawa atapuhi hi otu labatana hi pa, ‘Una witakeya!’

<sup>23</sup> Ega yaka Pilato i lubayadena mehi i pa, ‘Ma powa awai i dewaya?’

Ma hi otu labatana hi pa, ‘Ona witakeya!’

<sup>24</sup> Yaka Pilato amaka i nugotuhuya ega a kadiili gehouna, babana bolu baneina hi wihiigihigli duma po galenahi mei hina itona, ega yaka goila i waya po u matahi nimana i ogaya ma i baha i pa, ‘Apega awai gehouna a dewaya geka lawana uyahina po a hilage binei a taniwaga, taumi tunawami apo ona taniwageya.’

<sup>25</sup> Ma lawa boluhi hi baha hi pa, ‘To baha ipa ina hilage, ma a hilage witeina tauyai po natunatuyai uyahiyai ina memae.’

<sup>26</sup> Geka bahana u mulina Pilato i baha po Balaba hi lupena haleya ma Yesu gulawa metametanana uyahinei hi wilawi ma ipa hina niyeya po hoi ani take hina tutulawiteya.

*Tu wigawiya Yesu hi lauguyoguyougeya  
(Maki 15.16-20; Yoni 19.2-3)*

<sup>27</sup> Ega yaka mi Loma hai tu wigawiya Yesu hi luiya taniwaga a numa baneina u hinena, ma tu wigawiya hai bolu atapuna hi’mboina gogona mai Yesu uyahina, <sup>28</sup> po a kaleko hi wihielya ma wasawasa hai kaleko kayakayana hi wiluiya. <sup>29</sup> Ma a unuhau gologolowa waidonadonana hi dewaya po u unununa hi houni ma digona u awala hinebawana hi houni, ma u matana hi polou ma hi lauguyaguyau hi pa, ‘Tinani, tam mi Yudeya hai wasawasa?’ <sup>30</sup> Ma hi howaya ma digona hi waya po uyahinei unununa hi ilawi. <sup>31</sup> Hi luguyoguyougena woloeya ma wasawasa hai kaleko hi wihielya ma tauna a kaleko dumana hi wiluiya, ma hi niniyeya ipa hina witakeya.

*Yesu hi tutulawiteya hoi ani take  
(Maki 15.21-32; Luka 23.26-43; Yoni 19.17-27)*

<sup>32</sup> Yelusalem hi nehaleya po hi nena, ma Simona lawa Sailinigei hi tuhagaya po ega yaka hi baha po Yesu anani take mayouna i awala haguya. <sup>33</sup> Hi nae po hi geleta u Gologota, a bui naka Ununu Dobuna. <sup>34</sup> Ega yaka wine mula-mula waigolana mitehi hi wila emoteya ma hi weleya, ma Yesu wine noka i uma dadani ma i wihinigigiyeya. <sup>35</sup> Ma Yesu hoi ani take hi tutulawiteya po i kokoe ma a kaleko hi wikibugehi po hi tamihi. <sup>36</sup> Gohagohana i kokoe ma hi tugula po hi gagalena iteteya. <sup>37</sup> Ma ani take u tepana ani wigouna hi giluma geleteya hi pa:

YESU GEKA MI YUDEYA HAI WASAWASA

<sup>38</sup> Tu danene luwaga mitehi hi witake gogonehi gehouna u awala hinebawana ma gehouna u awala kehana. <sup>39</sup> Lawa liyaliyanei hi nena, ma hi bahabaha gae ma hi ununu kwadikwadiyana ma hi palipaliyeya hi pa, <sup>40</sup> ‘U baha u pa emoemotam apo numa dalabu una hoe haleya, ma iyeta tonuga u hinena una wogo meya, ma heki, tam tunawam una luyawata mem po ani take uyahinei una hopu mai apo inapa tam Yaubada Natuna yaka.’

<sup>41</sup> Mei gasi tu witalaguyaba babadahi po lugagayo tanitaniwagahi po mi Yudeya hai tanitaniwaga hi palipaliguyaguyau hi pa, <sup>42</sup> ‘Lawa gehouhi i wiluyagohanihi hapali tauna ina wiluyagohana meya? Ipa tauna Isalaela ata wasawasa, heki, geka hougana ani take uyahinei ita hopu mai po tata galeya ma tata witumaganeya. <sup>43</sup> Tauna Yaubada i witumaganeya po i pa, “Tau Yaubada Natuna.” Heki, geka hougana Yaubada ina haloya po ta galeya.’ <sup>44</sup> Mei tu danene Yesu mitehi hi take

gogonehi tauhi gasi Yesu hi widibogi.

*Yesu i hilage*

(*Maki 15.33-41; Luka 23.44-49; Yoni 19.28-30*)

<sup>45</sup> Iyeta i lautipolini ma kabudala lalana i wohouni po tupo atapuna i uguguwi a sigana kabudalana i hopu po ibiga i lutipolini. <sup>46</sup> Houga noka uyahina Yesu i otu i pa, ‘Eloi, Eloi, lama Sabatani?’ anona ‘U Yaubada, u Yaubada, awai binei u nehaleu?’

<sup>47</sup> Ma lawa gehouhi u liyaliyana hi towotowolo geka bahana hi nonoli po hi pa, ‘Geka lawana nugote Elaisiya e ototugeya.’

<sup>48</sup> Mala emosi ma lawa gehouna i bulili nae po baloi i waya po wine waitululuwana uyahina i wiyyoli ma hige uyahinei i tupahigeya po i wiyyoga giyeya u gamona ipa ina hanaguguya. <sup>49</sup> Ma lawa gehouhi hi baha hi pa, ‘Heki, una wohouna ma tana iotonana ma apo Elaisiya ina nei po ina wiluyagohani.’

<sup>50</sup> Ma Yesu i otu labatana meme ma yautuna i kokoe.

<sup>51</sup> Ma numa dalabu baneina libulibuna kaleko baneina i taketake i gunalolo luwageya u moyana ma i hopu po u babana, ma guhuguhu i geleta po gaima baneihi hi gunahedalihi. <sup>52</sup> Ma kokowaga lobodahi hi gunahoenihi po tu wiwoiyawa magomagouhi odubona hi hilage po hoi kokowaga hi memae hi towolo meme. <sup>53</sup> Ma Yesu a towolo meme u mulina tauhi hi nae Yelusalem po lawa magomagouhi uyahihhi hi laugeletehi.

<sup>54</sup> Ma tu wigawiyahi hai taniwaga mitehi Yesu hi gagalena iteteya ma guhuguhu po gasi awai po awai hi gelegeleta ma hi gagalehi po hi matouna

duma po hi pa, ‘Baha dumana geka Yaubada Natuna.’

<sup>55</sup> Wiwine gehouhi uheiya hi towolo ma Yesu hi gagaleya, tauhi lolowa u Galili ma hi wotagoya po a hagu hi dewadewaya. <sup>56</sup> Gehouna gowana Maliya Magadalagei, ma a waligeha Yamesa ma Yosepa hinahi, ma gasi Sebedi natunatuna luwaga hinahi.

### *Yesu hoi kokowaga hi houni*

(*Maki 15.42-47; Luka 23.50-56; Yoni 19.38-42*)

<sup>57</sup> Ma amaka aibiga yaka lawa Alimatiyagei tu waigapola lawana gowana Yosepa tauna Yesu tu wotagona gehouna i nae <sup>58</sup> Pilato uyahina po Yesu hinina i lupaliyeya ipa ina waya po ega yaka i palihaleya po ipa ina waya. <sup>59</sup> Apoma Yesu hinina i waya po kokowaga kalekonei i humaya <sup>60</sup> ma hoi kokowaga i houni. Kokowagana naka tapatapanan hi hedali po i lui ma yohola ega hita houneya, ma guduna gaima baneina hi buileya po uyahinei kokowagana hi lutomgeya ma i nae. <sup>61</sup> Ma Maliya Magadalagei a waligeha mitehi kokowaga mate-tana u liyaliyana hi tugutugula.

### *Kokowaga hi galena iteteya*

<sup>62</sup> Yesu hi itakeya naka mi Yudeya hai iyeta wononogo, ma malitom po hai dalabu iyetana uyahina tu witalaguyaba babadahi po gasi Palisi lawahi hi nae Pilato uyahina. <sup>63</sup> Po hi baha hi pa, ‘Bada, tu wikoyakoyamana lolowa a yautuna ma i bahabaha to nugotuhuya i pa, “Iyeta tonuga ma apo hilagei a towolo meme.” <sup>64</sup> Ma emoemotana apo uta baha po kokowaga tu galena itetehi hita galena itete imahiyeya iyeta tonuga u hinehi,

meka po apo a hewahewali hina nei po Yesu hinina hina waya po hina houna gowadi ma lawa hina koyamehi po hina pa, “Yesu amaka hilage uyahinei i towolo meme,” po Yesu a hewahewali hai koyama waimulina a koyama tahatahayana ina lata lagoni.’

<sup>65</sup> Ega yaka Pilato i paliwelehi i pa, ‘Omi tu galena itete he memae, ona niyehi po kokowaga hina galena itete imahiyeya.’ <sup>66</sup> Yaka hi nae kokowaga u matetana po guduna hi pupu imahiyeya ma tu galena itete hi witowolihi.

## 28

### *Yesu hilage uyahinei i towolo meme (Maki 16.1-10; Luka 24.1-12; Yoni 20.1-10)*

<sup>1</sup> Mi Yudeya hai dalabu i kokoe, ma gaogao a iyeta tahatahayana uyahina malatomtom kikina Maliya Magadalagei, a waligeha mitehi hi nae ipa kokowaga hina galeya. <sup>2</sup> Ma guhuguhu baneina i gelete, naka Guyau a tu winoyanoya gehouna yadei i hopu mai po kokowaga matenanei gaima i buileya ma u tepana i tugula. <sup>3</sup> Tu winoyanoya galenana i namanamali ma a kaleko i wakeke duma. <sup>4</sup> Ma kokowaga tu galena itetena tu winoyanoya hi gagaleya po hi matouta, po hi taatawa ma hi guli mei lawa hilahilagehi.

<sup>5</sup> Ma tu winoyanoya wiwinehi i paliwelehi i pa, ‘Ega ona matomatouta. A hanapugemi taumi Yesu hi laihilageni o bibiheya. <sup>6</sup> Tauna ega geka hotana ita memae amaka i towolo meme, mei lolowa i palipaliwelemi pite. Ona nei po anani eno ona galeya kokoena. <sup>7</sup> Ma ona nae po a hewahewali

ona paliwelena yagiyaginehi ona pa Yesu amaka hilage uyahinei i towolo meme po e tahatahaya nae u Galili, ma taumi noka hota apo ona galeya. Geka omi tuwega amaka a paliwelemi.'

<sup>8</sup> Ega yaka wiwinehi hi matouta ma gasi hi kaoha, ma kokowaga hi nehaleya po hi neyagiyagina po hi nae Yesu a hewahewali uyahihpo awai hi gelegeleta hi paliwelehi. <sup>9</sup> Mala emosi ma Yesu i tuhagahi po i mamalihi i pa, 'Tinani,' ma hi polou po aena hi wogoya ma hi wotalagiyeya. <sup>10</sup> Ma Yesu i paliwelehi i pa, 'Ega ona matomatouta ma ona nae po walewalehiu ona paliwelehi po hina nae u Galili po noka hotana apo hina galeu.'

### *Kokowaga tu galena itetena hai wipaliwelena*

<sup>11</sup> Geka wiwinehi yohola tahayagei hi nena, ma kokowaga tu galena itete hi nae Yelusalem po awai hi gelegeleta tu witalaguyaba babadahi hi paliwelehi. <sup>12</sup> Ega yaka tu witalaguyaba po mi Yudeya hai tanitaniwaga mitehi hi'mboina ma hi wiwogatala po mone baneina kokowaga tu galena itetena hi welehi ma hi lugagayogehi, <sup>13</sup> po ipa ega lawa hina palipaliwelehi, ma hina baha hina pa, 'Uguwei to eneno ma Yesu a hewahewali hi nei po hinina hi daneneya.' <sup>14</sup> Ma gasi hi paliwelehi hi pa, 'Inapa mi Loma hai taniwaga tuwega geka ina nonoli yaka apo to koyameya po ega ina lauuyogigai uyahimi.' <sup>15</sup> Ega yaka hai mone hi tama, ma babadahi hai baha hi wiponawogogeya po hai widededeni hi nohaya mi Yudeya atapuhi uyahihpo amalai he ibaabaniyeya.

*Yesu a hewahewali hai bagibagi i welehi  
 (Maki 16.14-18; Luka 24.36-49; Yoni 20.19-23;  
 Bagibagi 1.6-8)*

<sup>16</sup> Ega yaka Yesu a hewahewali magouhi 11 hi nae u Galili po hi gae oya Yesu i baheba-heya uyahina. <sup>17</sup> Po Yesu hi galeya ma hi wotalagiyea, tamogi uyahihi gehouhi yohola hi launugoluwaluwaga. <sup>18</sup> Ega yaka Yesu i nei uyahihi po i paliwelehi i pa, ‘Amau taniwaga atapuna hoi yada po hoi hipuli amaka i weleu, <sup>19</sup> yaka ona nae tupo atapuna uyahina po ona lauguguya lawa uyahihi po hina wotago uyahiu. Ma Amau gowanei, po tau Natuna gowaugei, po Alugo Woiyawa gowanei ona ibapatisohi. <sup>20</sup> Ma wiatatiyana atapuna amaka a welemi, ma lawa ona wiatatiyehi po hina wiponawogo. A baha duma uyahimi apo tau houga magomagouna mitemi ta memae, amalai po a siga hipuli anani kokoe uyahina.’

**YAUBADA A WOGATALA WOUNA  
The New Testament in the Tawala language of Papua  
New Guinea**

**Nupela Testamen long tokples Tawala long Niugini**

copyright © 1985, 2014 Wycliffe Bible Translators, Inc. and Bible Society of Papua New Guinea

Language: Tawala

Translation by: Wycliffe Bible Translators

Text © 1985, 2014 Wycliffe Bible Translators, Inc.; 2014 print edition © Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-06-24

---

PDF generated using Haiola and XeLaTeX on 11 Nov 2022 from source files  
dated 9 Oct 2020

03dd8e7f-64f4-5464-abd5-5e08202f0f29